


DITÙKÙ DYÀ BUCÌMUNYI

 Nudi mwa kusòmbaayi panwikala baswe. Nenku ndi muswe kwamba patooke kusakidila kwanyi kudi Nzambi, bwa dyèsè dya kusanganyibwa kaaba aka ne kutwilanganaku ne beena mwabo naanyi baa Bukalenge bwa Nzambi. Panudi nwênù aba basangile mwab'ewu apa, mu dinda emu, mu nzubu wa mwaneetu wa balume ewu emu, bwa—bwa kwenzaku ndambu wa bwobumwe cyapamwe, bidi bimvulwija mu mushindu kampanda Ekeleeziya wa ku cibangidilu. Mushindu wàkatwàdijà bwena Kilisto dyambedi, bivwa, Bible mmwambe ne: “Bivwa nku nzubu ne ku nzubu. Bavwa badisangisha ne bacibula dyàmpà ne mwoyi wumwe.” Nenku cyòcì aci ki citudi baswe kwikala naaci mu dinda emu, patudi kaaba aka apa, mmwoyi wumwe, kiipacila kamwe.

² Cintu cimwepele—cimwepele citudi tuteeta bwa kukumbaja, ne, ncyà ne, kukumbaja ndongamu wa Nzambi bwa nsòmbelu yetu, patucidi panu pa buloba. Ne pàmwäpa, mîngà misangu, Nzambi, kukaadi bidimu binunu byàbûngi, kadi Yèyè, ku lungenyi Lwende ludi kaluyi mikalu alu, ukaavwa mumanye ne tuvwa mwa kwikala kaaba aka mu dinda emu, ne tuvwa mwa kwalukila mwaba ewu mu mpàtà ewu, anyi—anyi mu cipeela eci, mu kazùbù kakese aka. Yèyè ukaavwa mumanye cyòcì aci kukaadi bidimu binunu byàbûngi.

³ Mpindyewu, tudi batwilangane ne bamwe baa ku balunda beetu bàvwà bàlwa mu dinda emu bafumina ku Tucson, famiye wa Stricker. Nenku moteur wa mashinyi abo uvwa munyanguke. Twètù kwambula batùvwà peetu mwa kwambula abu, bwa kumona mwa kubafikisha kaaba aka, inábànzà ewu ne—ne bânà. Nenku nebalwe, pashiishe ndambu, bu bôbò mwa kulongolweshaku moteur wabo awu. Kuvwa mmu mansanga makeke a njila lwà kuntweku. Ncyèna mumanye ne pavwa mpenyi piine apu to. Kadi tudi ne disanka dya kwikala kaaba aka.

⁴ Nenku mpindyewu, Mwaneetu Isaacson ewu, ne twètù biine tudi bamanyangane nende anu bya bisebusebu's, anu dimanyangana dya ne tudi bânà beetu mu Kilisto edi. Kadi tukaadi bapeteku pamwe ndambu ya bikondo bya bwobumwe pamwe. Ne ndi ngeela meeji ne ditwilangana dyetu dya kumpala divwa nku. . . mu Phoenix mwamwa, kukaadi bidimu. Ne bu mukajende mwikale mwab'ewu, ncyèna mufwanyine kumumanyaku to. Mpindyewu, ki wetu mushindu utudi bamanyangane ngwôwò awu, bwa kumanyaku ne mukajende nganyi, anyi famiye wende.

⁵ Mu dibwela amu mêmè kutwilangana ne umwe wa ku bânà beetu baa bafiike mwimanyine ku ciibi, muntu mulenga wa dikema mwikale ne dilabulanga dya ku cyanza, nudi bamanye's, dikufikisha ku didyumvwa ne mbakwakidile anu bilenga be, nudi bamanye's, bwa kubwela, ne—ne bwa kwikala munkaci mwa musumbà wa bu nunku ewu mu dinda emu, ne Bidi bimpeeshaku dyêsè's.

⁶ Nenku mpindyewu, nkaadiku mupetepete dyêsè bwa kwakula mu myaba ya misumbà yâbûngi, myaba ya bafwanyine kwikala ne bantu pâmwâpa binunu misangu binunu basangile. Kadi mêmè. . . Bivulukilu bya wanyi mudimu wa bwambi bitu mbikondo bya bu eci nunku, mùdì pâmwâpa bantu dikumi, anyi makumi abidi, basômbe pamwe, bimweka anu bu ne Nzambi udi ukwata mudimu ne bantu bya sheemâsheemâ. Ngeela meeji ne tudi tudyumvwa bamanyangane bya bipicidile, ne—ne patudi tudisangisha mu tusumbu tukese. Mbimweke bu ne ki mwaba udi Diyì dya Nzambi ditamba—ditamba kutulengeleela, ki patudi, paakambaYe ne: “Mwaba wônsò udi babidi anyi basatu basangile mu Dînà Dyanyi, Mêmè ndi munkaci mwabo amu.”

⁷ Makeelela diloolo awu, pabwîpì ne mundankulu, mvwa anu mudisangishe ne. . . mu nzubu kampanda mùvwà anu mulume ne mukajende, ne nsongaakaji wa citende, mwikale ujimija lungenji, pa bwalu bukesese kampanda buvwa bwenzeke. Nenku patudi. . . patuvwa basangile pamwe apu, anu mêmè ne nsongaakaji wa citende awu, mu cibambalu kampanda, bwalu bintu bivwa ne cya kwambiibwa, bivwa ne, mvwa njingaku bwa ne twikalakù bônsò pamwe. Ki Bukênkè ebu kulwabu, Mwanjelo wa Mukalenge ewu, kulwa kudisangisha anu mwaba mene utuvwa awu, bileeja ne—ne Nzambi utu ushaala mukwate ku mulayi Wende.

⁸ Nenku makeelela awu, mwaba uvwa nsongaalume wa bidimu makumi abidi ne bibidi, wa mu famiye kampanda mumanya bîmpè, ùvwa mukwacike ne tuubutama, nenku tuubutama tumukwate. Nenku nwênù bantu bakulumpe nudi bamanye ne ncinyi ciine aci's, nangananga ku bantu balume. Ku bantu balume, ncya bushuwa ne disaamà adi ditu dyamba kubashipa. Kadi mwânà wa balume ewu, munda mwa matuku mulongolongo, matwe ku mbingu yibidi, ùkaavwa ne mubidi-kapya wa degre makumi anaayi ne citupa. Mpindyewu, s'nudi bamanye ne aci mmu ngiikadilu wa muntu uminyina mwab'awu. Ne bangangabuka paabo bakaavwa bamane kwenza mwabo paabo mwônsò mwa kwenza, ne ma-peneseliina ne bikwabo byônsò, bwa kupwekeshaku mubidi-kapya awu bwa disaamà dya kishì adi. Kadi kumwekabi anu bu ne kacivwa cifila cipeta to. Kadi mu kasunsa kamwepele cyanaana kumpala kwa Nzambi, kantu ne kantu kônsò kaa mubidi-kapya awu kuumukaku pambidi paa nsongaalume awu. Kujuukilaye

kuulu, muumvwe bîmpè. Nenku aci's cidi cileeja anu ne Mupersona wa mushinga n'Kilisto.

⁹ Ki bwa cinyi tudi kaaba aka, mu nzubu emu mu dinda emu, mbwa kukwacila Kilisto mudimu, mu dituku edi dya nsabatu.

¹⁰ Mwva anu mwindile cikondo cya dilwa mwaba ewu, bwa kudisangishaku ne mwaneetu wa balume wa mushinga mukole ewu, ne nwênù aba. Ntu mupetepete byadiikumi byenu bitu mwaneetu untumina, misangu yàbûngì, bya ku kaadisangisha kakese aka. Nenku mabanji a mushindu awu, ndi mêmè ngàngata bu mansantu ku buumùntù bwanyi mêmè mwine, bwalu ndi mumanye ne dîngà dituku nêndumbululè bwa kudibi biye kuumukila mwaba awu. Ne ncya bushuwa ne ndi muswe kwanyisha, ndi ngaanyisha bushuwa, ne ndi muswe kwambaku patooke disakidila dyanyi bwa lulamatu lunudi naalu nwênù aba, bwa—bwa meeji a cinudi benze aci, a dimanya dya ne byadiikumu binudi naabi. Ne panudi nudisangishila mu nzubu mushindu ewu, ne nansha nanku, baswe bwa ne kakese kiine kanudi nupeta aku, ku dyenu peenu dimanya dyônso, bwa kutwa naaku mudimu wa—wa bwambi nyama ku mikolo. Pashiishe, kuumukila apu, mêmè ngudi mwambule bujitu bwa cyôci aci. Ne ndi muswe kwikala mulami wa difweta mulenga bwa Mukalenge wetu, ne pângiikalà mwa kulumbulula mu Dituku adi, bwa bitwikala benze pa buloba.

¹¹ Mpindyewu, kadi cintu cimwepele, ncya ne lwà paanyima apa katwena tutamba kutacishiibwa bipitepite ne mutooyi wa mashinyi munjila to, ne ciine aci ncîmpè.

¹² Nenku mpindyewu, ndi ne lutatu lwa kumanya mwa kwamba eci, kadi mwva mwa kujingaku bwa twêtù kwenzela ditabuluja kumfundu eku, kutudi mwa kudyenza dya matuku mulongolongo. Bwalu, mushindu ewu, udi anu ubwela nunku wamba ne: “Beetwawee! Ndi ne disanka dya kutwilanganaku neenu's,” kadi wambaku ndambu wa mêyi bwa Mukalenge, kadi kuya cyakabidi. Ndi ne cya kwikala mu Tucson pa dîbà umwe ne citupa. Ne mushindu mwine udibi...Tudi tudisangisha anu cyanaana mwab'ewu mushindu awu, tulabulangana ku byanza, twamba ne: “Wetwawu! Ndi ne disanka bwa kwikala mutwilanganeku neebe,” kadi kuya.

¹³ Kadi nudi bamanye's, mêmè ndi ngeela meeji ku Dituku ditwatwilangana kadi katuyimu ne bya ne washaala bîmpè abi to. Katwakwamba ne: “Mbilenga be bwa kukumona. Ndi ntekemena ne neupinganeku cyakabidi.” Padibi ne, tudi bafwanyine kubala mwab'ewu pâmwâpa mêmè abidi a badisangishe. Kwôkò aku tudi mwa, tudi bafwanyine kusômba ne kuyiikila bidimu mùlîyô mujima, bu ne cintu bu cikondo cîcidi mwa kwikalaku, ne katwa—katwakwikala ne cikondo cishaadile ku citùvwâ naaci patwabangi kusômba apu to. Nwamonu anyi? Cidi anu Cyendeleele cyangatangane. Kacyena—

kacyena ne ndekeelu waci to. Kadi patudi twela meeji ku cikondo citwikala baye, mushindu awu, ne patwikala tukaadi twenda twendela mu tujila twa mpaladiizu munene wa Nzambi awu, ne Banjelo bimba miyenga.

¹⁴ Kadi—kadi mpindyewu ncikondo cidi cikengela bwa twêtù kwikala tu—tulwangana mvita, bwa kucimuna mvita ayi, ne kucimuna maalu a pa buloba.

¹⁵ Kadi Kwôkò aku, ee, kakwakwikalaku mvita to Kwôkò aku. Disambila dya ndekeelu nediikale dimane kwenjiibwa; kabyakukengela bwa kwikalabo benza kabidi masangisha a milombo to. Kakwakwikala kabidi kaaba bwa bantu kusungidiibwabo to. Kakwakikala mâsaamà a dyondopa to. Kadi neciikale anu cintu cimwepele cinene cya butumbi.

¹⁶ Nenku twêtù bu bantu, mu dinda emu, citudiku—citudiku bafwanyine kulaya ncinyi? Citudiku bafwanyine kutangidila cikwabo cintu ncinyi cidi cifwanyine kwikala cinene kutamba kwikala kutangila ku mulayi wa ciine cikondo aci? Nwamonu anyi?

¹⁷ Tudi twela meeji bwa...panwapa ndi ntangila mudi bikondo byenda bishintuluka, kuumuka ku bânà bakese baa ku mabeele basòmbesha pa bibelu bya baamamwâbò, too ne ku bânà bakese bàkaadi baya mu tulaasa, nsongaakayi ne nsongaalume ya bitende, ne pashiishe muntu mushindame, ne pashiishe wa mutambe kukulumpa. Nwamonu anyi? Nenku mwânà wa—wa balume uyààya mu kalaasa awu, cidimu cishaale yêyê uvwa pa bibelu bya mamwëndè, mwânà wa ku dibeele. Nwamonu anyi? Kadi nsonga awu's wâbwedi mu kalaasa anu cidimu cishaale eci, mudibi bimweka's. Nenku cipimu cya cishindame civwa mbunsonga. Ne pashiishe bukulumpe. Anu... Kaa! Nwamonu anyi? Mbyenze anu mudi dibungi dibuuka pa buloba kadi dijimina. Solomo wakamba, ngeela meeji ne mmuvwabi's: "Cidi bu cilòngò. Cidi cijuuka, ne pashiishe bacikosa, ne cifubidila." Kadi twêtù—kadi twêtù tudi baswe kubwelela pa dîbà ditucidi panwapa edi bu paa kudiila wa cyula.

¹⁸ Pa nanku mpindyewu twakulaayi Nende, mpindyewu, patudi twinyika mitu bwa disambila apa.

¹⁹ Nenku kwôkò mwa kwikala muntu kampana mwab'ewu udi muswe bwa kumuvulukabo mu disambila, cileejilu, bu mudi kwikala usaama, anyi kwikala ne dijinga kampana, bu wêwè anu mwa kucimanyisha kudi Nzambi munda mwa mwoyi webe, kwamba ne: "Mpindyewu, Mukalenge, nyewu ngaabwedi, bwa—bwa kulombaku mu dilomba edi." Ne bu wêwè anu, bwa mêmè kumanya, mu mushindu kampana, bu wêwè mwa kwelaku anu cyanza muulu, ne anu, nunku ewu, wamba ne: "Wamvulukaku." Mukalenge anubeneshe mu mushindu mubanjiike.

²⁰ Nzambi wa Bukole bwònsò, Wèwè wákafumba maulu ne buloba, ku Dîyì Dyebe awu, tudi badisangishe kaaba aka mu dinda emu bwa kwakula pa Dîyì edi, ne pa Munene awu Udi Dîyì.

²¹ Tudi tuKwela twasakidila bwa dyèsè edi dinene dya kwalukila mu ndekeelu wa cipeela emu. Mmwômò amu mwakakoka cipuka cidi cilakuka kapya ntema ya muprofeta munyeemakanyi. Ne mwômò amu mmwakatumiibwaye cyakabidi ne mudimu, ne kutumiibwaye, kushaalaye musungidi munene wa cisamba wa dituku adi, wa bumpyanyi bwa Nzambi bùvwà mu bupika abu. Éyì Nzambi munene, kwènàku mwa kuswa bwa Wèwè kulwa pamwe neetu mu ndekeelu wa cipeela emu ku dinda emu anyi? Bu mutudi bamanye, Wèwè utu mu tutedrale tunene, ne pa buloba bujima. Kadi bu mudibi ne Wèwè utu Nzambi wa kayi mikalu, ne kakwena mwaba wa mupitepite bukesa to, anyi ne, kakwena mwaba, anyi nansha bu twètù mwa kutangalakangana bîmpè bya bishi eku ne eku kwa buloba bujima, kadi Wèwè udi myaba yònsò, udi mwa kwikala myaba yònsò pa mèbà ònsò. Tudi tuKwela twasakidila bwa ciine eci.

²² Ne mu disangisha edi mu dinda edi, tudi tuKwela twasakidila bwa mwaneetu wa balume ewu ne—ne kasumbu kende kakese kaa mikooko kadi apa aka, ne bwa bukutu bwabo ne lulamatu ludibo naalu ku Bwalu bwa Nzambi pa buloba leelu wa Ndaaya ewu, ne tudi tulomba mabeneshu Ebe pambidi paabo. Ne swaku, bu mudiku mwoyi wa ujinga Kilisto, swaku kwikaleku misangu yònsò anu musanjeela mwaba kampanda bwa kufila, kutwadila mwoyi udi ne nzala awu Mukenji.

²³ Kabidi tudi tulomba, Taatù wa mu Dyulu, bwa dijinga dya bantu badi beele byanza muulu mpindyewu mene baba. Wèwè ngudi mumanye civwa citùtuka mwinshi mwa cyanza cyabo aci, ku nyungulukilu wa mwoyi wabo aku. Bavwa ne dijinga. Pìikalàci ndisaamà, Mukalenge (Wèwè Wákangata Paul Sharrit mwena bwalu butwáfumu ku dyamba anu mu mèbà makeke aa ewu, pavwaye mulaale pankaci paa lufu ne mwoyi, ne mubidiluuya wa mbabula uvwa maalu ònsò a mamanya a baaminganga kaâyikù mwa kwimanyika to, kadi kaadiyì anu kamwe cyanaana kakese kaa disambila kumba kiimanyika mubidi-luuya awu anu pa cibanza; Wèwè udi Yehowah Nzambi), leejàku ne Wèwè udi kabidi muleejiiibwe mpala bîmpè, ne kabidi mwikale mulelela leelu ewu, muneemu mu ndekeelu wa cipeela emu, anu mÛvwà mu matuku auvwa ne Mòsà mu ndekeelu mwa cipeela mwamwa.

²⁴ Tudi tuKwela twasakidila, bwalu ndi mumanye ne Wèwè neuteeleje disambila. Ne nyewu tulwa Kùdi ne kudipwekesha kwònsò ne meeji matooke ònsò, bamanye ne mbifwanyine kwikala bibi bwa kuKulomba bintu bitudi anu tudifwanyikijila cyanaana mu mitu yetu. Tudi baswe kwikala batwishiibwe anu menemene ne mwetu mwònsò, bwa citudi tulomba aci, tudi ne

cya kuciitabuuja, ne—ne—ne kumanya ne ndiswa dya Nzambi bwa kutupeeshaci, bwalu tudi bacikenkete munda mwa myoyi yetu, ne byônsò bitudi bamanye abi, Mukalenge.

²⁵ Pa nanku, ndi ndomba bwa Wêwè kwondopa mubeedi ne mubeedi yônsò udi kaaba aka mu dinda emu. Sungila muntu ne muntu yônsò udi mujimine. Enzaku nanku. Swaku bwa cintu kampanda cyambiibwe anyi cyenjiibwe leelu ewu, ciikalà mwa kwenza ne, mu mwaba udibo basômbe awu, anyi udibo biimanyine benda balonda bimanu awu, anyi nî mpenyi pônsò padici mwa kwikala apu, bwa diitabuuja dya Nzambi didi dylele lwongo adi dibwele munda mwa myoyi yabo nenku aci necikose bwalu, musangu umwe cyendelele. Enzaku nanku, Taatù.

²⁶ Beneshaku mwaneetu wa balume udi utushiile nzu bu bwa disangisha mwab'ewu awu.

²⁷ Mpindyewu akwilaaku neetu ku Dìyì Dyebe, bwalu bwa cyôci aci mbutudi tusanganyiibwa kaaba aka, Mukalenge. Tutu banange kwikala mu bwobumwe muntu ne mukwende, kadi nansha nanku utudi baswe ng'Wêwè, Mukalenge. Tudi mwa kupatuka kuya mwinshi mwa mici ne kusômbela panshi kadi kuyiikilangana muntu ne mukwende. Kadi, bwa kaaba aka, tudi badisangishe bwa kuKulengelela Wêwè. Kwênàku muswe bwa kudisangisha neetu mpindyewu anyi, Mukalenge? Nyewu tudi bashiye nkwaswa wa mwoyi wetu munda mutupu, bwa Wamona mwa kuteekiibwaa mu nkwaswa wa butumbi leelu ewu, bwa kwakula neetu, ne kutwambila pa bidi bitangila majinga atudi naawu, ne dinanga Dyebe dyediibwe patooke kutudi patudi twètù twela patooke dyetu dinanga bwebwe Wêwè apa. Tudi tulomba nunku mu Dìnà dya Yesu Kilisto. Amen.

²⁸ Kuntwaku, kwôkò muntu kampanda lwà munshänkùnyì mwamwa, ùjinga kusômbela panshi, nyewu mmona ndambu wa nkwaswa kaaba aka, bwa nwamona mwa kudisangisha, ne baswe kudyunvwaku bacyankame.

²⁹ Mpindyewu, bikondo bitudi ne mwoyi ebi mbikondo bilenga bya dikema. Nenku makeelela awu, pâmvwà ngeela meeji pa ne cîmvwàku mufwanyine kwamba leelu ncinganyi, bu mûmvwà mumanye ne mvwa mwindile ne mwoyi mujima dilwa dya kaaba aka edi, kadi cîmvwà mene mufwanyine kwamba ncinganyi's pâmvwà mwa kulwa, mu kaadisangisha kakese kaa milombo? Ki mêmè kulomba Mukalenge bwa kunkwacisha. Ki—ki mêmè kwangululaku tuntu ndambu tûndi mufunde pa Mufundu kampanda mwab'ewu, tûndi njinga kunwelelaku patooke mu dinda emu, patudi bindile mabeneshwa a Mukalenge apa.

³⁰ Nenku tudi tulomba mpindyewu ne nenuunzulule myoyi yenu ne nenûmvwèku kaadikookola nansha kaa kakese menemene, ne katambe kupeepela kaa Kilisto ku mwoyi aku. Wavuluka ne, wêwè, pawikala kuyi mwena kwitabuuja to, ne kacya kuyiku mwanji kwitaba Kilisto to, eci neciikale cintu

cya citambe bunene cya kacya kaciyi cyanji kukwenzekelaku to, patudi badisangishe mu nzubu ewu mu dinda edi apa, mu mushindu wa ne paalwa dikookola adi ku mwoyi webe, bu wêwè mwa kudiitaba, didi nciibi cya ku Mwoyi. Kucibenga ndufu. Nenku ki bwa cinyi tudi kaaba aka mu dinda emu, mbwa kukuleeja ne kudi ciibi cyunzulula bwa mwena kwitabuuja yônsò udi mwa kwitabuuja awu.

³¹ Mpindyewu ndi muswe kubala mu Mukanda wa Bwakabuulwibwa bwa Yesu Kilisto, nshapita wa 15. Ndi muswe kubala citupa, mvensa yinaayi ya mbangilu ya nshapita wa 15 wa Mukanda wa Bwakabuulwibwa:

Nenku nâkamòna cimanyinu cikiwabo mu dyulu, cinene ne cya cikemesha: banjelo mwandamutekete biikàle ne . . . bipupu mwandamutekete bya ndekeelu, bwalu mu byôbì abi ki mùdì muujiibwe tente ne ciiji cikole cya Nzambi.

Nenku nâkamòna byenze bu ne civwa mmbû wa lumwenu musambakaja ne kapyà, ne aba bààkapetâ bucimunyi pa nyama wa lwonji abu, ne pa cimfwanyi cyende, ne pa cimanyinu cyende, ne pa nomba wa dîna dyende, biimane pa mbû wa lumwenu awu, biikale ne . . . nzenze ya Nzambi.

Ne bavwa bimba musambu wa Môsà musadidi wa Nzambi, ne musambu wa Mwânâ wa mukooko, bamba ne: Byenzedi byebe bbinene ne bya bikemesha, Mukalenge Nzambi wa Bukole bwônsò; yebe njila mmyakane ne milelela, wêwè Mfumu wa bansantu.

Wabenga kukuciina wêwè ki nganyi, Éyì Mukalenge, ne kutumbisha dîna dyebe? bwalu wêwè nkaayeebe ngudi wa cijila, ne matunga ônsò nealwe ne neakuukwile kumpala kwebe wêwè, bwalu dyebe dilumbulwisha dyâmwèneshiibu.

³² Nenku bu Mukalenge mwa kwanyisha, ndi muswe kwangacila cyena-bwalu ku cyôci aci, bwa kuciinyika dîna ne dituku-dya-B, *Ditûkû Dyâ Bucimunyi*, mutûdi tuleeja cyôci aci mu cimfwanyi ne, bucimunyi mu kaabujima.

³³ Bantu aba, bàdì mu nshapita utudi . . . utwâfûmu ku dibala ewu, bacivwa bafuminaku ku dipeta bucimunyi. Ngeela meeji ne mwaku *bucimunyi* mmwaku munene mu mwakulu wa Anglais. Ûdi umvwiya ne wêwè udi—udi mucimune mwena lukuna, ne watambi bukole, ne udi cilobo cyambule bucimunyi. Ne tutu twimba misambu ne twela mbila ya disanka mu bucimunyi. Nenku mwab'ewu tudi tusangana ne kuvwa cintu kampana, bantu aba bavwa bafike ku mbû wa lumwenu ewu, musambakaja ne kapyà. Ne bavwa bapete bucimunyi pa nyama wa lwonji, pa cimfwanyi cyende, pa cimanyinu, ne dileeta dya dîna dyende. Bintu byônsò ebi, bôbô bavwa bapete bucimunyi

pa byôbì, nenku bavwa bilobo biimane dyamwamwa, pa mbû wa lumwenu musambakaja ne kapya, bimbila Nzambi wa Bukole bwônsò misambu ya butumbi.

³⁴ Mpindyewu, bwa kwakula bwa bucimunyi ne bwa matuku-a-B, ne bikwabo, bidi bitwaluja ku meeji a mvita, patudi tutuma meeji ku dituku-dya-B. Bwalu, anu abidi adi panshi aa, mu bidimu bikese byâshâadi ebi, tuvwa bafike ku dituku didi—di—ditudi biinyike dînà ne ndituku-dya-B, dya mvita, divwabo bapete bucimunyi pa mwena lukuna. Ne byôbì biine bidi byenza bibi be patudi tukwelela meeji apa, kadi buloba's butu bubolesha ne mashi a bantu kacya anu ku mashi a mwakane Abele.

³⁵ Mashi a muntu a nzànzànzà àkalengà buloba àvwa ngàà mwakane Abele. Ne yêyè mwine, cyàkenzà ne afike ku dyela mashi ende panshi, mbwalu ùvwa mululame kumpala kwa Nzambi. Ne Nzambi wakiitaba difuta dyende—dyende dya cibawu divwaye mufile, divwaye mulambule Nzambi ku diitabuuja, mwânà wa mukooko ewu.

³⁶ Ki mwanaabo wa balume wa mukawu, mumuumvwile mukawu, kushipaye mwakane Abele awu. Nenku kabingila kamwekamwe aku, misangu kanà yônsò, nkakebekebe dyela dyônsò dya mashi a bantu panshi pa buloba apa. Ne buloba bwa kale ebu ncyà bushuwa ne mbubolesha kudiwu, a buloba bujima, mashi a bantu. Twêtù. . . Kudi kabingila mu bwalu abu. Kudi kabingila kampanda kavwabo bafwanyine kucyenzela, bwa ne mashi a bantu aa ediibwe panshi. Kadi tudi tusangana ne kabingila kaa kumpala kavwa mbwa mukawu, bivwa—bivwa ne Kaayina uvwa muumvwile Abele mukawu bwalu Nzambi wakiitaba mulambu wa Abele. Nenku Ebelu 11 udi utwambile ne—ne—ne: “Abele wakalambula Nzambi mulambu mwîmpè mutambe wa Kaayina, ne Nzambi uwufidila bujaadiki.” Nenku Kaayina, mu bushuwa bwa bwalu, muumvwile ciine eci mukawu, bwalu wende mulambu wakabengiibwa, kadi wa Abele wakiitabiibwa. Kadi Abele wakenza cyôci eci ku diitabuuja. Bible mmwambe, ne yêyè wakenza cyôci eci “ku diitabuuja.”

³⁷ Pa kumona ne—ne, bânà baa balume babidi aba bakeba bwa kulengeleela Nzambi, bwa kwalukilabo, bwalu bavwa bamanye ne bacivwa anu bapatukilaku mu budimi bwa Mwoyi. Nenku bavwa badishinde, badishindile luseke lukwabo, ku dishipa dya mukenji dya baledi baabo, ki civwa cibavwije ku bukookeshi bwa lufu; anu mutudi tusanganyibwa twêtù bônsò aba, mu dinda emu, ku bukookeshi bwa lufu. Nenku bavwa baswe kumanya ne mmushindu kaayi uvwabo mwa kwalukila mu mwaba awu wùvwàbo bafwanyine kupetulula Mwoyi. Nenku, mu kwenza kwa nanku, bavwa—bavwa bateeta bwa kupetaku mushindu wa kulengeleela Nzambi.

38 Ki Kaayina kulambulaye mulambu mulenga kwìsù wa bilóngò ne mamuma a mu budimi, anyi cyònsò civwàku cyakateekaye pa cyoshelu aci.

39 Kadi Abele yêyè, ku dibuulula dya nyuma, baakamubuulwila ne kacivwa mamuma a mu budimi avwa makebe lufu nansha. “Mashi ngavwa makebe lufu.” Pa nanku, yêyè wakaaluja mashi a mupinganyi uvwa kàyi mwenze bubu to bu mulambu, nenku Nzambi wakaciitaba. Nenku aci cyakalwa difuta dya cibawu dya Nzambi bwa mpekaatu yetu, kacya anu ku diine dituku adi. Kakuyi mûnga mushindu to, bwalu bu Yêyè anu mwitabile pa bishimikidi bikwabo, nunku bivwa mwa kukengela bwa twètù kulwila ku bishimikidi abi, bwa kwikala, bwa kulengeleela Nzambi. Kadi Nzambi wakiitaba anu mashi avwa kaàyi menze bubu a ewu uvwa kayi mwenze bubu. Nwamonu anyi?

40 Nenku ki bwa cinyi, bu ne bulenga bwa kwìsù ne myaba ya minene bifwanyine kwikala dyanyisha dya Nzambi, nunku leelu ewu’s tuvwa bafwanyine. . . Nunku tuvwa bafwanyine kwikala badikonke ne: “Yêyè mmufwanyineku kwalukila mu ndekeelu wa cipeela, ku kazùbù kakese kadi kasanganyiibwa apa kumpenga kwa njila wa njanja aka anyi? Yêyè mmufwanyineku kwalukila mwab’ewu bwa kutwilangana neetu anyi?” Kadi bu ne civwa nkatedrale kaa kanene, anyi bulenga bwa kwìsù bùvwà—bùvwà Kaayina mulambule abu, mona’s, nunku’s tuvwa kusangana anu ne tudi bafwanyine kwikala tukaadi tudyakwila anu twètù nkaayeetu, ne twakula ne lupeepele.

41 Kadi Nzambi wakalwila ku bishimikidi bya mashi meela panshi. Pa nanku, nansha bishi, leelu ewu, nansha twètù biikale baa bakese baa bishi, nansha biikale bapele baa mushindu kaayi, anyi nansha twètù bafwanyine kujinga kwikala bishi, kulambula Nzambi mwaba wa mutambe bunene, kadi Nzambi kavwa mufwanyine kuwitaba, kupita mùdiYe mwa kuwitaba mpindyewu to, bwalu tudi tulwila ku bishimikidi bya Mashi meela panshi a Mupinganyi udi kayi mwenze bubu, ùdi mwikale Kilisto utufwila twètù bangènzàmpèkààtù.

42 Mpindyewu, kabingila kadi kenze ne Mashi aa akeediibwa panshi, mbwalu, ngeela meeji, muntu mmuswe. . . Nzambi udi ubiikila muntu bwa atangile, kadi muntu yêyè mmuswe bwa—bwa kudileeja yêyè mwine. Muntu mmuswe kutangila cidu Nzambi uteeta bwa kumuleeja, ku bishimikidi bya wende—wende mmwenenu sungasunga wa cyòci aci. Nwamonu anyi? Nzambi udi uteeta bwa kuleeja muntu cintu kampanda, kadi muntu yêyè mmuswe kuciitabila pa ciduye. . . ku mushindu udiye yêyè ucitangidila awu.

43 Kadi cidu anu bu mudi muntu kana yònsò ewu muswe kuleeja dinaya mu cyalu. Bidi bikengela kwikala kabingila kadiye uleejila diine dinaya edi. Kudi. . . Wêwè mwambe ne: “Tangila ku mukuna kwaka,” mpindyewu kudi cintu kampanda kuntwaku

cidi cikoka ntema yebe, cyûdi uteeta kundomba bwa mêmè kutangila ku mukuna aku. Wamonu anyi? Anyi ne: “Tangila mucu ewu,” nwamonu’s, kudi cintu kampanda ku mucu aku cyûdi muswe bwa mêmè kumona.

⁴⁴ Mpindyewu, Nzambi udi uteeta bwa kufikisha muntu bwa kutangila Mupinganyi wûdi kawuyi mwenze bubi awu bwa njila wa dyalukila. Kadi muntu mmuswe kucitangila mu wende mushindu yêyè. Kî mmuswe kumona cidi Nzambi uteeta kumuleeja to, mu Mupinganyi wûdi kawuyi mwenze bubi ewu. Ki bwa cinyi, cidi cikebe lutatu ncyôci aci. Pa dîbà adi, padi muntu wenza, mu ngaakwilù mukwabo, wangata tulondo, bwa kumonaye mu ntanta mule, bwa kumonaye cidi Nzambi uteeta kumuleeja aci, yêyè udi upangila bwa kujaalamija dimona dya tulondo twende atu mu dyôdi.

⁴⁵ Mwab’ewu mu njila emu, anu abidi adi panshi aa, mfuma ku lwendu lwa ku mikuna, muntu kampanda kwamba ne: “Mona, angata tulondo etu utangile lwà *apa* cintu kampanda.” Ee, mêmè kwangata tulondo atu. Mêmè kumona bintu bisatu anyi binaayi bishiilangane. Mpindyewu, nudi numona’s, mêmè kumanya ne kuvwa cintu cipampalamuke muntwamu. Nwamonu anyi? Mpindyewu, ngulungu udi mwimane mu budimi ewu, bivwa bimweke anu bu ne yivwa yisatu anyi yinaayi miimane pamwe. Mpindyewu, bwalu buvwa ne, ngulungu awu uvwa menemene anu ngulungu umwepele. Tulondo atu tuvwa anu twîmpè. Kadi civwà cikèngelà mêmè kwenza, civwa nkukoka ntanta wa dimwena awu too ne pâmvwà mvwija ngulungu yônsò yisatu ayi yishaala ngulungu umwepele, nyivwija ngulungu umwepele. Nwamonu anyi? Nenku pa dîbà adi awu. . . Nwamonu’s, paanyima paanyi, mêmè kumanya ne pavwa. . . bivwa bikengela ciikale ngulungu umwepele, bwalu ki civwabo bangambile. Kadi bwa kwangata tulondo ne kutangidilamu, mvwa mumone, twâmbè ne, ngulungu yisatu miimane mwaba awu. Ee, tulondo katuvwa mu ntanta watu to. Bikengela mêmè—mêmè kwakaja ntanta wa tulondo awu ne kumuseemeja paanyima, too ne pândi mmufikisha kaaba kaa mêmè mmona ngulungu umwepele. Ne pa dîbà adi tulondo tudi tumuseemeja pabwîpi naanyi mu mushindu mukumbane too ne pândi mwa kumona mmwenekelu wende.

⁴⁶ Mpindyewu, Nzambi udi utupeesha Bible. Mpindyewu, Bible n’Diyi, ne Diyi n’Nzambi. Pa nanku, ki twetu tulondo twa mèsù abidi ntwôtò atu. Ki twetu tulondo ntwôtò atu. Kadi, pa dîbà adi, patukaadi tuya katangila mu Bible, ne tumona mishindu yinaayi anyi yitaanu mishiilangane, ee, bidi bikengela kujaalamija ntanta wa dimwena, nudi numona’s. Nenku bidi bikengela twêtù—twêtù kufikisha cintu aci mu mwaba wa tumona kiipacila kaa kakayi tuseku kaa Nzambi aku.

⁴⁷ Kadi muntu yêyè mmuswe kujuula bulongolodi, kunyeema kuya mu *nunku* ewu. Ne mukwabo pende mmuswe ne: “Ee,

mêmè ncyêna . . . ndi ngeela meeji ne ndi mwa kwikala muntu munene mumutambe yêyè, nenku mêmè nêmbangilè *apa*. Twêtù netulongeshe beetu bânà bîmpè bipite apu, ne netwènzè *cikampanda* ne bikwabo.” Nwamonu anyi? Badi bapangila kujaalamija ntanta wa dimwena wa tulondo atu. Nzambi mmuswe bwa bôbò kumona cintu cimwepele, ne ciine aci ki Mashî adi kaâyî menze bubî âkeedibwâ panshi bwa mpekaatu yabo awu. Ncya bushuwa. Cintu cilelela ncyôci aci, nansha bishi. Katwena dijinga ne bulongolodi to. Ncyêna naawu cilumbu to, anu bwalu adi . . . dinyangakaja dya maalu didiwu ôwò enza, adi apambula bantu ne atapulula bwânà bwetu ne bikwabo.

⁴⁸ Kadi dijinga dimwepele ditudi naadi ndya kutangila cintu cimwe, m’Mupinganyi wetu. Ncya bushuwa. Ne mwine Mupinganyi awu n’Yêsu Kilisto.

⁴⁹ Ne pashiishe leelu ewu nudi numona mutudi bakònyangaja mu malongolodi. Ne bôbò badi bamba ne: “Ba-Méthodistes badi benza ditabuluja. Mu bushuwa bwa bwalu, kî mbwena kwamba ne mba-Baptistes to. Mba-Méthodistes. Ne *baakampanda* badi benza ditabuluja, ne bikwabo.” Ne badi—badi basaka muntu mukwabo pambelu, dibâ dyônsò. Kadi twêtù katwena baswe kucimona mushindu awu nansha.

⁵⁰ Tudi baswe kutungunuka anu ne kujaalamija ntanta wa tulondo awu too ne patwasangana ne kudi Nzambi umwepele. Panudi nubamona basatu muntwamu, bidi bikengela bwa nwênù kutamba kujaalamijaku ntanta wa tulondo atu bilenga ndambu. Nwamonu anyi? Nudi—nudi numona cintu kampanda bibi. Pa nanku bivwa mwa kwikala bîmpè bu nwênù mwa kucibweja, ne kujandula ne kudi Nzambi umwepele kumutu kwetu twêtù bônsò, ne Yêyè awu ngudi Nzambi wa bukwabantu.

⁵¹ Nenku piikalabi ne Yêyè ngudi Nzambi, cya bushuwa, Yêyè udi utuma ntema kudi muntu yônsò, bwalu mbufuki Bwende. Ne Yêyè udi utuma ntema kudi bânà. Yêyè udi utuma ntema ku bukulakaji ne ku bunsonga. Yêyè udi utuma ntema ku mee—meekala etu, kudi batooke, bafiikuluke, bafiike, baa—baa kalaabi, mmwenekelu mishiileshiilangane ya makoba etu bilondeshile ditunga ditudi bafumine bibangile ku nkambwa wetu. Yêyè udi utuma ntema kutudi twêtù bônsò. Yêyè katu utuma ntema anu kudi beena Yuda, bôbò nkaayaabo to, anyi ku—anyi ku cisa cya kalaabi, cisa cya bafiike, cisa cya batooke, anyi cinyi to.

⁵² Yêyè udi utuma ntema kudi bukwabantu bwônsò, ne uteeta bwa kufikisha bukwabantu ku ditwishila mèsù pa Dîyi Dyende bwa cintu cimwepele, ne kwamba ne: “Kudi Nzambi umwepele, ne mwine Nzambi awu mmufile Mupinganyi udi kayi mwenze bubî to, pa kulwa; kushaala, Yêyè mwine, Muntu, bwa kuumusha mpekaatu, bwa kusungila bukwabantu bwônsò.” Muprofeta Yone kadi ki wâkacifwânyikija bilenga bya kacya’s: “Monaayi

Mwânà wa mukooko wa Nzambi, udi umusha mpekaatu wa baa pa buloba,” wa nì nganyi yònsò. Cilumbu cya mpekaatu cyònsò nkòòng neikoshiibwe anu mwaba awu mu Mupinganyi udi kayi mwenze bubi awu.

⁵³ Kadi padi muntu ubanga kukwata tulondo twa mèsù abidi twa Nzambi mwab’ewu, ùdi—ùdi ubanga. . . Ùdi utamba kutangila ku bintu búngì cyanaana bya mu bufuki, mu mushindu wa ùpanga kumona ngangàcilù wa mu nyuma udi Dìyi difila.

⁵⁴ Mpindyewu, nwamonu’s, ki cimwe cya ku bintu binene bidi muntu wenza padiye uteeta kutangila, bwalu yèyè udi utangila mwàkatàngidilà Kaayina mu tulondo atu. Yèyè wakatangila ku—ku cyenzedi cya bulobo cyende yèyè mwine. Kaayina wakadyambidila ne: “Mpindyewu, bu mèmè anu mwa kuumusha Abele mu njila, pa dîbà adi’s ndi nshaala nkaayaanyi. Nenku, wamonu’s, mwaba awu, mukwabo muntu awu’s mmumushiibwe mu njila.” Ki cidì muntu muteeteteete bwa kwenza ncyòcì aci, munda mwa bidimu byònsò emu, nkukeba bwa kuumusha mukwende mu njila.

⁵⁵ Paabi’s, bivwa bikengela bwa kubweja muntu mukwabo awu mu njila pamwe nende, ne—ne kwikala mwanaabo, nwamonu’s, pamutu paa kuteeta kwamba ne: “Kya, kasumbu kakese kaka, kwanji anu kubayoobesha. Ne aka kadi *apa* nunku aka, kaa, ee, badi *bikampanda*, anyi *bikansanga*.” Nwamonu anyi? Kabivwa bikengela twètù kwenza nanku awu to. Bivwa bikengela kwikala tuteeta kufikisha cintu cyònsò mu kaabujima mu cimfwanyi cimwepele—cimwepele cishindame, ne ciine aci ki Yesu Kilisto.

⁵⁶ Nsongaakaji kampanda wa citende, makeelela diloolo awu, mu muyiiki wa babidi, kwambaye ne. . . Kadi kwambaye ne. . . Mwânà wa bakaji wa mwambi kampanda uvwa mupete kaabwalu kakese kaa mananga, nenku—nenku kujimijaye too ne lungenyi bwa bwalu abu. Kupetaye, mutu mumunyuguluke. Nsongaakaji mulenga kwîsù wa dikema, wa bidimu bitwe ku makumi abidi ne bisatu.

⁵⁷ Kadi pacivwaye mwânà mutekete, wa bidimu bitwe ku dikumi ne bibidi, ùvwa usanganyibwa mu Chicago. Muntu yèyè musòmbe mu disangisha. . . Anyi, Elgin, ki mùvwaye. Nenku yèyè musòmbe mu disangisha, Nyuma Mwîmpè kupatuka munkaci mwa bateeleji amu ne kumubiikila, kwamba ne nkampanda, ne kwamba ne: “Wèwè udi ne dîsaama dya dîkùmà. Ngangabuka udi wamba ne kwèna mwa kwikala ne mwoyi kufikila ku bidimu dikumi ne bitaanu to. Kadi, EMU MMUDI MUKALENGÈ WAMBA, wondopiibu.” Nenku kaakumvwa nansha—kaakumvwaku nansha mene dîsaamà dya mwoyi to, kubangila anu piine apu.

⁵⁸ Kadi makeelela diloolo awu ùvwa ne dîsaamà dya mwoyi dya mushindu mukwabo. Divwa ndîsaamà dya mwoyi dya nyuma. Munanga wende mmunyeeme lubilu mukasele mukaji kampanda

wa cyanaana. Kadi, nansha nanku, yêyè ucivwa anu mu dinanga. Ne nsongaalume ewu wamba ne, nansha nanku, ùvwa anu nende mu dinanga, kadi “tatwëndè ngudi mwenzeje bwalu abu awu.”

⁵⁹ Mêmè kwamba ne: “Kaa, lukutukutu’s. Kabivwa bikengela yêyè kusela nsongaakaji mukwabo awu to. Mmucyènzè bwalu kavwa ne dinanga dya mushindu mujaalame bwebe wêwè to.” Aci mmwômò.

⁶⁰ Kadi, nwamonu’s, mudiswikakaja yêyè yònsò mu cyôci aci, nsongaakaji awu uvwa musòmbè mwab’awu mukobame mu—mu mushindu wa dikema, byenze anu bu cinyi. Ki kwambaye ne: “Kaa, ndi mumanye ne Johnny mmunange. Mêmè ndi mumanye.” Nwamonu anyi? Ki cyònsò civwaye pende mwa kumona ncyôci aci. Ùvwa musòmbèle mu bwèndè buloba bukesè, bwa nkaayende, bukaavwaye mudyènzèle yêyè mwine muntwamu.

⁶¹ Ki mêmè kumukwata ku cyanza. Mêmè kwamba ne: “Anji kunteelejaku.” Ki Mukalenge kundeejaYe cikeena-kumona, nudi numona’s, cya cintu civwaye mumanye ne mêmè ncivwa mumanyeku to, cintu kampanda civwà cyenzeke, kaabwalu kampanda kaa babidi kavwabo benze munkaci mwabo. Nenku abu bwalu mbwenze anu bwambiibwa anyi, ki kumupapulaci anu pakalakaa. Mêmè kwamba ne: “Mpindyewu, paucidi pambelu paa bwalu abu apu, tangila ku Kalvariyo. Mwab’awu, wêwè upatuka mwab’ewu ne ukaadi mubange ne kuteeta kunwa maala, peebe mwânà wa mwambi, mwânà wa bakaji wa mwambi wa beena Mpenta, kadi wenza bintu byûdi wenza ebi, uteeta bwa kupwa mwoyi tunyinyinganya atu; muntu awu, ne mwikàle muntu udi kayi ucyuka cishondo cidiye mwa kutuuta bwa bwalu bwebe to.” Mêmè kwamba ne: “Tangija mèsù ku Kalvariyo kwaka, wêwè nsongaakaji. Ki njila umwepele wa dyalukila nyêyè awu.”

⁶² Bidi bikengela bwa twètù biine kudijaalamijila dimona dya tulondo, mu mushindu wa ne, nansha twètù mwa kwikala ne mwoyi anyi mwa kufwa, kupweka ne mâyi anyi kufwa mu mâyi, cidi ne bwalu n’Kalvariyo, Kilisto. Ku cintu aci ki kudi Nzambi muswe bwa twètù kwalukila.

⁶³ Nenku bantu, mu dijalamija dya dimona dya Diyì dya Nzambi, pamutu paa kuDiteeka kaaba kamwe ne kuDifikisha ku dyamba cintu cimwe cidi Nzambi uDifikisha ku dyamba, twètù tudi tutangila ku luseke lwa mubidi. Ki bwa cinyi, cidi—cidi, padi muntu wenza nanku awu apu, ùdi ùkadibweja mu mwaba udiye anu ulonda cintu cidibo bamuteekela kumpala aci. “S’ki mpunga nyèyè ewu utudi twètù, kasumbu kakese, tudi mwa kwenza *cikampanda*, ne tudi mwa. . . Katwakwikala bwalu ne bakwabo abu to.” Nenku—nenku aci, nwamonu’s, ki cintu cya kumpala cidi citeekiibwa kumpala ncyôci aci; pamutu paa kujalamija dimona, bwa kumanya ne dinangangana dya

bwânà bwetu ki divwa dikengela twêtù kwikala naadi muntu ne mukwende, ne—ne kumvwilangana muntu ne mukwende, ne kunangangana muntu ne mukwende, ne kukuukwila pamwe muntu ne mukwende. Bôbò badi bapwekesha muntu milongo bwalu bwa bilâmbâ bidiye muvwale, anyi—anyi bwa tulaasa tudiye mulonge, anyi bwa diikala dya dikoba dyende, anyi—anyi bwa cintu kampanda cya mushindu awu. Anyi cyende. . . Nenku aci, ki bwa cinyi, cidi citapulula bantu, ne muntu umba ulonda ciine aci.

⁶⁴ Kacyena cipeeshaku muntu wa munda awu mpunga wa kukwataye mudimu to. Mpindyewu, tudi—tudi muntu wa bitupa bisatu: musuuka, mubidi, ne nyuma. Mpindyewu, kadi padi meeji a mubidi. . . Makole abidi a nyuma adi akwata mudimu munda mwebe awu adi mmeeji ebe ne nyuma webe—webe. Nwamonu anyi? Mpindyewu, meeji a mubidi, àdi mavwijiibwe a kapelu mu mushindu mutumbuke awu, neateete kukumbaja cintu kampanda ku lungenyi lwende. Nwamonu anyi? Nenku padiye wenza aci, anu piine padiye wenza nanku apu, ùdi udyela yêyè mwine ku luseke umuka ku muntu wa nyuma udi munda mwende awu. Nenku mwab’awu cidi citwala lutatu, mwab’awu mene, nwamonu’s, yêyè udi uteeta bwa kudyzenzelaci mu yêyè mwine.

⁶⁵ Bu mûmvwà ngaakula kaaba aka, abidi adi panshi aa, ngeela meeji kuvwa nku tabernacle, ne: “Nzambi mmunene menemene mu mushindu wa ne, Ûdi mwa kulwa mupwekele menemene.”

⁶⁶ Mpindyewu, nwamonu’s, twêtù patudi tulwa banene, katwena mwa kulwa bapwekele to. Nwamonu anyi? Twêtù, tudi bamanye bipitepite. Ne tukaadi—tukaadi bakafike ku ne: “Kaa, bikengela ciikale anu mushindu *kampanda*, mushindu utudi twêtù tuCyamba awu, cyanaana kaCyena nanku to, nansha kakese.” Nwamonu anyi? Ee, mushindu awu, tudi tupangila Nzambi.

⁶⁷ Kadi bu ne muntu uvwaku mufwanyine, muntu munene’s, mufwanyine anu kwikala utamba kulwa munene, ne mutungunuke anu ne kutamba kulwa munene, cidiye mufwanyine kwenza ncinyi? Mmufwanyine anu kwalukila cyakabidi buludi ku dilwa mutambe kudipwekesha, ne mutambe kupwekela, mu mushindu wa bantu bamwendela ne pambidi kabayi bamanye to, nwamonu’s, muntu munene udi munkaci mwabo awu.

⁶⁸ Anu cintu cimwecimwe citudi twenza’s. Twêtù—twêtù tudi tupima électron, tusunsulula atome, ne tutuma mukenji ku—ku ngondo, ne twendela mu mashinda etu a patupu aa atudi katuyi bamanyepu cintu nansha cimwe. Ncya bushuwa. Kaacilôngò kaa kakese aka, muntu nansha umwe kênàku mwa kuumvwija anyi kupeta mwoyi udi musokomene mu kaadimiinu kakese kadi kwinsi mu buloba aku, bwa kupatula cilôngò cidimu cidi

cilondà to. Kabeji kaa cyanaana kaa dishinda aka, beena maalu a mamanya bõnsò baa pa buloba aba kabeenaku mwa kwenza kaalutonga keetu kamwepele kaa dishinda aka, kabeji nansha kamwe to. Nwamonu anyi? Kanwena mwa kukenzaku to, bwalu nkalame mwoyi. Nenku ki bwa cinyi, nwamonu's, twètù . . .

⁶⁹ Bakaadi bambambe ne: “Bakutakane batu bendela ne bisabaata bya misonso muntaku mwaba udi Banjelo baciina mwa kudyata.” Nenku aci's ncilelela menemene. Tutu twendela pa bintu bya bipwekele. Tutu twendela Nzambi pambidi.

⁷⁰ Tudi twendela pa—pa kaamuci kaa orchidée, twenda tukeba cilòngò cya marguerite. Mpindyewu, ki mudici nanku awu, nwamonu's, twendela pa kaamuci kaa orchidée. Kadi bu twètù anu mwa kudivwija bapwekele, kupweka panshi. Muntu nansha umwe kavwaku mene nansha mufwanyine kutangila . . .

⁷¹ Mwonji wa mvinyo udi pambelu pààpa wawa, ncinyi aci? Nzambi. Ncinyi aci? Mbutu bwa volcan, bwikale ne mwoyi munda mwabu. Kudimuka, tangila ku luseke, kudi mucu wa bukole mwimaneku, mucu wa cilòmbàlòmbà, ngeela meeji. Ncinyi aci? S'mbutu bwa volcan, bwikale ne mwoyi wa mushindu mushiilangane munda mwabu. *Ewu* mushindu wa mwoyi, mwenze—mwenze mucu. *Wawa* mushindu wa mwoyi, mwenze mwonji wa mvinyo. Nwamonu anyi?

⁷² Kadi twètù citudi ncinyi? Butu bwa volcan, bwikale ne mwoyi munda mwabu. Cidi citwènzè citudi eci ncinyi? Twètù's tuvwa anu bafwanyine kwikala katuyi ne mushinga mupite byòbì abi, kadi Nzambi mmuteeke Mwoyi wa Cyendelelele munda mwetu, ne pa dîbà adi tudi bashaale bantu badi ku bukookeshi bwa Nzambi. Pa dîbà adi, tudi—tudi tutangila, tujaalamija dimona dya Dîyi kudi Nzambi pa dîbà adi.

⁷³ Kadi muntu katuku upeesha muntu wa munda awu mpunga wa kuumvwija cidi cijaalame to, bwa bwalu abu cyòcì aci ncidi cifila lutatu. Tangilaayi. Tudi tusangana ne, yèyè kayi ucyenza to, pa dîbà cidi cyènzekà ncinyi? Tudi tusangana ne cilunji cyende cya cijji, anu muvwa cya Kaayina amu, cyàkabànda, nwamonu's, ne lukasa lwònsò. Yèyè wakakwacika mukawu. Kavwa muswe bwa Nzambi, bwa kulambula wende, bwa kwitabaye wa Kaayina . . . mulambu wa Abele pamutu paa wende yèyè to. Ûvwa muswe kuya pende. Ûvwa muswe wende mulambu wa sungasunga. Ûvwa muswe wende njila wa sungasunga, nwamonu's, pamutu paa kuvwila kudi Abele, ne kwamba ne: “Kaa, mwaneetu wanyi, ndi ne disanka dyàbùngì mùdì Nzambi mwitabe. Mpindyewu nyawu twàpeci njila, kutwamanyinyi ne Yehowah udi witaba njila ewu, bwalu Yèyè wàcijaadikì pa kwakidila webe mulambu awu.” Aci kî ncivwa cifwanyineku kwikala cintu cimpè cya—cya kwenza anyi? Kadi pamutu paa cyòcì aci, yèyè wakakwacika mukawu.

⁷⁴ Mpindyewu, kanwenaayiku numona cintu cimwecimwe aci mu bantu leelu ewu anyi? [Disangisha didi dyamba ne: “Amen.”—Muf.] Nwamonu anyi? Ki cidi anu wende njila ncyôci aci, nwamonu’s, mpindyewu, pamutu paa kwitaba njila udi Nzambi uleeja ne ki Bulelela awu.

⁷⁵ Mushindu udi Nzambi Yêyê mwine ubwela mu dinaya awu, wamba ne: “*Cintu* ki cyôci eci. Bimanyinu ebi nebifile badi biitabuuja. Mêmè nêngiikalè neenu, munda mwenu mene. Katanci kakese aka, baa pa buloba kabaakuMmona kabidi to; kadi nwênù nenuMmone, bwalu Nêngiikalè neenu, munda mwenu mene.” Nwamonu’s, baa pa buloba, nwênù. . . “Baa pa buloba kabaakuMmonato, anu nwênù.” Nwamonu’s, “Kaayina kaakuMmonaku to, anu wêwê, Abele.” Nudi numona anyi? Bwalu, cidi—cidi ncintu cimwecimwe aci.

⁷⁶ Kadi pamutu paa kulwa kwamba ne: “Ee, bilenga be, tudi tumona Nzambi munkaci mwa bantu, ukwata mudimu, twêtù twênzàayi aci,” to, mukalenge, mwikale ne twitabaayi, cintu cimwecimwe aci, ne lukuka’s we, eyo, ne mukawu, cintu cimwecimwe civwa naaci Kaayina aci, yêyê udi ulomba mashi a mwanaabo wa balume. Udi yêyê uteeta bwa kujimija mukono wende mu njila, kuumumusha. “Bôbò’s badi anu musumbà wa bansantu babunguluki baa mu malaba aba. Bôbò biine’s mbakese.” Nwamonu anyi? Nwênù’s nudi anu bamanye cîndî njinga kwamba aci. Ki citu cijuula ndululu ncyôci aci. Ki mwaba ngwôwò awu utu ndululu yijuukila. Ki mwaba ngwôwò awu utu micipu yifwila. Ki mwaba ngwôwò awu utu bwobumwe bûkaavwà budyanjile kufwa abu bukosolokela. Ki cintu ncyôci aci cidi cishipa mèkù’s. Ki cintu citù citwàdijà ku—ku dikafikisha maalu enda aya too ne ku dishipa dya mabaka ncyôci aci. Ki cintu ciine citù cishipà bwobumwe ncyôci aci.

⁷⁷ Ki cintu cyàkashipà bwobumwe mu Edena ncyôci aci, mbwalu Eva wakapanga kulama dijaalamija dya dimona, dya ditangila dyende pa Dìyì dya Nzambi, ne kuteelejaye dilukakaja dya ngenyi dya mwena lukuna. Nwamonu anyi? Nwamonu anyi? Bu ne yêyê wakashaala anu ne, “Nzambi ngudi mwambe nanku. Aci ncikose bwalu. Nzambi ngudi mwambe nanku,” kadi yêyê kaakaswa kwenza aci to. Nwamonu anyi? Yêyê wakashintulula dijaalamija dya dimona dya tulondo twende, ne wakabanga kumona, pamutu paa kwikalaci njila umwepele, kwakalwa njila yibidi. Nwamonu anyi? Wakamona ne: “Ee, mpindyewu, pàmwăpa muntu ewu’s mmufwanyine kwikala mubinge. Pàmwăpa mmubinge. Mpindyewu, tudi bamanye ne Nzambi mmubinge, kadi pàmwăpa yêyê ewu mmubinge’s. Ebu’s budi anu mbukênkê busakidila pa cidi Nzambi mwambe.” Nudi numona mwaba awu anyi?

⁷⁸ Ki cintu cimwecimwe aci cîdî cyênzèkà leelu ewu, cyalukile anu menemene pa kaaba kamwekamwe aku. Nwamonu anyi?

Nwamonu anyi? Nwênù nudi numona mmwenenmu yibidi. Kudi anu umwepele. Kakwenaku twitabaayi to. N'Diyì, Diyì dya Nzambi, kiipacila kaa Nzambi, ndongamu wa Nzambi. Mikwabo ndongamu kî mmîmpè to.

⁷⁹ Aci, nenku Eva kwenzaye cintu cibi eci, ne ki kablingila kadi kenza leelu ewu ne Nzambi, mu Diyì Dyende, kayiku mwa kwitaba bwa bakaji kwikalabo bayiishi to. Nwamonu anyi? Kacyena ciitabiibweku mu Diyì to.

⁸⁰ Mu dinda emu, mu dîkù dyetu, tuvwa tuyiikila, basòmbèle ku meesa biikale tudya didya dya dinda, pa dindadinda. Tuvwa bajinge kuumuka, bwa twètù kufika apa pa dîbà, ne kwalukila kuya kuuja cipungidi cikwabo. Pa nanku, twètù, mêmè kwamba ne. . . Tuvwa munkaci mwa kuyiikila ku meesa aku. Nenku—nenku tuvwa munkaci mwa kuyiikila pa, diyì kupatukadi, pa bidi bitangila Banjelo. Mwanaanyi mukese wa balume, Joseph, udi musòmbè pààpa wawa, kwambaye cintu kampanda pa bidi bitangila Banjelo. Nenku kwambaye ne: “Mpindyewu, papa,” yèyè ne, “Banjelo. . .”

Mêmè kwamba ne: “Nzambi’s m’Muntu mulume.”

“Kadi,” yèyè ne, “Banjelo bôbò—bôbò mbantu bakaji.”

Mêmè ne: “Cintu bu nanku kacituku to.” Nwamonu anyi? Yèyè kwamba ne. . .

⁸¹ “Ee, Bôbò badi ne. . .” Sarah, mwanaanyi wa bakaji awu, kwambaye ne: “Kadi, papa,” yèyè ne, “mwaba awu, bôbò abu, s’nyawu batu bavwala maajipè.” Yèyè ne: “Bôbò, bôbò’s mbantu bakaji.”

Mêmè ne: “Aci’s, mufwanyikiji kampanda wa bintu bya mu meeji ngutu muzole cimfwanyi aci awu.”

⁸² Kacya kabatuku bamone, mu Bible, Mwanjelo ubiikidiibwa ne “yèyè ku bakaji” to. Bivwa anu “yèyè ku balume,” misangu yònsò, ku balume, ku balume, ku balume, kabiya—kabiya “yèyè ku bakaji” to. Cintu paaci ne m’Mwanjelo mwikale mukaji kacituku to. Kacyakacya kacituku cyanji kwikalaku to, mu Bible. Kabidi kacituku to, mu Ekeleeziya wa Nzambi udi ne mwoyi. Cintu paaci ne mmusanjeela muntu mukaji kacituku to. *Mwanjelo* utu “musanjeela.” Pa nanku, Nzambi katu uciitabaku to.

⁸³ Bwalu, Bible udi wamba ne: “Adama ngwâkenjiibwa dyambedi, ne pashiishe Eva. Ne Adama kî ngwâkaseeswishiiibwa to, kadi mukaji paakaseeswishiiibwaye wakapona mu dishipa dya mukenji.” Nwamonu anyi? Ki bwa cinyi, mukaji. . . Bambe, Pòlò mmwambe ne: “Ncyèna ngiitabila mukaji bwa kulongeshaye, anyi bwa kwikalaye ne bukookeshi kampanda to, kadi bwa kwikalaye mupuwe, bu mudi kabidi mi—mikenji yamba.”

⁸⁴ Mpindyewu, mu cyôci aci, nudi numona, mpindyewu, mpindyewu, bu mudi bisumbu byetu bya beena Mpenta ebi, s'ki beena buyaaya ebu. Nwamonu anyi? Cidi bôbò benza, badi bapeta dijaalamija dya dimona dya ne: “Ee, mpindyewu, tangila, mukaji's nyêyè ewu udi mwa kuyiisha mwenze bu mukenyi.” Ee, aci kî ncyà dyela mpatà to, nansha kakese. Kakuyi mpatà to. Mêmè nkaadiku muteeleje bamwe bayiishi bakaji, bafwanyine kuyiisha, mu mushindu wa ne bantu balume kabayiku bafwanyine kwangula mpasu mu kuciyiisha to, kadi aci kacyenaku ne dipetangana ne cidi cyakane to; nwamonu's, kacyenaku ne dipetangana nansha dimwe to.

⁸⁵ Pôlò mmwambe ne: “Muntu yêyè wakula mu myakulu kadi kakuyi mwandamunyi to, nanku apuwe byandi.”

Wêwè udi wamba ne: “Mêmè ncyêna mwa kupuwaku to.”

⁸⁶ Kadi Bible's mmwambe ne udi mwa kupuwa, wamonu's, pa nanku's ki mudibi. Nwamonu anyi? Cidi ne cya kwenjiibwa mu bulongame, kuteekiibwa mu bulongame, kuteekiibwa pa kaaba kaaci, ne cishaala kashidi anu pa kaaba kaaci apu.

⁸⁷ Nwamonu's, mwaba awu, nudi nupatuka mu dijaalamija dya dimona's. Aci's cidi cijuula makeyikeyi, lukuka, ne bikwabo. Pamutu paa twêtù kudyakajulula mu dimona dyetu ne Dîyi, tudi twêtù tudyakajulula, tumona ne: “Ee, bôbò bènzè cidibo bamone's.” Nwamonu's, mushindu awu, anu mushindu udibi bikengela, pa dîbà adi's. Eyo.

⁸⁸ Mpindyewu, tudi tusangana ne cidi cinyangakaja bwobumwe bwa mêkù. Cidi cinyangakaja bwobumwe bwa maekleeziya. Cidi cinyangakaja bwobumwe bwa matunga, cintu cyôci cimwecimwe aci.

⁸⁹ Matunga mmaswe kumona mu mushindu wawu ôwò. Beena Allemagne mbaswe kumona mu mushindu wabo bôbò biine, nkaayaabo. Beena Russie mbaswe kumona mu mushindu wabo bôbò biine, wa nkaayaabo. Amerike mmuswe kumona mu mushindu wende yêyè, wa nkaayende. Nwamonu anyi? Pa dîbà adi, nwamonu's, ki mudici nanku. Awu nnyuma wa matunga. Udi umusangana kwônsò kûyaayà, udi usangana nyuma wa ditunga. Mêmè mvwa muyemu, bôbò biine badi naayi mishindu mishiileshiilangane. Bidi bikemesha bikole be. Bu ne mvwa ne dîbà, mvwa mwa kutapaku dîsù lukasalukasa ku amwe a ku matunga bwa kunuleeja.

⁹⁰ Paudi ubwelamu, paudi ubwela mu Allemagne, udi usanganamu nyuma wa cisalaayi. Byônsò bidi anu cisalaayi pa cisalaayi. Bikengela kwikala mwimane musulame, kwenda musulame, kulonda matumba, ne bikwabo byônsò. Aci's ncisalaayi.

91 Paudi ubwela mu France, udi usanganamu nyuma wa masandi: anu bakaji, ne maala, ne cicyampa, ne—ne bintu bya mushindu awu. Nwamonu anyi?

92 Paudi ubwela mu Finlande, udi usanganamu nyuma wa lulamatu, byenze bu ne, byônsò mbya meeji matooke. “Tudi ne cya kwikala tufuta bwa kantu ne kantu.” Nwamonu anyi? Cidi ne cya kwenjiibwa. Bikengela kwikalabi anu mushindu awu. Nansha byôbì bikengela bwa kwenzabo mudimu mukole, nansha biikale bilomba cinyi, bidi ne cya kwikala anu mushindu awu.

93 Paudi ubwela mu Amerike, udi usangana “Ha, ha, ha, ha, ha!” wa munene awu. Ki cidiku ncyôci aci. Eyowa’s. Ki nyuma wa cyena Amerike nyêyè awu. Muntu kampanda wenza muneku wa bundu ku cisanji, bantu bônsò batudika mu tuseku bwa ciine aci. Ernie Ford, anyi—anyi umwe wa kudibo, ùlàsula mineku yitubo naayi, nudi bamanye’s, myaba yônsò, Arthur Godfrey ne kasumbu aku mushindu awu, nwamonu’s, aci’s—aci’s ki nyuma wa cyena Amerike. Udi ubisangana mushindu awu.

94 Ne pashiishe nyuma ayi yidi yikwacila mukwabo nyuma mukawu. Kadi cidiyi yenza ncinyi? Yidi yijuula mvita. Ncya bushuwa.

95 Mpindyewu, nudi numona’s, ditunga ne ditunga dyônsò ndikontononyiibwe kudi Sataana. Bible ngudi mwambe nanku. Yêyè ngudi nzambi wa matunga. Sataana wàkabànda ne Yesu, ku lusongo lwa mukuna, ne kwambaye ne...kuMuleejaye makalenge ônsò avwa pa buloba, makalenge ônsò, mu katanzi kakese cyanaana. Kwambaye ne: “Ngaanyi mêmè. Ndi ngenza naawu cyônsò cîndi muswe.” Yêyè ne: “Mêmè nênKupèèshèwu, bu Wêwè mwa kunkuukwila.”

96 Yesu wakamba ne: “Nkatukile apa, Sataana.” Yêyè uvwa mumanye ne Yêyè ngwâvwa kulwa mupyanyi wawu mu Bukalenge bwa bidimu cinunu. Nwamonu anyi? Pa nanku, kabivwa bikengela bwa kumutwilaYe yêyè binù nansha. Yêyè uvwa mumanye ne avwa mwa. . .

97 Mpindyewu, paalwa Nzambi cyakabidi, kwangata, kuteeka Bukalenge Bwende panwapa, nwamonu’s, kamwakwikalaku nyuma ya mishindu mishiileshiilangane to: nyuma wa cyena Allemagne, ne nyuma wa cyena France, ne—ne nyuma wa cyena Norvège, ne nyuma wa cyena Amerike. Abi kabyakwikalaku to. Nekwikale Nyuma umwepele, amen, Nyuma wa Nzambi, musômbèle mu mwoyi ne mwoyi wônsò. Aci ncya bushuwa. Ne nekwikale dibendela dimwepele, ditunga dimwepele, cisamba cimwepele, bwânà bwetu, Buutaatù bwa Nzambi, ne bwânà bwetu bwa bantu. Buumwânà! Eyowa.

98 Pashiishe tudi tusangana ne, bwalu bantu badi benza ciine eci, ne—ne bajuula makokyanganyi manene aa, ne bikwabo byônsò. . . Mpindyewu, nwamonu’s, bu mucidibi anu ne Sataana ngudi ucikontonona, nekwikale anu mvita ne ndululu, ne mvita.

Yesu mmwambe, mu Yone Munsantu. . . Maataayi Munsantu 24, ne: “Nenũmvwè bamba bwa mvita, ne nguumu ya mvita, ne mvita, ne mvita.” Bwa cinyi? Bwalu, mfumu wa buloba ebu, Sataana awu, bukole bwa matunga. . . Kudi nyuma wa ditunga *apa*, nyuma wa ditunga *apa*. S'ndémóns ayi. Kabeenaku mwa kumvwangana ewu ne ewu to. Nwamonu anyi?

⁹⁹ Nukaadiku bangate musũmbà wa beena ditunga dya ba-Esquimaux mwamwa, mutùtù tuya babànde pa tuumatempu tutu mbwa yikoka amu, mu Alaska wa ku nord, ne lwà mu nyungulukilu wa Buloba bwa ku Nord-Ouest kwaka anyi? Pavwa mulombodi awu—awu uswika mbwa ayi, yidibo babiikila ne Mbwa ya matempu. . . Ùswika umwe lwà *apa*, ne umwe lwà *pààpa*, ne umwe lwà *apa*.

Mémè kwamba ne: “Cyûdì wenzela nanku ncinyi?”

¹⁰⁰ Yèyè ne: “Myûle tente ne dyabulu, mu mushindu wa ne mmifwanyine kushebeyangana yôyi nkaayaayi.” Nwamonu anyi? Anu—anu kushebeya's, ki cidiyi yôyi yela meeji.

¹⁰¹ Ee, s'ki—s'ki dyabulu nyèyè awu, nudi numona's. Yèyè ki mushebeyanganyi. Yèyè, anu yèyè awu, di—ditunga didi anu. . . Nansha démons miine yilwishangana ne démons naayi. Nwamonu anyi? Yidi anu yilwishangana ewu ne ewu.

Kadi, Nzambi utu anu dinanga pa dinanga, nwamonu's, pa nanku kanwena ne cinudi mwa kwenza nansha cimwe to anu kunangangana muntu ne mukwende.

¹⁰² Pa nanku, nudi numona's, dîyì dikulu dyônsò nkòòng ndyalukile dikashindameene cyakabidi anu pa nyuma ayi, dyalukile menemene anu ku cibangidilu's. Genese nnshapita-dimiinu, ne yèyè ngudi upatula bintu byônsò, pa dîbà adi, bitudi naabi pa buloba leelu wa Ndaaya ewu ebi.

¹⁰³ Mpindyewu tudi ne mvita ne dicimuna, mishindu minene ya dicimuna. Ditunga kampanda nedilwe e kucimuna dikwabo, dyamba ne: “Butumbi's we! Twangaci bucimunyi. Twabacimunu.” Nenku—nenku pathiishe, katanci aka anyi, balwa kushaala balunda balabulangana ne ku cyanza, babanga ne dyenda dya mishinga munkaci mwabo.

¹⁰⁴ Ne paanyima paa cikondo, kukaadi mfumu wa ditunga mukwabo, anyi mukwabo mfumu wíkala mwa kwangata bukalenge, mukookeshi mukwabo, ndongolwelu mukwabo. Nenku, katanci aka anyi, ki bôbò aba, biikulu baabo baalukila ne bingoma, balwangana aba ne aba, cyakabidi. “Mvita, ne nguumu ya mvita.” Ne mukwabo ewu nealwe kukookesha mukwabo wawa ne: “Mpindyewu wèwè neunkwacile mémè mudimu, udi mumanye's. Mémè ki cilobo, ne wèwè ngudi—wèwè ngudi mucimunyiibwe.” Ne bikwabo. Nudi anu. . .

¹⁰⁵ Mûngààkumvwà musangu kampanda dîyì dya ne: “Nzambi mmwenze muntu, kadi muntu mmwenze bapika.” Nzambi

katu mwenze muntu bwa kukookeshaye mukwende to. Nzambi mmwenze bantu bwa kwikalabo bânà baa muntu, ncyà bushuwa, bwa kwikalabo bânà baa muntu, kî mbwa kukookeshaye mukwende to. Kakwena cisà cya kumutu kwa cikwabo, ditunga dya kumutu kwa dikwabo, mwakulu wa kumutu kwa mukwabo nansha. Tudi ne mwakulu umwepele, wa mu Dyulu. Nwamonu anyi? Ncyà bushuwa. Tudi ne bwânà bwetu bumwepele: mmuntu. Mmuntu, nansha mwikale nganyi.

¹⁰⁶ Bikaadi bikengela bwa twêtù kwikala kulwangana ne kushebeyangana muntu ne mukwende bwa cinyi? Kadi's ki citubo benza. Pashiishe mûngà musangu, ditunga dîmpè, anyi ditunga diikale ne ndongolwelu munda mwadi, diikale diteeta bwa kwenza cidi cijaalame, ne diikale dilwangana bwa maneeme aadi, pashiishe ditunga dibi nedilwe kudikookesha. Ne pashiishe ki badi bakwatangana ku bukookeshi aba, ne *edi* ditunga dishaala *dyadya* naka. Ne pashiishe ditwa kumpala ditwa paanyima, dishintuluka anu kushintuluka, ditwa kumpala ditwa paanyima.

¹⁰⁷ Matunga akaadi mapetepete, mishindu yàbûngì, yàbûngì ya bucimunyi bunene bwa ditunga yikaavwabo bateeteteete, bu mukaadibo bateeteteete bwa kulwangana bwa budishikaminyi bwabo emu, ne bwa bidibo bashaala balame bu byabo—byabo bôbô abi. Kadi mbapete—mbapete cinyi? Bwa pacidibi anu ne Sataana ngudi ubakontonona, bôbô nebatungunuke anu ne kulwangana. Kadi bôbô's bakaadi bapetepete mishindu yàbûngì ya bucimunyi bunene, mishindu ya bucimunyi bunene. Tudi bafwanyine kwalukila cyanyima, kuumukila anu ku cibangidilu mene, ne kuleeja mwaba ùkaadiku ditunga dikookeshe ditunga dikwabo, ne ditwa dya cyanga dya mishindu ya bucimunyi bunene, ne bikwabo.

¹⁰⁸ Bu mudi, mu Mvita ya Kumpala ya Buloba bujima, patwakapeta Mvita ya Kumpala ya Buloba bujima, pavwa matunga àbûngì madisange ne kutwilanganawu mu cyalu mu Allemagne. Nenu pavwa Belgique ne makwabo matunga mashiileshiilangane miikale alwangana mwinshi mwa mabendela mashiileshiilangane, baakacibiikila ne m'Mvita ya Kumpala ya Buloba bujima. Mpindyewu mêmè. . .

¹⁰⁹ Kudi bânà beetu baa balume babidi basòmbe mwab'ewu, anyi basatu, pàmwăpa banaayi baa kunudi, badi mwa kuvuluka cyôci aci. Mêmè ndi mwa kucivuluka. Nkaadi ne bidimu makumi ataanu ne binaayi.

¹¹⁰ Nenu ndi mvuluka, pâmcîvwà mwânà mutekete, wa bidimu bitwe ku citeema, bidimu mwandamukulu anyi citeema nanku awu, mu cidimu cya 1914. Twănji tumonebi, citeema, dikumi, dikumi ne cimwe, dikumi ne bibidi, dikumi ne bisatu, dikumi ne binaayi. Mwa ne bidimu bitaanu paakakutukayi. Ndi mvuluka paakambabo ne nekwikale mvita. Ne papa

wanyi uvwa ne bidimu bitwe ku makumi abidi ne bibidi, ne bivwa bikengela bwa kumutumabo ku mvita. Kaa, ncivwaku mufwanyine kubweja aci mu aanyi meeji to, bwa dituma dya papa wanyi ku mvita. Kulwaye wenda ùbànda ne njila. Ùvwa mu dikaadika dya ma-ressorts. Nenku ùvwa ne. . . Nenku ùvwa muye ku makajiinyi, kùvwà ntanta wa kilomeeta yàbùngì lwà kwìnshi kwetu, ne ùvwamù ne mufuku wa nkunde. Twètù. . . Ne pa nanku mèmè kwamba. . . Mèmè kwambula nkunde ayi. Mèmè kudyambidila ne: “Bòbò abu balwe ne babange mvita nansha ya bishi, mèmè’s nèmbatuutè ne mufuku wa nkunde ewu bu bòbò mwa kulwa.” Nwamonu anyi? Mpindyewu, bavwa. . . Anu meeji a mvita ayi cyanaana, a ne bikengela bwa papa wanyi aye ku mvita’s!

¹¹¹ Ee, ki—ki mpungi kudilaye, ne—ne “Sumbaayi mikanda yenu ya mpetu,” ne bikwabo.

¹¹² Ne mutudi twètù bònsò tucivuluka ne: “Netuye kuntwaku bwa kalwangana Mvita ya Buloba bujima eyi, nenku netujikije bwalu abu. Nenku pa dîbà adi bòbò nebadilongolole.” Baakalongolola cyakabiikilabo ne Nsangilu wa Bukwamatunga. “Nenku pa dîbà adi nekwikale ditalala, ditalala dya Cyendeleele. Kwajiki. Bwa mvita bumba bujika.”

¹¹³ Mu bidimu makumi abidi cyanaana, twètù kwalukila cyakabidi mu yôyi, ne disumpakana dya kacya, mu mvita mikwabo ya buloba bujima. Nwamonu anyi? Mvita’s! Bwa cinyi? S’ndukuka, mukawu. Nwamonu anyi? Kaiser Wilhelm mmwenze anu umuka mu Allemagne, ki mulumyana kampanda kulwayemu, dyende Adolf Hitler, mwena Autriche, kadi kusalakajanganaye ngenyi yònsò ya bantu abu, cidì cisonsola kudi démon, bwa bamona ne badi mwa kwela buloba mfimbu. Nenku, bòbò, ki cìvwà bwalu ncyôci aci. Nwamonu anyi? Ndémon ulwishangana ne démon nende, cyakabidi, nudi numona’s, mushindu awu. Nenku bantu bavwa kabayi benze bwalu baa mu matunga awu, aci, baakalombolangana anu ku mvita mikwabo, ku mvita, ku mvita. Nenku bidi anu nanku, too ne mpindyewu.

¹¹⁴ Mpindyewu, mpindyewu, dîbà adi, tudi tusangana ne, katanci aka, mvita mikwabo kukutukayi. Mpindyewu, cyakabidi, buloba bujima kuyabu ku mvita cyakabidi, ne bya mvita bya bitambe bwîmpè, ne ndeke ya mitambe bwîmpè, ne bombes ya mitambe bunene. Ki kulwanganabo, kutuulanganabo mashi, kufwabo, kufwabo lwa nzala, kuuminyinabo ne mashika, ne bikwabo byònsò. Mvita, mvita, mvita!

¹¹⁵ Pashiishe kulwaku dituku, citudi tubiikila ne, dituku-dya-B adi. Ki kùndì mwangacile cyena-bwalu eci, dituku-dya-B adi, Dituku dya Bucimunyi. Ki dituku dyakangatabo bucimunyi ndyôdi adi, ne dîvwà bi—bilwilu byangate bucimunyi pa bilwilu bikwabo, dituku-dya-B. Mpindyewu, kuvwaku dituku-D, ne

pashiishe kulwaku dituku-dya-B. Dituku-D mpaakabwelabo mu mvita. Dituku-dya-B mpaakeelabo byâla bwa ditalala, paakalwa Allemagne ne beena matunga makwabo ônsò avwa madilamike kudiye ne bônsò beele byanza muulu kumpala kwa—kumpala kwa—kumpala kwa matunga makwabo.

116 Kadi citwakenza ncinyi? Mu dituku-dya-B adi, twâkimba misambu. Twâkeela mbila ya mikole. Twâkeela bifulu byetu muulu. Twâkatuuta bingoma muulu. Twâkeela mbila. Twâkeela tushiba. Twâkimba ngoma. Twêtù, twâkimba mijiki. Twêtù, twâkatuutangana bintu paanyima muntu ne mukwende. Civwa ncinyi? Civwa mbucimunyi. Kaa, s'twâkapeta bucimunyi. Mushindu mwine uvwa aba...Mona's, twâkadyûmvwa ne: "Twacimunu. Twacimunu." Mabendela kubândawù muulu, ne mpandalala kudilayi, ne, kaa, cikondo kaayi citwakapicila aci's we! "Bucimunyi, bucimunyi, bucimunyi! Twacimunu."

117 Nunku civwa ncintu cinene. Cyakatwadila matunga a—a beena Kilisto ditalala, avwa adyamba nanku awu awu. Ki twêtù kupetaku kaacikondo kakese kaa dyeyela's. Yimwe ya ku nsongaalume yîvwà mishaaale ne mwoyi ayi, kwalukilayi ku mààbò ne bikwabo. Kadi, manene àbûngì, matuku bu nanku awu, àvwa, àbûngì bu nanku, mvita minene's.

118 Kadi, nudi bamanye's, musangu wônsò uvwa mvita ya mushindu awu milwibwe awu, kuvwa kabidi beena kwitabuujja baa Nzambi bavwa paabo anu bapetepete matuku a B, bôbò paabo. Kaa, eyowa's! Kuvwa kwenzeke ku nseke yônsò yibidi, kùvwà tulondo twikale tujaalamijila dimona ne baye ku luseke lwa mubidi aku, ne matuku a B; ne kudici cijaalamijila dimona mu Dîyi mu Mifundu aku, misangu mikwabo cidi citwala dikwabo dituku-dya-B.

119 Tudi bapetepete mvita minene ayi yàbûngì ya kulwangana ne wetu mwena lukuna. Ne Nzambi ukaadi mupete balume banene mwab'ewu badi biimane ku mwalu wa mvita, bàdi ne bukole bwa—bwa kubakula, ku Nyuma wa Nzambi, meeji a bantu, ne kuèla mu Bukalenge bwa Nzambi mwamwa, kadi kupatuka biikale bacimunyi.

120 Twêtù tutu tuyilwangana dituku dyônsò dicyacyà diliilà edi. Mwena Kilisto yônsò utu ulwangana mvita, dituku dyônsò. Twêtù's tudi mu mvita ya dipiiyangana patudi twakulangana apa, miikale yenzekela munda mwetu ya kâmpudimâta, pankaci paa bwîmpè ne bubu. "NetùCyâkidilè anyi? Netwénzè cinyi? Netutumikile maalû a pa buloba anyi? Netulekele meeji atudi naawu aa anyi?"

121 Nunku twêtù baCimone, tujaalamije ntanta wa diCimwena. NuCyângàtaayi anu kuumikila ku Genese too ne ku Bwakabuulwibwa. Cidi EMU MMUDI MUKALENGE WAMBA, musangu wônsò, kuntwadijilu too ne kundekeelu mwômò amu. Katwenaku mwa kuCilekela to. Katwena mwa kudya cibanga

pamwe ne bakwabo baa kudibo to. Katwena anu mwa kucyenza to. Bikengela tushaale apa. Kwajiki. Mwena lukuna nansha yèyè mwikale munene wa bishi, ne ndongolwelu udiye nende bwa kutulwisha nansha mwikale wa bishi, ne malongolodi nansha miikale bûngì munyi, ne beena *cikampanda*, *cikansanga*, anyi *cikankenga* nansha biikale bûngì munyi. Twètù, nansha nanku, tudi bangate dijaalamija dya dimona edi, dya Dìyì dya Nzambi, mu mushindu wa tusangana ne kudi cintu cimwepele, ne ciine aci m’Mashi a Yesu Kilisto. Ne Yèyè udi umwèumwè awu makeelela, leelu, too ne kashidi.

¹²² Ki bwa cinyi, cidì nî nganyi nî nganyi wamba kaciyena ne cidici cishintulula to. Bòbò badi bamba ne: “Matuku a bishima akaadi mamane kupita. Cintu paaci ne ndyondopa dya kudi Nzambi kacituku to. Dibatiiza dya Nyuma Mwîmpè kadituku to. Ne dibatiiza dya mu Dînà dya Yesu Kilisto, adi divwa anu bwa bayiidi nkaayabo.” Ne bintu byònsò ebi, bòbò badi bateeta bwa kuumushaku dijaalamija dya dimona. Kadi, cicidi anu cijaalamija dimona cidyaluja buludi ku Dìyì, nenku muntu nansha umwe kèna mwa kwamba ne kacyenaku to. Ncya bushuwa.

¹²³ Pa nanku, tudi mu mvita ya dipiiyangana. Ne bilobo bya Nzambi bikaadi misangu yònsò bipetepete anu mvita ya dipiiyangana.

¹²⁴ Nenku nwênù, kaakeleeziya kakese aka, nwavulukaayi mwab’ewu ne, nudi citupa cya musùmbà wa bantu awu. Nudi kasumbu kaa masalaayi kaa ku luseke kàdì lwà paanyima apa. Bwa ne, nudi bamanye cidi kasumbu kaa masalaayi kaa ku luseke kuumvwija. Bivwa bikengela nwênù kwikala bamanye, mu nudi ne bamwe baa ku kòkò aku mwab’ewu ku luseke lwenu. Pa nanku, nwênù nudi kasumbu kaa masalaayi kaa ku luseke lwà paanyima apa, mu mwaba kampanda, bwa—bwa kwikala bakwate mabènde mabàndisha, bwa kwenza cidi cîmpè, bwa kutungunuka anu ne kwamba ne Yesu Kilisto ngudi ditekemena dimwepele bwa baa pa buloba; kî ng’ekeleeziya wa ba-Méthodistes, ekeleeziya wa ba-Baptistes, mmwenenu wa ba-Presbytériens, wa beena Katolike, anyi wa beena Yuda to, anyi yònsò udi mufwanyine kwikalaku awu; cisà, kasumbu, anyi diikala. Kî ng’aci to. N’Yesu Kilisto. Nwamonu anyi? Yèyè ki mwine Udiku. Yèyè ki Cilobo cyetu. Yèyè ki mwine Udiku. Yèyè ki Kapiteena Munene wa nkwaka. Aa mmèyì Ende matuma. Bikengela bwa twètù kutumikila mèyì matuma. Mmunyi munudiku bafwanyine . . .

¹²⁵ Bamwe baa kunudi nwênù balumyana aba’s nukaadiku bakwatakwate mudimu mu mvita. Mmunyi munudiku bafwanyine . . . Kapiteena utuma dîyì, kadi wèwè ukudimuka wenza cintu kampanda cya cikonyangale, mona’s, wèwè’s neupampalamune cilwilu cijima. S’ncya bushuwa. Wèwè’s

neùcyèlè mu cimvundu. Bikengela bwa utumikile mēyì matuma awu. Mushindu umwepele wùdiku mwa kucyenza, nkujalamija dimona dyawu, ne kumona kiipacila, bwa ne byònsò abi mbya bwalu kaayi. Eyo.

¹²⁶ Tukaadiku balwanganelwangane mvita minene yàbùngì, mvita ya nyuma. Matuku a B manene àkaadiku Ekeleeziya mupetepete; ndi njinga kwamba Ekeleeziya, Mubidi wa Kilisto. Mpindyewu ncyèna ngaakula bwa ndongolwelu wa bulongolodi to. Ndi ngamba bwa Mubidi wa Kilisto. Mubidi wa beena kwitabuuja, munda mwa bikondo byònsò, ukaadi mupetepete matuku a B manene àbùngì.

¹²⁷ Citudi twamba, tukaadi bapetepete mvita bùngì bu yàmbà ne katùkù, mvita ne nguumu ya mvita, ne matuku a B, ne matuku a B, ne matuku a B. Ne ndekeelu wa byònsò nebikuupuke ku mvita minene ya Haamagiidona. Ki ciikalà ndekeelu wayi. Paayaye kafika ku mvita ya Haamagiidona, ki cyakosa cilumbu cyònsò ncyòci aci. Kumpala menemene kwa Bukalenge bunene bwa bidimu cinunu, nebikengele bwa Haamagiidona asukule buloba. Budi budisukula cyakabidi ne ditaayika dya bombe bwa mushinda ebu, ne butu bwa volcan ne bikwabo nebiikale mwa kupwekesha mwamwa mashi a bantu àdi mapongoloke pa buloba, ne mpekaatu ne bwenzavi. Ùdi ubibweja mwinshi mwa buloba, ne mitooyi ya volcan ayi byumusha cyakabidi, ne usukula ne uvwija buloba bupyabupya bwa Bukalenge bunene bwa bidimu cinunu abu. Yèyè udi usukula Ekeleeziya Wende, munda mwa ciine cikondo aci, bwa kwikalaye cisamba cyàlwà kusòmbela panwapa. Amen. Ndi—ndi ngamba ne, mèmè ndi munange aci. Eyowa's, mukalenge. Nekulwe cikondo ciikalabi bilenga bilaya.

¹²⁸ Mpindyewu, matuku a B manene awu, tudi twela meeji ku cikondo. Twànjàayi anu kwalukila paanyima. Tudiku ne ndambu wa tusunsa mwab'ewu mpindyewu bwa kutumaku meeji ku bamwe baa ku balwanganyi baa mvita. Twalukilaayiku paanyima bwa kuvuluka umwe wa ku...Tudi bafwanyine kwalukilaku paanyima menemene. Kadi twalukilaayiku too tukabangila kùdì Mòsà. Mòsà uwva ne cikondo cyakayaye mu mvita minene ya dipiiyangana, bwalu ekeleeziya, mu yèyè mwine, ùkaavwa mupwe too ne mwoyi bucumunyi.

¹²⁹ Ki lutatu lùdiku ne ekeleeziya leelu ewu ndwòlò alu's. Tukaadi bapwe mwoyi ntanta mulee be bwa ne Yesu Kilisto udi umwèumwè awu makeelela, leelu, too ne kashidi. Tukaadi bapwe mwoyi ne Nzambi utu Mwondopi, ne udi mwa kusangaja babeedi. Tukaadi bapwe mwoyi ne dibatiiza dya Nyuma Mwîmpè dyakapongolodiibwa pambidi paa bayidi, ne ditu difidiibwe ku lukongo ne ku lukongo lwònsò, bwa muntu kana yònsò, ewu yònsò udi muswe kulwa awu. Tukaadi bapwe mwoyi cyòci aci, kukaadi ntanta, ntanta mule.

¹³⁰ Ki mukaavwa pende Izaleela mupwe mwoyi. Bakaavwa badyũmvwè basankishiibwe mu Ejipitu, ne pashiishe kulwabo bapika.

¹³¹ Nenku mpindyewu ki Mòsà udi upweka ewu, mu bwalu bwende bwa mamanya a mu mutu awu, anyi, ku cyenzedi cya mamanya a mu mutu, bwa kuteetaye bwa ne, ku bukole bwa cisalaayi, apatule Izaleela, kadi kupangilaye bwa kucyenza.

¹³² Kadi anu Dìyì dya kudi Nzambi dimwè cyanaana, lwà mundekeelu mwa cipeela mwamwa, kubabajadi cyakabidi cintu cyònsò aci. Cyàkenzekelà Mòsà ncinyi? Wakajaalamija dimona dya tulondo twende. Kiipacila kamwepele kaa Nzambi kakavwa anu bwa kuyaye kasela nsongaakaji wa bafiike wa kwìsù kulenga wa beena Éthiopie ewu kuntu kwaka, bwa—bwa kusòmbayè ne kulelaye bânà, ne—ne kumunyinaye tatwëndè—mwenu mikooko to. Kadi mudimu mumutuma naawu uvwa—uvwa mbwa kusungila bânà baa Nzambi, ku bupika abu. Ki civwa mudimu mumutuma naawu. Bwa cyôci aci ki bwakalediibwaye.

¹³³ Ne muntu ne muntu wa kutudi mmulediibwe bwa cintu kampanda. Katwena bateekiibwe panwapa anu bwa cyanaana to. Kì mbyenzeke bwa mukuna wawa kwikalawu mwaba wawa paaawu anu nanku to. Muci wawa mmuttekiibwe mwaba wawa bwa kiipacila kampanda. Bintu byònsò bidiku mmu kiipacila kampanda. Bidi bikengela kukwatabi mudimu. Ne twètù tudi kaaba aka bwa kiipacila kampanda. Pàmwâpa mbwa kufila bujaadiki kudi muntu umwepele cyanaana ne kumufikisha ku disungidiibwa, ne ku cyôci aci kufwanyine kupatuka muyiishi wíkala mwa kutuma mùliyô mujima wa misuuka kudi Kilisto.

¹³⁴ Tangilaayi numone dikudimuna dya mucima dya Dwight Moody, ne bààbũngì baa kudi bôbò abu. Nudi numona anyi? Anu muntu mukaji mukese mukulakaji umwepele cyanaana, mwikale ne. . . Muntu mukaji mukese mukulakaji musukwidyanganyi wa bilàmbà mwikale ne mukenji pa mwoyi wende, bwa kwenzaku cintu kampanda bwa Nzambi, ki kufucilaye cikumbi cya kale cya dilamina tubalu, ne kwangataye muyiishi kampanda bwa kulwaye kuyiishilamu. Nenku kakuyiku muntu nansha umwe to pa kuumusha anu mwânà wa balume mutekete wa cyena kale, ne nsuki mipweke mitwe ku nshingu, muvwale civwalu cya mampinda cya tatwëndè, kuyaye e kutwaye binù ku cyoshelu aku diloolo adi. Dwight Moody, mwine wâkatùma cyabibidi cijima cya mùliyô wa misuuka kudi Yesu Kilisto awu. Nwamonu anyi? Muntu mukaji awu uvwa ne cintu kampanda cya dyenza. Ùdi. . . Civwa mmu kiipacila kampanda. Yèyè wakavwijiibwa musukwidyanganyi wa bilàmbà, mu kiipacila kampanda.

¹³⁵ Kwikadi wâdyombola mwaba udi Nzambi mukuteeke's. Kadi, kumbaja kiipacila keebe. Kùlwalwa dituku dinene dya bucimunyi, dimwe dya ku matuku adi panshi aa, dyàjikà mvita.

136 Mpindyewu, monaayi. Mòsà, yêyè wakaya, paanyima paa yêyè mumane kujaalamija dimona dya tulondo twende ne mumone ne civwa nndongamu wa Nzambi, civwà cìkèngelà bwa yêyè kwenza. Kuyaye. Kulwanganaye mvita bikole. Kupetaye mvita minene yàbúngì. Kadi yimwe ya ku mvita yende minene, ya diteeta ayi, ndi muswe ku—kucitwala. Piine apu, yêyè ukaavwaku mukumbaje, mu kuleeja kwa bimanyinu ne maalu a kukema, ku bintu bishiileshiilangane bivwa Nzambi mumuleeje, bwa kwamba Dîyì ne bivwa mwa kulwa bya balenga ne byanza ne byenzeka.

137 Ncintu cimwecimwe aci citudi naaci leelu ewu, amba Dîyì pa babeedi, [Mwaneetu Branham udi utuuta cishonto—Muf.] kadi umone mudiDi dyòndopa, ne dyènza bikwabo bintu bikaadiku Dîyì dya Nzambi dyakwile ku mishiku ya muntu. “Ambila mukuna ewu ne: ‘Tentemuka,’ ne kuyi wela mpatà to, kadi witabuuja ne ciwãmbì aci necyenzeke, udi mwa kupeta ciwãmbì aci.” Yesu ngudi mwambe nanku. Mpindyewu, twètù tudi twitabuuja aci, ne tushaala bakwateku, ne tucyangata, ne tuciitabuuja.

138 Nenku mpindyewu, ki cyakenza Mòsà ncyôcì aci. Nenku yêyè wakaya kuntwaku, ne Nzambi ukaavwa mujaadike ne úvwa nende. Kadi paanyima paa mumane kumupeta yêyè yònsò, Nzambi. . .

139 Mbyenze anu bu ne, nsòmbelu wa bwena Kilisto, muntu yêyè kayi mushindameene yêyè yònsò pa Kilisto to, nsòmbelu wa bwena Kilisto, mbyenze anu bu ne, udi upeta mishindu yàbúngì ya dyediibwa dya mâyi ku makàsà. Kadi miine mishindu yàbúngì ya dyediibwa dya mâyi ku makàsà ayi yitu—yitu ndiswa dya Bunzambi dya Nzambi diikale dyanzeka bwetu twètù. Mpindyewu, kabyena bimweka bu ne mbifwanyine kwikala nanku to, kadi mmushindu wa Nzambi wa kwenza maalu. Yêyè udi utulekela bwa twänjì kukatwa anu makàsà ku musulu, bwa kumona citwenza.

140 Mòsà kulombolaye bânà baa Izaleela buludi mu kajila kaa mudimu, ne cilwilu cya Pâlò cyenda cimulonda muunyima, ne lupwishì lutuuka ku—ku cyabibidi cimwe cya mùliyô wa bantu bambule bya mvita. Kadi ki beena Yuda mìliyô yibidi mbòbò aba kabayi ne pabwasa, biimane kwaka, balume, bakaji, bânà, ne bikwabo. Ne Mbù Mukunze uvwa mumucyamakane kumpala. Mbù mufwe mumucyamakane kumpala. Yêyè. . . Kakuyiku mwaba wa kuyiila nansha umwe to. Nwamonu anyi? Kadi Mòsà wakapeta dituku-dya-B paakasambilaye musambidiilemu. Kuyaye kadi kubanga kwela mbila kudi Mukalenge.

141 Ki Mukalenge kwamba ne: “Cyûdi welela mbila Kùndi ncinyi? Mémè’s ngudi mukutume ne mudimu bwa kucyenza. Akula ne bânà abu, bwa batungunuke ne diya mu kajila kaa

mudimu.” Amen. S’ki bwalu mbwòbù abu. “Kwedi mbila Kùndi to. Wèwè udi mutumiibwe ne mudimu wa kupatula bantu abu muntwamu. Akula anu naabo cyanaana, bwa baye batangile kumpala, bashaale anu mu kajila kaa mudimu.” Amen.

¹⁴² Dikima kaayi divwa aci cikengela kwikala bwa mubeedi’s we! Dikima kaayi divwa aci cikengela kwikala bwa muntu mutwe cìmpìngà! Kudimuka, asa lwendu mutangila kùdì ufuma. Shaala mu kajila kaa mudimu. Bwalu mbwa Nzambi bwa kukangula Mbù Mikunze. Abu bwalu mbwa Nzambi. Akula wèwè anu cyanaana wàsè lwendu uye kumpala. Ki cyònsò cidi cikengela bwa wèwè kwenza ncyòci aci.

¹⁴³ Nenku Mòsà, dituku-dya-B dinene adi, divwa nkwinshi ku mbù kwaka. Kaa, dituku-dya-B kaayi adi divwa bwa Mòsà, ne bwa bânà baa Izaleela bààkatùmikilà dīyī dya muprofeta wabo abu, paakaakulabo ne kuya kumpala. Mòsà wakamba ne: “Mémè ncyèna ne . . . Nukaadi bamane kumona bishima dikumi, kadi nya’ nucidi anu nwela mpatà.” Ki kwasaye lwendu mutangile ku mbù, ne dikombo adi mu cyanza. Ki Nzambi kutumamu cipeepele bufuku abu ne cyakatuuta pa mbù apu kuumukila anu ku luseke too ne ku luseke lukwabo, ne baakasabuka biikàle bendela pa buloba bùmè, dituku-dya-B.

¹⁴⁴ Tangilaayi kuneeku. Bavwa biimane, nansha mene mufundu wetu leelu ewu mmwambe, ne: “Bavwa biimane bimba musambu wa Mòsà, pa mbù wa lumwenu musambakaja ne kapyà.” Nwamonu anyi? Nwamonu anyi? Baakimba. Nenku Mòsà, paakasabukaye, kavwa mumanye cya dyenza to. Nenku yèyè kufika dyamwamwa . . . Ki cilwilu cya Pàlò cilwalwà eci, bakeba bwa kutentula bintu bivwaye wenza abi. Difwanyikija dya bintu dya mu musunya’s! Kadi cyàkenzekà ncinyi? Mbù kuupukaye ne kubashipaye mu màyi, muntu ne muntu. Ki kumonaye benzejanganyi baa midimu mikole abu bafwe myandanda.

¹⁴⁵ Miliyama kwangataye dikasa kadi ki yèyè udi wenda upweka ne mwelelu wa màyi wawa, wenda wimba dikasa adi. Ki bânà baa bakaji baa Izaleela kumutwabo muunyima, benda beela mbila, ne bimba makasa, maja bimonangane. Ki Mòsà kwimbaye mu Nyuma. Piikalà aci kaciyi disangisha dya cyena kale dya Nyuma Mwimpè to, mémè nciitu mwanji kudimonaku kacya to. [Kátupa kaa mukaba wa mēyi munda mutupu—Muf.]

¹⁴⁶ “Beena Ejipitu banudi batangile leelu aba, kanwakubamona kabidyee.” Amen. Dituku kaayi’s we! Kwònsò kwamanyi kujika.

¹⁴⁷ Dìngà dituku nekulwe dikwabo dituku-dya-B bwa mwena Kilisto, yèyè pende. Ncyà bushuwa.

¹⁴⁸ Monaayi, Yoshuwa wapaketa pende dituku-dya-B ku musulu aku. Yoshuwa wapaketa pende dituku-dya-B mu Yeleko. Wakadipeta cya bushuwa. Mwaba wakasabukilaye awu, wakanji kupeta dituku-dya-B, dyambedi, ku musulu aku. Ki yèyè awu mu ngondo mwinàyi, musulu pàmwàpa uvwa bunene bwa

kilomeeta mujima ne citupa, Yadene awu, bwalu lwà kuulu ku nsongo ya mikuna kwaka, kudi nêjè mwikale wenguluka. Ne mu bibandabanda mwônso amu, musulu uvwa mupaasaleelemu.

¹⁴⁹ Ne kakuyi mpatà to mwena lukuna uvwa mufwanyine kwikala mwambe ne: “Mpindyewu, Nzambi Yèyè’s utu—utu Kalaala kaa masalaayi keetu kaa menemene aka, kî mmwômò anyi? Nyewu mulombwele cilwilu Cyende mwab’ewu mu cikondo cya bintu bitoloka emu, mudi musulu mwikale mu mushindu wa mubi menemene, padibi ne ncikondo cya citambe bubu bwa kusabuka, kadi piine apu kulombola cilwilu Cyende lwà mwab’ewu, ubalombola bwa kusabukilapu.” To.

¹⁵⁰ Nzambi ngutu ulekela bwa dyediibwa dya mâyi ku makàsà kwenzekadi, bwa kuleeja bucimunyi. Kaa, bu twètù mwa kumonaku ciine aci’s we! Nwamonu anyi? Bu nwènù mwa kumonaku ne maalu adi munkaci mwa kunutwa bu twêbà anu bya menemene, ne anulundula aa, mmateeta’s. Mbintu, bwa nwènù kushaala biimane kamungulu, kujaalamija dimona dya tulondo twenu pa Dìyi dya Nzambi. Nenku kwamba Dìyi, ne dîbà adi asa anu lwendu uye kumpala. Ki cyônso cya dyenza ncyôci aci.

¹⁵¹ Tutu tufika mu cikondo kampana, cya twamba ne: “Nzambi, ngaapangi cya dyenza. Ngätù ku cibungubungu.”

¹⁵² Amba dîyi ne: “Mukalenge, ndi ngiitabuuja.” Ne asa anu lwendu uye kumpala. Nzambi ngudi ukangula mbû. Tungunuka wêwè anu ne kwenda kuya. Nwamonu anyi?

¹⁵³ Mpindyewu, tudi tusangana ne Yoshuwa, anu pa dyôdi dîbà adi, wâkasambila. Nenku Mukalenge wâkamwambila cîwà mwa kwenzeka. Ki kupetaye dituku-dya-B. Kucimunaye. Pa dîbà adi, paakacimunaye musulu awu ne paakasabukaye kuya dyamwamwa, wâkenza cinyi? Wakateeka musheete wa cipungidi . . .

¹⁵⁴ Bwalu, Dîyi divwa munda mwa musheete wa cipungidi amu. Wâkatèeka aci kumpala. Pashiishe bimbi baa misambu, ne bikwabo, baakalwa paanyima paawu. Kadi musheete wa cipungidi ngwakanji kupatuka, dyambedi.

¹⁵⁵ Pavwa Izaleela uya ku mvita, cintu cya kumpala cîwà cîpâtukà cîwà mbimbi baa misambu. Nenku bimbi baa misambu bavwa bapatuka, benda bimba. Pashiishe bavwa beela mpungi, ne bikwabo. Pashiishe musheete wa cipungidi uvwa wasa lwendu. Pashiishe, pavwa musheete wa cipungidi wasa lwendu, dîbà adi pavwabo bateeka musheete wa cipungidi panshi, nenku mvi—mvita yivwa yikutuka.

¹⁵⁶ Monaayi. Kadi mpindyewu, mu eci, paakangata Yoshuwa Dîyi kumpala, ne paakateekaye Dîyi kumpala, wakasabuka . . .

¹⁵⁷ Kadi Nzambi uvwa mumwambile ne: “Anu mûmwà ne Môsà amu, ki mûngikalà kabidi neebe wêwè. Ncyakupangikaku

kwikala neebe to. Nêngiikalè neebe. Muntu nansha umwe kaakukukandameenaku to, matuku ebe ònsò a mwoyi. Mémè nêngiikalè anu mwab'awu. Kuciinyiku wêwè cìikalà mwa kwenzeka aci to. Mémè nêngiikalè anu mwab'awu." Pashiishe ncinyi, ne mudimu mumutuma naawu wa mushindu awu, ciwva Yoshuwa mwa kwenza ncinganyi piikalaci kaciyi kuteeka Dìyì kumpala? Amen. S'ki bwalu mbwòbù abu. Ne mudimu mumutuma naawu kudi Nzambi, kwanji kuteekaye Dìyì dyambedi. Ki kupatulaci dituku-dya-B. Kaa, didi ne cya kulwa. Kwajiki.

158 Wakanji kuteeka Dìyì kumpala, nenku ncinyi cyàkenzekà? Musheete wa cipungidi wakanji kupweka wòwò dyambedi, ku mâyì aku. Paakapwekawu, mbù wakakanguka, musulu's we, eyo, nenku bôbò baakasabuka.

159 Pashiishe cyènzàye ncinyi paafikaye mwaba awu? Cintu cìdì cìlondà cìikalà mwa kwenzeka ncinyi, paafikaye mwaba awu dyamwamwa adi? Pa dîbà adi yêyè udi usangana ne, bôbò mbadikangile munkaci mwa bimanu, bwa bwôwà buvwabo naabu bwa ne ki yêyè ulwâlwa awu.

160 Kadi wakatwilangana ne Kapiteena Munene, dîngà dituku. Ki kupetaye dikwabo dituku-dya-B. KumwambilaYe anu menemene ciwaye ne cya kwenza, nenku bimanu bya Yeleko kuupukabi. Ciine aci yêyè neàcyènzè bishi's?

161 Muntu wa mubidi utangila mu tulondo amu, wamba ne: "Mpindyewu, mwab'ewu, Wêwè nyewu wâmfikishì mwab'ewu, nenku's ki mémè ewu. Anji tangila anu dikandameena umone. Mona's, bônsò nyawu basanganyiibwa munda, biikàle ne bikùpì byabo bya mabwe. Twètù badidinge anu baseemene pabwipi ne cimanu cyacya, s'ndyakabi dyetu. Badi ne mabwe meelamu, bikùpì byabo binene bya mabwe abi. Badi ne mafuma. Badi ne mata a mikete. Badi ne byònsò biikàle bisanganyiibwa muntu mwamwa. Ne bôbò badi anu . . ."

Kadi, nwamonu's, Yoshuwa wakanji kuteeka Nzambi kumpala. Nenku paakenzaye . . .

162 Bwalu kî mbwa ne neubwelemu bishi to. Abu bwalu mbwa Nzambi. Tungunuka wêwè anu ne kwenda kuya, ulonda Dìyì.

163 KwambaYe ne: "Nyungulukaayi, matuku mwandamutekete. Kadi mu dituku dya mwandamutekete, nwëndè misangu mwandamutekete. Mu...Pa musangu wa ndekeelu wa dinyunguluka awu, nwèlè mpungi." Mwaba wa Nzambi, bwa kuumusha cya mubidi aci. Ki cya nyuma kubwela mu cyalu, ki bimanu kuupukabi. Ki kuyabo anu buludi ne kukwatabo cintu aci. Eyowa's, mukalenge. Nzambi kupetaYe dituku-dya-B dîbà adi.

164 Abraham wapaketa dituku-dya-B, paanyima paa mumane kupeta mulayi wa mwànà mwine ewu ntanta mule wa dikema,

Nzambi mwikale umuteeta bwa dinanga dyende ne lulamatu lwende; yêyê ki mwena dimiinu ditudi baatwètù aba, piikalabi ne tudi biitàbuuja Nzambi.

¹⁶⁵ Nenku Abraham kupetaye dituku-dya-B. Divwa ndìbà kaayi diine adi? Dituku dyakuumukaye mu buloba bwa bibandabanda bya Shinear anyi? Kadivwa ndyôdi adi menemene to. Wakasabuka, aci neya bushuwa, musulu wa Efalata, ne wakalwa dyamunu, bwa kwanjiye kusòmbelamù. Adi's divwa ndituku dilenga. Aci mu mushindu kampanda cyakatungunuka ne kwikala anu . . .

¹⁶⁶ Kadi dyende dituku-dya-B dya mushinga divwa mpa Mukuna wa Yile, paakakùbàndàye dituku adi, dyàkamupicishilà Nzambi ku diteeta dya ndekeelu adi. Wa bwalu, yêyê uvwa ne mwanende anu umwepele wa balume. KwambaYe: “Mpindyewu, Abraham, mwangate nda nende pa mukuna wawa, nenku umulambule bu mulambu wa kwosha. Ndi mukuvwije taatù wa bukwabisamba. Eci ki cintu cimwepele cyùdiku peebe naaci, bwa kukuvwija ‘taatù wa bukwabisamba,’ nku mwine mwânà ewu. Ndi muswe bwa umushebeye.” Kakaa, nudi numona aci anyi? “Nyangakaja byònsò. Nyangakaja kiine kiipacila aku. S’ki wêwè ewu, Abraham, ukààdi ne bidimu lukama ne dikumi ne binaayi, dikumi ne bitaanu mpindyewu. Nenku uvwa mwindile bidimu makumi abidi ne bitaanu bwa kupeta mwânà awu. Kadi patudi twakulangana apa mwânà awu nyawu ukaadi ne bidimu dikumi ne bitaanu anyi dikumi ne bisambombo. Nenku Ndi muswe bwa wêwè kuya nende kuntwaku ne kumushebeya, bwa Mêmè kukuvwija taatù wa bukwabisamba.” Kaa, ekelekele! Eyowa’s.

¹⁶⁷ Abraham kaakanyungaku to. Kacya, kacya yêyê kaakazakalaku ku Dîyì dya Nzambi to. Wàkamba ne: “Eyowa’s, Mukalenge. Ki mêmè uyààya ewu.” Kwambulaye nkunyi, ne kwangataye Izaka kuyaye nende buludi too ne ku lusongo lwa kakuna, anu mu ditumikila menemene. Bwa cinyi? Wàkatèèka mukenji wa Nzambi kumpala. Neikale taatù wa bukwabisamba mushindu kaayi, padibi ne yêyê udi ne mwânà wa balume anu umwepele, ne yêyê ne bidimu bipite pa lukama mpindyewu? Wàkacyènza munyi? Bwalu, eci, wàkamba ne: “Mêmè. . .” Yêyê wakajingulula ne piikalabi ne Nzambi uvwa ne bukole bwa kumupa Izaka, bu muntu mufumine ku bafwe, Yêyê uvwa kabidi ne bukole bwa kumubiisha kabidi ku bafwe.

¹⁶⁸ Mpindyewu, nwênù balunda baanyi, Nzambi utu mutubiishe ku lufu lwa ku maalù a pa buloba ne dinyanguka dya pa buloba awu, Yêyê awu kèna mwa kutupeesha Mwoyi wa Cyendeleele ne kututeeka mu Buloba mudi kamuyi lufu anyi? Nwamonu anyi? Tudi tutangila tuumateeta tukese etu, twela meeji ne twòtù atu tudi cintu kampanda. Mona’s, twine atu katwena cintu to anu tuubikondo tukese twa mateeta cyanaana. Nwamonu anyi?

Nzambi wakateeta Abraham, kadi paakapetaye dituku-dya-B dyende mpàakabàndàye kuntu kwaka mu ditumikila dya Dìyì.

169 Anu mudibo bamba leelu ewu ne: “Ndi mumanye.” Mvwa mùmvwè mwambi kampanda kwènji cikondo kampanda, ùbala Byenzedi 2:38, kadi kushiyaye bikwabo, nwamonu’s. Yèyè kwamba ne: “Nenku Peetelo kwambaye ne bavwa ne cya kubatijiibwa, ne pashiishe—pashiishe bavwa mwa kupeta Nyuma Mwimpè,” ùbènga kubala bikwabo bya Cyòcì aci. Bwa cinyi? Nwamonu’s, malongolodi mmalwishelwishe Cintu cyena diìnà aci’s. Mpindyewu, nnuumvu mmwenenu awu anyi? Nwamonu anyi? Nudi nwenza nanku bwa cinyi? Ncinyi cidi cinufikisha ku dicinguluka Bintu abi?

170 Piikalà Bible wamba Aci, uCibale too ne kwinsi mushindu ùdiYe ùCyàmba awu, ne wàmbè cintu cimwecimwe cidi Bible wamba aci. Ki paudi ujaalamija dimona dyebe mu mushindu mujaalame, wamonu’s, walukila ku cidi Dìyì dyambe.

171 Mpindyewu, tudi tusangana ne, bôbò, udi upeta webe—webe . . .mwab’awu udi mupatuke pambelu paa dijaalamija dya dimona.

172 Mpindyewu, Abraham uvwa mujaalamije dimona dyende bìmpè, bwalu Nzambi wakamba ne: “Nènkuvwijè taatù wa bukwbisamba,” piine apu mpakaavwaye ne bidimu makumi mwandamutekete ne bitaanu, ne Sarah ne makumi asambombo ne bitaanu.

173 Kadi yèyè wakiitabuuja Nzambi. Yèyè, cyakenzaye ncinyi? Wakateekela dimona dyende pa civwa EMU MMUDI MUKALENGE WAMBA. Eyowa’s, mukalenge. Nenku yèyè wakenda mululame menemene ne cyòcì aci, civwà EMU MMUDI MUKALENGE WAMBA aci. Ku dituku ne ku dituku, ùvwa anu wenda. Ku cidimu ne ku cidimu, ùvwa anu wenda, ùjikula ne: “Cintu kana cyònsò civwà cibengangana ne Cyòcì aci, kacivwa—kacivwa cya bushuwa to. To, mukalenge. Bivwa bikengela kwikalabi mushindu awu. Nzambi nguvwa mwambe nanku.”

174 Ndi ndifwanyikijila bamwe baa ku beena lukuna bende balwa mwab’awu, bamba ne: “Taatù wa bukwbisamba, ukààdi ne bânà bùngì kaayi mpindyewu?”

175 “Bùngì bùndi naabu mpindyewu kabwena ne cidibu bushintulula to. Mèmè ndi taatù wa bukwbisamba. Kwajiki.”

“Wàmanyi bishi?”

176 “Nzambi ngudi mwambe nanku. Aci’s ncikose bwalu. Anu aci ki cyònsò cidiku pa bwalu abu. Nzambi ngudi mucyàmbè, nenku aci ncikose bwalu.”

177 Ki Abraham kuyaye anu kumpala’s. Ki ndekeelu wa byònsò yèyè kafika pa mwine. . .pashiishe, nudi numona’s, mwikàle ne lulamatu lwa dikema; padiye utamba kwikala ne lulamatu,

mateeta paawu ne tuyaayi. Nwamonu anyi? Pa nanku ki Yêyè kumwaluja's.

¹⁷⁸ Mpindyewu, vulukaayi. Pavwa... Nzambi mmukubale ne udi mukumbanyine paudi upicila ku diteeta. Mpindyewu, eci kacinupici to, bwa kucyumvwa. Paudi ne diteeta anyi diteeciibwa apu, bidi bileeja ne ngàsà wa Nzambi mmupete, wêwè udi mulengelele Nzambi, ne Nzambi udi witabuuja ne wêwè neutambe diteeta adi.

Vulukaayi ne, Yêyè wakenza cintu cimwecimwe aci ne Yobo.

¹⁷⁹ Sataana wakamba ne: “Kaa, eyowa's, ndi mumone Yobo, panshi pàapa.” Yêyè ne: “Cidiye kèna . . .”

¹⁸⁰ Nzambi kwambaYe ne: “Mmusadidi mupwangane. Kakwenaku muntu nansha umwe pa buloba bu yêyè awu to. Kakwenaku muntu nansha umwe bu Yobo to. Yêyè mmuntu mupwangane. Mpindyewu, yêyè, yêyè ki Aanyi—yêyè ki Aanyi maleela ne disanka.”

¹⁸¹ Sataana kwambaye ne: “Kaa, bushuwa's. Yêyè nyawu upeta byônsò bidiye ulomba.” Yêyè ne: “Anji ndekela mmupye musangu umwe cyanaana.” Ki kwambaye ne: “Mêmè, mêmè's nêmmufikishe ku diKwela mulawu muKutangile mumpala.” Yêyè ne: “Mêmè's nêmmufikishe ku diKwela mulawu.”

¹⁸² Nzambi kwambaYe ne: “Nyêyè awu mu byanza byebe, kadi kwangaci mwoyi wende to.” Nwamonu anyi? Nzambi uvwa ne dyeyemena kudi Yobo. Amen.

¹⁸³ Padibi bimweka bu ne maalu ônsò anyanguku apu, Nzambi ngudi ukupicishila ku diteeta awu. Yêyè udi neebe dyeyemena. Kabyena bikengela bwa kukwengelekaYe to. Wêwè kwèna mucu mutenteka, dimiinu disopakaja to. Udi mwena Kilisto mulelela. Nzambi ngudi ukupicishila ku diteeta awu, bwa kumona ciwenzà bwa bwalu abu. Amen. Kabyena bikemesha to paakamba Peetelo ne: “Mateeciibwa a kadilu aa, mona's, nùabalè bu disanka. Adi—adi a mushinga mukole bwenu nwènù kutamba ngòlò.

¹⁸⁴ Kadi misangu yàbûngì tutu twelakana bwa kwangata dipangadika twamba ne: “Kaa, ee, bu mêmè anu . . .” Ee, aci, ee, aci's ncintu kampanda cidi Nzambi ukupeesha, bwa kucimuna. Yêyè—Yêyè—Yêyè mmumanye ne wêwè neucimune. Yêyè, Yêyè—Yêyè mmuteeke dyeyemena Dyende mu wêwè.

¹⁸⁵ Ne Yêyè wakiitabuuja Abraham . . . Abraham wakiitabuuja Nzambi, eyowa's we. Ki Nzambi kwambaYe, kakuyi mpatà to, kwambila Sataana ne: “Mêmè's ndi anu mwa kukujaadikila ne, yêyè mmuNnange.” Yêyè ne: “Ndi . . . Yêyè mmwitabuuje mulayi awu, bwalu Mêmè ngudi mumwambile cyôci aci.” Pa nanku yêyè kwangataye mwanende mulela e kubàndayè nende, ku lusongo lwa mukuna, kumuswikilaye byanza paanyima, ciine aci, dituku divwa Nzambi mwambe nanku awu adi.

186 Izaka mwânà kumonaye bu bûngà bwalu, nudi bamanye's. Kwambaye, mu Genese 22, kwambaye—kwambaye ne: “Taatù?”

Yèyè ne: “Mmémè ewu, mwanaanyi.”

187 Yèyè ne: “Nkunyi's nyôyi eyi, ne cyo—cyo—cyoshelu ncyôci eci, ne bikwabo byônsò. Kadi—kadi—kadi mwânà wa mukooko wèpi,” nwamonu's, “bwa—bwa—bwa mulambu?” Kubangaye bu udi udyumvwa kâyi mu yèyè's. “Ebu bwalu, ebi byônsò ebi bidi bishi—bishi nunku? Tudi, tudi bashiye cintu kampanda's.”

188 Cyûdi wela meeji ne udi mushiye aci kacylene ne cìdici cishintulula to. Udi mushiye bwobumwe bwa bintu bikwabo byônsò. “Ee, s'bidi bikengela bwa wikale ne maafètès ebe a manayi a twarta. S'bidi bikengela wènzè *cikampanda*. S'bidi bikengela unweku ndambu wa twala's. S'udi mubishiye...” Kwèna ne cyûdi mushiye nansha cimwe to. Tungunuka, tumikila Dìyi. Nwamonu anyi? Ki cyônsò ncyôci aci, tumikila wèwè anu Dìyi. Kwèna ne cyûdi mushiye nansha cimwe to. tumikila wèwè anu Dìyi.

189 Yèyè kwamba ne: “Nzambi mmwambe ne: ‘Bànda nende mwab'ewu,’ ne yèyè mmufwanyine—mmufwanyine... Bànda kuneeku ku lusongó lwa mukuna eku. Ndi ne cya kwenza cintu kampanda. Pângàáfikà kuntwaku, Nèncyènzè.”

190 Ki kubândayè kuntwaku, ne kumuswikaye byanza, ne kumulaadikaye pa cyoshelu, mushindu *ewu*. Izaka mwânà awu kaakanunganaku to; ne butumike, nwamonu's, cimfwanyi cya Kilisto. Pashiishe paakatuulaye keele mu cimanga, ne kukokaye nsuki yende paanyima uyuumusha mwîsi, bwa kumushebeyaye, ki dituku-dya-B dya Abraham divwa ndyôdi adi; kaa, ekelekele, pavwaye, mwediibwe ku diteeta too ne dicincimikiibwa dya mushindu awu, dya mwanende umwepele wa balume.

191 Mpindyewu, wèwè mwikaleku anu wa nyuma, angata aci ùcyèlè ku diteeta, paakafila Nzambi Wende Yèyè mwine, nwamonu's, dituku-dya-B, civwaYe munange aci. Nzambi wakatamba kunanga ndelanganyi ya Adama yivwa midishinde ayi! Netwangate aci mu katanci kakese emu.

192 Monaayi, dituku-dya-B, dituku-dya-B dya Abraham divwa mpa Mukuna wa Yile, kwakamupetela Mukalenge mulambu pa kaaba kaa mwanende wa balume awu. Dinanga, nwamonu's, dinanga. Dyôdi dituku adi, Abraham wakajaadikila Nzambi, kakuyi mpatà nansha ya kânà to, lulamatu lwende. Abraham wakajaadikila Nzambi, diitabuuja dyende kudiYe, bwalu yèyè wakamba ne: “Ndi mupete mwânà ewu pânkaavwà ne bidimu lukama, mu kwitabuuja kwa mulayi. Ne Yèyè uvwa mungambile ne ndi taatù wa bukwabisamba. PiikalaYe undomba bwa mêmè kumushipa, Nzambi udi ne bukole bwa kumujuula ku bafwe.” Yoyôyò! Ekelekele, kaa, ekelekele! Aci's bivwa bikengela kufikishaci Presbytérien ku dyela dya mbila, kî mmwômò anyi? Nwamonu anyi? “Yèyè—Yèyè—Yèyè mwine mushindu mene

uvwaYe mumpeeshe mulayi, ne Yêyè—Yêyè—Yêyè kundeeja mpindyewu ci—cileeji cya cyôci eci's. Amen. Yêyè, Yêyè's mmucinjaadikile, bwa ne Yêyè utu ushaala mukwate ku Dîyì Dyende."

¹⁹³ Ee, Yêyè utu mutupete twêtù aba penyi? Mmu bukooya bwa mushindu kaayi mûndì mêmè ewu mupatuke? Mmu bwa mushindu kaayi mûdi wêwè awu mupatuke? Meeji etu adi penyi mu dinda emu? Mmujaadike cinyi bwa kwikalaYe munkaci mwetu? Kakwenaku mpatà pa bwalu abu to. Amen. Ne dyetu—dyetu dituku-dya-B's ndya cya bushuwa. Bikengela tudipete. Nwamonu anyi? Yêyè's mmudijaadike.

¹⁹⁴ Abraham kwambaye ne: "Yêyè mmucinjaadikile. Mêmè's mvwa nciyi ne mwânà. Nkaavwa—nkaavwa muntu mukulakaji. Mvwa nkumba, ne matrice a mukajaanyi akaavwa mamane kufwa. Ne twêtù tukaavwa...Yêyè ukaavwa ne bidimu makumi asambombo ne bitaanu, ne mêmè nkaavwa ne makumi mwandamutekete ne bitaanu, kadi Nzambi kwambaYe ne: 'Mêmè nênkupèèshilè mwânà ku yêyè awu.' Aci's ncikose bwalu. S'ki cyônsò cìwàku ncyôci aci." Abraham kwambaye ne: "Mêmè kuciitabuujà."

¹⁹⁵ Pashiishe Nzambi kumwelaYe, ku diteeta dya bidimu makumi abidi ne bitaanu. Kacyakatacisha Abraham to nansha kakese. Wàkapàtukamù mwikàle ne dikanda dya kanzèkelè dipite divwaye naadi ku ntwadijilu, mutungunuke anu ne kutumbisha Nzambi. Kakuyi mpatà to, Nzambi kutangila panshi e kwamba ne: "Musadidi kaayi ewu's we!"

Kwambaye, Sataana kwambaye ne: "Kaa, eyo."

Yêyè ne: "Yêyè. . ."

¹⁹⁶ "Kadi Mêmè—Mêmè nênkujaaadikilè ne yêyè mmuNnange. Kubànda nende kuntu kwaka, ku lusongo lwa kakuna kwaka, bwa kunyangakaja cileeji ciine. Kubànda nende kuntu kwaka."

Ki Abraham kukùbàndayè bwa kucyenza. Ncya bushuwa.

¹⁹⁷ Nunku Abraham, pakaavwaye anu ne ki dishebeya dya mwanende edi anyi, Nyuma Mwîmpè kumukwata ku cyanza, kwamba ne: "Abraham, lekela cyanza cyebe anu mwaba udici awu. Ngaamanyi ne wêwè udi muNnange." Amen.

¹⁹⁸ Muntu wa mushindu awu ki ûndì mêmè muswe kwikala, nnanga Nzambi nciyi ncyuka bidi byènzekà ne mbinganyi to. "Lekela cyanza cyebe anu mwaba udici awu." Yêyè ukwèla ku diteeta, mwaba udici cibengangana mene ne ebe meeji awu. Kadi, bu mudibi anu ne Dîyì ndidi dicyămbè, ùcyènzè anu dicyenza, nansha bishi. Nwamonu anyi?

¹⁹⁹ "Lekela cyanza cyebe anu mwaba udici awu. Ngaamanyi ne wêwè udi muNnange, bwalu kwèna nansha muNkandameene ne mwaneebe umwepele wa balume awu to." Yêyè kwamba ne: "Mu kubenesha, Mêmè nênkubènèshè," ne, "dimiinu dyende

nediimane mu ciibi cya mwena lukuna, ne yêyè neacimune.” Kaa, ekelekele! Ne yêyè mwine pende, kucimunaye’s.

²⁰⁰ Pashiishe ndambu, netwangate aci cya ne “dimiinu dya Abraham” aci mwab’awu. Eyo. Ncinyi. . .

²⁰¹ Mpatà yikaavwa myumuke Abraham. Paakumvwaye Dìyì dilelela, mpatà yakuumuka. Paakamonaye Nzambi ushindika Dìyì, mpatà yakuumuka. Dinanga kwangatadi mwaba wa mpatà. “Ngaamanyi ne wêwè udi muNnange, Abraham. Kwêna uNgeela mpatà nansha mikese to. Nansha muvwabi bikukengele ntanta mule wa dindila, wêwè uvwa anu kacya wânngiitabuuja. Mêmè kukulomba bwa kunyangakaja cileeji ciine cîMvwà mukupeeshe aci. Kukupeesha cileeji, pashiishe kukulomba bwa kucinyangakaja. Kadi wêwè udi muNnange bilenga bya kacya, mu mushindu wa ne udi ushaala mulame Dìyì Dyanyi kuyi ucyuka ne bwalu budi eku to.” Amen. Adi’s divwa dituku-dya-B dilelela bwa Nzambi. Nwamonu anyi?

²⁰² Yakobo wakapeta dituku-dya-B musangu kampanda. Ûvwa uciina bwa kwalukila kudi tûtùwèndè, bwalu uvwa mwenze bubu. Kadi, nansha nanku, Nyuma Mwîmpè wakabanga kumudimwija, munda mwa mwoyi wende ne: “Alukila ku buloba bwenu kûdi mufume. Wêwè udi mufumine ku buloba bwenu. Udi mwenze bubu kuntwaku, mpindyewu Nkaadi nkwalujaku.” Nenku mmwenge anu useemena pabwîpî apu, kupetaye. . . Mu bushuwa bwa bwalu, cya bushuwa’s.

²⁰³ Ki cidi dyabulu utamba kulumbacilangana neetu ncyôci aci. Nwamonu anyi? Ki cidi dyabulu utamba kulumbacilangana ne Mukaji-musela, Ekeleeziya, mushindu awu, bwa mpindyewu, cikaadi cyenda ciseemena pabwîpî ne dituku-dya-B. Ncya bushuwa. Ûkaadi wenda useemena pabwîpî menemene. Dîbà adi ki padi mwena lukuna wenza cyenzedi cyende cya citambe bubu, bwa kupambwishangana’s. Bible mmwambe ne: “Dyakabi kûdi buloba, bwalu dyabulu mmwenge bu nyama wa ntambwe mwikale ukungula, mu matuku a ndekeelu, wenda watwa eku watwa eku, udyà cyônsò cyaswaye aci,” nudi numona’s. “Dyakabi dyabo”; dikengeshiibwa ne bikwabo nebyenzeke. Shaala mukwateKu bikole. Kunyunguku to, nî nku dyabalume nî nku dyabakaji. Shaala wêwè anu ne Dìyì adi. Ki mudi Nzambi mwambe. Aci ncimane bwalu.

²⁰⁴ Yakobo, mwikale ujinga munda mwa mwoyi wende, maalu ônsò amweka bu enda bibi. Ûvwa ujinga kwalukila kwabo. Nyuma Mwîmpè nguvwa umulombola awu. Yêyè uvwa mwenzele Nzambi mulayi. Bivwa bikengela bwa kuyaye ku Beetèlà, bwa kafutaye byadiikumi ebi ne bikwabo. Kadi apa, mu njila wa dyalukila awu, kusanganaye ne Esawu, mwanaabo mwena lukuna wende awu, ùvwa—ùvwa usangananyiibwa anu dyamwamwa dya musulu, mumwindile, mwikale ne cilwilu. Pa nanku, Yakobo uvwa muntu mutulumuke, kadi nansha

nanku ùvwa ne mabenesha a Nzambi. Nzambi uvwa mulaye bwa kumubenesha. Yèyè nguvwa ne bukenji bwa bwanaabute. Amen.

²⁰⁵ Cimfwanyi kaayi cya Ekeleeziya leelu ewu, ne dibatiiza dya Nyuma Mwîmpè, ne mulayi wa Dîyi dya Nzambi bwa kucishindika, bwalu wêwè udi ulwa citupa cya Dîyi adi, bukenji bwa bwanaabute.

²⁰⁶ Nenku Yakobo nguvwa ne bukenji bwa bwanaabute abu. Amen. Yèyè nguvwa...Mwanaabo awu kavwa naabi yèyè bwalu to. Nenku yèyè nguvwa ne bukenji bwa bwanaabute, bwalu mwanaabo awu uvwa mumusumbishebu ku dilongo dya musabu.

Ki mudibi kabidi ne beena ekeleeziya leelu ewu mbasumbishe bukenji bwabo bwa bwanaabute.

²⁰⁷ Kadi twasakidila kudi Nzambi, twêtù kaayi tudi naaBu. Eyowa's. Twêtù tudi naaBu. Citudi tutacila didisangisha dya maeeleeziya ncinyi, ne Nsangilu wa Matunga, ne bintu bikwabo byònsò ebi, panùdi anu biikàle ne bukenji bwa bwanaabute?

²⁰⁸ Cidi cikengela bwa ekeleeziya kwenzaye, nkwenza bu Yakobo, kusambila too ne panudi nupeta dituku-dya-B. Nenku, cya bushuwa, Yakobo wakapeta manayi a mvita ya bibula. Wàkalwangana mvita ya bibula ayi bufuku bujima, ulwangana ne Mukalenge's, kadi kwambaye ne: "Mêmè ncyakuKulekelaku uya to anu mêmè mupete bucimunyi ebu." Nenku pashiishe pakaavwa kwîsù kwamba kutooka, dinda kampanda, kupetaye dituku-dya-B. Kàcìvwa kabidi wenda mushindu umweumwe awu to, nansha kakese. Kadi, luseke lwa *dyamunu*, ùvwa cidimba cya ekeleeziya cinene cya menemene, cya makanda, cya bwòwà. Kadi, luseke lwa *dyamwamwa*, ùkaavwa mwakwidi mukese, wa wenda utebuka, anyi mwânà wa mfumu's we, eyo; mwânà wa mfumu mukese, wa wenda utebuka, mwikale ne dikima dikumbane bwa kulwangana ne cilwilu cijima.

Esawu kwambaye ne: "Nênkupèèshè cilwilu."

Yèyè ne: "Ncyèna naaci dijinga to." Ùvwa mupete dituku-dya-B.

²⁰⁹ Twêtù katwena dijinga ne malongolodi abo awu to. Katwena dijinga ne bintakanyi byabo—byabo bya pa buloba abi to. Katwena dijinga ne byabo...bwa bikengela kukeba bwa kukumbanangana ne bintu bya pa buloba ebu to. Tukaadi bapete dituku-dya-B. Twàkalwangane mvita ya bibula dituku kampanda, anyi bufuku kampanda.

²¹⁰ Kaa, mushindu mwine wùndi mvuluka mvita ya bibula ayi, paa—paakakengelabi bwa mêmè kufwa ku mêmè mwine. Kadi kulwaku dituku-dya-B, pângààkapetà bucimunyi, dîbà adi Dîyi dya Nzambi kulwadi bulelela. Ekeleeziya wa ba-Baptistes, bwanyi mêmè, uvwa anu mudi bulongolodi bukwabo kana

bwônsò ebu. Neya bushuwa. Ngâkapeta dituku-dya-B. Dìyì dya Nzambi ndya cya bushuwa.

Docteur Davis kwambaye ne: “Mona’s, wêwè’s neushaale munsantu mubunguluki wa mu malaba.”

Mêmè kwamba ne: “Munsantu mubunguluki wa mu malaba, anyi nciyi munsantu mubunguluki wa mu malaba!”

²¹¹ Kwaka, ku Green’s Mill kwaka, ngâkashààla bufuku bujima mu disambila, too ne pàakalwà Mwanjelo awu muntwamu mu dinda adi, Bukênkè abu. KwambaYe...Cinyi? Mêmè’s mvwa nkeba kukosoloka ne cintu ciine civwa Nzambi mumpeshe bwa kudikwacisha naaci mu kulwangana kwa mvita, bikeena-kumona, pavwabo bangambila ne Civwa cya dyabulu. Pashiishe kulwaYe, ungambila, uteela Mifundu ne: “Kabaakambaku cintu cimwecimwe aci bwa Mwânà wa Nzambi, ne bakwabo anyi?” Mêmè kupeta dituku-dya-B. Kakucyena kabidi bya nanku awu to bwanyi mêmè. Mêmè kuya mu madimi a bwambi, ne mu nyungulukilu ne mu nyungulukilu wa buloba. Dituku-dya-B!

²¹² Nwamonu’s, Yakobo wakapeta dituku-dya-B edi. Yèyè wakalwangana mvita ya bibula, bufuku bujima. Kadi pakaavwa kwîsù kwamba kutooka, civwa dituku-dya-B bwende yèyè.

²¹³ Mishindu yônsò minene ya bucimunyi eyi ne bikwabo! Pândi nditwa mu dyakula pa maalu aa, kakwena mwaba wa kwimanyikila to, kî mmwômò anyi? Mishindu yônsò minene ya bucimunyi eyi yivwa anu mîmpè. Tudi twanyisha wônsò wa ku yôyì ayi. Yônsò ayi yivwa mmishindu minene ya bucimunyi. Mishindu minene ya bucimunyi ya mvita, ne mishindu minene ya bucimunyi ya mvita ya nyuma, ne bikwabo, yivwa minene. Kadi, nudi numona’s, kakuvwaku nansha umwe wa ku yôyì ayi uvwa ushaala kashidi to. Nwamonu anyi? Tudi ne bucimunyi bunene, bwa citupa cîpî. Mpindyewu, tudi anu . . .

²¹⁴ Tudi tusangana mwab’ewu ne, anu abidi adi panshi aa, patwakaya mu mvita ne Japon. Mona’s, ndi—ndi. . . Mu nzubu wetu twètù, muvwa kalumyana kakese menemene. Muntu kampana ngwâkatùpèèsha kaacilengà kakese, kaa, kakese menemene, nudi bamanye’s, kakese kenze bu kaaciipòpî. Nenku bavwa bafundepu ne: “Cyzela mu Japon.” Mulumyana awu kukiimanshaye panshi e kukazaazaye. Nwamonu anyi? Nenku wêwè mufwanyine kwamba ne: “Cyzela mu Japon,” s’bavwa baciimansha pambelu. Anyi, badi baya mu makajiinyi a bintu bya mushinga mupuutula, musùmbà wa ba-Rickys, nudi bamanye’s. Kî mbwena kwamba ne. . . Benzavi badi bayamu, mu makajiinyi a bintu bya mushinga mupuutula, anu bwa kudifyela cyanaana, nwamonu’s, babwelamu bangata bintu byenzela mu Japon. Bavwa baswe kuleeja lulamatu lwabo kudi ditunga kampana.

²¹⁵ Kadi bishi bwa Nzambi? Bakenya baMutangile mumpala’s. Nwamonu anyi? Bu ne bivwa bipeepele bwabo bôbô bwa

kunyeemena mu makajiinyi a bintu bya mushinga mupuutula ne kutonkola meesa a cisumbishidi, ne bintu bya mushindu awu, bwalu bavwa ne tuupòpî tukese ne tuubilengà, ne bikwabo, twenza ne . . . twenzela mu Japon, bwalu bavwa nende mu mvita; kadi bishi bwa dinwa dya mfwanka, ne dinwa dya maala, ne dishimangana, ne diiba, ne bintu bya mushindu awu, nwamonu's, bwa cilwilo cilelela cya Nzambi? Nwamonu anyi? Mbaswe kwikala ne lulamatu. Kadi bishi bwa twètù kwikala ne lulamatu? Byôbi bikengela bwa kuyabo mu buloko bwa ciine cyenzi aci, mbifwanyine kushintulula cinyi? Mbaswe kwikala ne lulamatu kudi ditunga kampanda, ku dibendela. Kadi mwena Kilisto yêyê utu ne bwôwà bu kamwe, misangu mikwabo, bwa kwakula. Nwamonu anyi? Ki bwa cinyi bidi bitukengela makwabo matuku-a-B, panwikala mwa kudicimwisha nwênù biine. Nwamonu anyi? Lekelaayi Nzambi anucimune ku bukole Bwende bwa dinanga.

216 Mishindu yônsò minene ya bucimunyi eyi yivwa nya citupa cîpî. Nansha mene, bwa Môsà, Izaleela's wakaalukila cyakabidi buludi mu bupika. Misangu yônsò, wamubwela wamupatuka, wamubwela wamupatuka, mutudi tucisangana's. Bilobo byâbûngi bivwa anu bitungunuke ne kulwangana mvita, kadi bifwa. Bacidi anu bacyenza mu mvita, mu dyakaja dya dimona dya tulondo twa mubidi. Badi bacyenza mu nyuma. Bilobo bidi bilwangana mvita ne bifwa. Mushindu mwine utudi bafwanyine kupweka too ne kwinshi's we. Ndi ne mulongolongo wa bôbò abu bândi mufunde mwab'ewu, bu mudi Danyeale, ne bânà baa beena Ebelu, ne bacimunyi banene baa kale wawa bàâkapetâ bucimunyi abu.

217 Kadi bôbò, kacya anu byatungunuka . . . ndekeelu wa byônsò bakafika ku cintu kampanda cidi cibiikidiibwa ne ndufu, lùbàngata, nwamonu's, nansha bishi. Bavwa anu batungunuka, nwamonu's, biikàle anu balwa mvita, bafwa; balwa mvita, bafwa; bapeta bucimunyi, bafwa; bapeta bucimunyi, bafwa.

218 Kadi, nudi numona's, twamb'eku twamb'eku, muntu kavwa mwenza bwa kufwa nansha. Muntu uvwa mwenza bwa kwikala ne mwoyi. Nenku byenzi binene bya bulobo bivwaye mwenze nansha biikàle bûngi kaayi, yêyê uvwa anu ufwa, anu mwende ne kale. Nenku tuvwa tuya ku lukita, bavwa bamujiika, nenku aci civwa cimana bwende bwalu. Bavwa bateeka cimanyinu pa lukita lwende ne dibwe dya ku lukita pambelu apu, ne majambu ende, nenku aci—aci civwa ndekeelu wa bwalu's. Lufu luvwa lùmumina. Môsà munene awu, Yoshuwa munene awu, bapofeta banene baa mu Bible abu, pamwe ne bwônsò bwabo, pa kuumusha batwe ku babidi anyi basatu, tudi bamanye mwaba udi nkita yabo yisanganyiibwa, mwaba wùvwà cimanyinu citeekiibwa pa nkita yabo. Lufu lwakabamina ne lwakabangata e kuya naabo. Nwamonu anyi?

219 Kadi dîngà dituku, kulwaku mvita kampana, kulwaku Mulwanganyi Munene wâkatûluka pa buloba, Yesu Kilisto, Mwânà wa Nzambi. Nenku kwakalwa Paasaka kampana. Aci ki civwa dituku-dya-B dilelela, paanyima paa Yesu mumane kulwà mvita ne mutambe bukole. Yêyè wakalwangana ne mulwishi yônsò uvwaku uvwa ukengela kulwisha awu.

220 Cintu cya kumpala, paakalediibwaYe, Wakalediibwa ne dînà dya bukooya, bwalu bwa kumpala, munkaci mwa bantu, bu Mwânà mulela mu masandi. Wâkalwangana Yêyè mwine mvita ayi too ne ku ndekeelu mu ciine aci. “Mariya awu, mmulele mwânà ewu ne Yozefu, kabayi baselangane to.” Yêyè wakalwa munkaci mwa bânà batekete, ne dînà kampana. Kadi, munda mwa mwoyi Wende, Yêyè uvwa mumanye ne Ûvwa Mwânà wa Nzambi. Nwamonu anyi? Yêyè wakalwangana mvita nansha nanku.

221 KufikaYe too ne ku dituku divwaYe mwa kwangata dipangandika dya civwaYe mwa kwenza, paanyima paa Yêyè mumane kupeta Nyuma Mwîmpè.

222 KufikaYe too ne ku dituku dyâkabândà Nende Sataana pa mukuna, ne kuMuleejaye makalenge ônsò a pa buloba, ne kwambaye ne: “NênKuvwija mfumu mpindyewu. Udi wamba ne Wêwè udi Mwânà wa Nzambi, ne Udi ne bukole. Mêmè nènKupêeshe bukookeshi bwa matunga ônsò,” anu cidi mufwilakanyi ne Kilisto uteeta bwa kwikala lelu ewu aci’s. Kadi kwakenzeka dituku-dya-B. Yêyè wakalwangana naaci. Wakamba ne: “Pawikala Mwânà wa Nzambi . . .”

223 Kulwaku cikondo cyakeediibwaYe kadyombo ku Dîyi. “Pawikala Mwânà wa Nzambi, tuma dîyi bwa mabwe aa andamuke mâmpà.” Nwamonu anyi? “Ne Wêwè mwine’s udi ne nzala, nanku àdyâku’s.” Nwamonu anyi? “Pawikala Mwânà wa Nzambi, s’Udi mwa kwenza aci.” Yêyè uvwa ne bukole bwa kwikala mucyênzè. Ncya bushuwa. Kadi bivwa bikengela kwikalaku dituku-dya-B. Yêyè kucimuna diteeciibwa adi. Nwamonu anyi? Yêyè kucimuna . . .

224 Kwambaye ne: “Mpindyewu Wêwè ewu’s udi mwa kwikala Muntu munene. S’Udi mwa kuDileejaku, cyÛdî.” KuMwangata apu, pa kaleyi, pa ntempelu, kwambaye ne: “Dyêlàaku panshi. Imana nKwambulwile Mufundu, Baakafunda ne: ‘Neambile Banjelo bwa kutangilabo bwalu Bwebe, bwa nansha pa dîbà kaayi Wêwè kulu tutuuta dikàsà Dyebe ku dibwe to, kadi baKwambule.’” Tangilaayi Sataana awu mudiye mwena teoloji. Nwamonu anyi?

225 “Pita paanyima Paanyi, Sataana,” mwâkalwà Dîyi’s. Civwa dituku-dya-B. Yêyè wakalwa ku dituku-dya-B dyônsò.

226 Yêyè kuya tamakatamaka too ne mu bwikadi bwa—bwa mamwëndè wa mukaji wa Peetelo mulaale panshi mwab’awu, ùsaama mubidi-luuya. Mubidi-luuya awu uvwa mulwe wa

ngwengwengwe mu mubidi wende amu. Bavwa dijinga ne dikwacisha. Yèyè kuya tamakatamaka e kumulenga ku cyanza. Disaamà kadyakapeta bukole bwa kukandamana mu Bwikadi Bwende to. Bushuwa's.

227 Pashiishe kulwaYe mwaba uvwa lufu lusanganyiibwa mu—mu famiye kampanda. Kwenzekabi ne muntu dîna dyende Lazârô, mulunda Wende, ukààvwa mufwe ne mumane kujiikiibwa, ne mwikàle mulaadika mu lukita, ne ununka mupuuya mubole, ku dituku diinâyi. Mubidi utu upeta dibola munda mwa matuku asatu, nwamonu's, mêmà makumi mwandamutekete ne abidi, dibola. Nenku kwenzekabi ne mwoyi ne lufu kushaalabi biimanyinangane ciimònààmèèsù. Ki Yèyè ewu, Mwoyi; ki lufu ndwòlò lwàlwa, lwangate mulunda Wende; mu diteetangana dya makanda. KuyaYe ku lukita, ne kukokaYe tuumakaaya tukese atu paanyima, kwamba ne: "Lazârô, patuka." Kaa, ekelekele! Adi Dîyi kadi kupatukadi. Divwa n'Dîyi dya Nzambi. Mwoyi kufukukawu cyakabidi. Uvwa mukwaciibwe awu kulwaye, upatukila mwamwa, mu mwaba kampanda, mwalukile ku mwoyi. Cya bushuwa. Yèyè kwangata bucimunyi. Ncya bushuwa.

228 Bubeedi, diteeciibwa, cyònsò civwà cifwanyine kwikalaku aci, Yèyè kubilwisha byònsò mvita. Dituku-dya-B! Cya bushuwa menemene.

229 Ki pashiishe kulwaku cikondo civwa buloba bujima bwikàle busanganyiibwa mu mindidimbi, mu myaba ya mindidimbi ya lufu; muntu yònsò, muntu wetu yònsò ewu, muprofeta yònsò, muntu munene yònsò, bilobo binene byònsò byakatumaYe abi. Bònsò abu bavwa balaadika muntwamu. Ki Abraham, Izaka, Yakobo, Yozefu, ne bònsò badi balaale mu lukita mwamwa naka bàba, biitàbùùje, kakuyi cîngà cileeeji to anu ne: "Dîyi dya Nzambi ndidì dyambe nanku. Nzambi ngudi mwambe nanku."

230 Tangilaayi Yobo pavwaye ulwangana bikole menemene apu. Mukajende, nansha mukajende mwine, mwena dyende awu, yèyè kwamba ne: "Nansha mweyelu wende ukaadi wa pabwawu kûndì," ne bikwabo. Yèyè ukaavwa. . .

231 Cikondo ciine cyàkapetà muntu awu, mateeciibwa's we! Nenku nansha kudi Beelesa ne bakwabo bònsò abu, kwambabo, ne Elihu mwine, kuteetabo bwa kumudyula, ne bintu bya mushindu awu. Kadi yèyè uvwa mumanye ne ùvwa mushaale ne Dîyi.

232 Ki mukajende kulwa e kwambaye ne: "Yobo, wèwè's wamweki bu mwena dikenga." Yèyè ne: "Bwa cinyi kuyi anu wela Nzambi mulawu kadi kufwa lufu?"

233 Kwambaye ne: "Wèwè's udi wakula anu bu mukaji mukutakane." Uh-huh! Kaa, ekelekele! Cilobo kaayi's we!

Nansha Yesu wakamuteela ne: “Kanwakuumvwaku bwa lutuulu lwa Yobo anyi?”

²³⁴ Yobo wakapweka mu cikokedi. Abraham wakapweka mu cikokedi. Eyowa’s, mukalenge. Izaka wakapweka mu cikokedi. Yozefu wakapweka mu cikunyi.

²³⁵ Yozefu wakamba ne: “Kanunjiiki muneemu to, nansha nanku. Nunjiike apa, nwamonu’s, nunjiike apa pamwe ne baataatù baanyi. Nunjiike mushindu wakajiikiibwabo bôbô awu, Dîyì, mu cibandabanda mwakajiikiibwabo bôbô amu, mu mwaba wakajiikiibwabo awu.”

²³⁶ Ncintu anu cimwecimwe aci mu mêmè. Ki bwa cinyi ndi muswe kujikiibwa mu Dîna dya Yesu. “Bwalu aba badi munda mwa Kilisto Nzambi nealwe naabo pamwe Nende,” nudi numona’s.

²³⁷ Pa nanku tudi tusangana, anu nanku anu nanku anu nanku, kwakatungunuka bilobo, bilobo, bilobo. Kadi ki cikondo ncyôci eci cyâkalwâ Kapiteena Munene, uvwa mubatume awu. . . Kadi bôbô bavwa bapone mu cyalu cya mvita, bacimunyi banene. Bavwa bafika ku matuku abo a-B, ne bavwa bapeta bucimunyi pa mwena lukuna. Bavwa mene. . .

²³⁸ Yoshuwa, mwikàle ne. . . uvwa ne. . . dijinga ne dîbâ, wakiimanyika dîbâ dya muulu ku dîyì dyende yêyè, ne dyôdi kadyakateema to. Ne dîbâ kadyakabwela to munda mwa mêbâ makumi abidi ne anaayi. Bible mmwambe ne: “Kakuvwa muntu nansha umwe, kumpala anyi paanyima paa cyôci aci, ukaavwâku mutumine dîbâ dîyì bwa kushaaladi diimane kaaba kamwe to, mu mushindu wa Nzambi uteeleja dîyì dya muntu.”

²³⁹ Bwa cinyi? Nwamonu’s, wâkafikisha mwena lukuna yônsò ku ditangalaka e kuya bimpâmbâmba. Nwamonu anyi? Bavwa anu, baakatangalaka e kuyabo bônsò bimpâmbâmba, myaba yônsò. Byakakengela bwa kuyaye wenda ukebangana naabo bwa kubashebeyaye. Ki cyônsò civwâku ncyôci aci, bwalu awu uvwa mmudimu wende mumutuma naawu. Ne yêyè uvwa mumanye ne, bufuku bwôbô budidinge anu bwîlè, bavwa bapeta dîbâ dya bôbô kudilongolola cyakabidi ne kudyenza cimuku, bya yêyè mufwanyine kujimija bantu bààbûngì. Pa nanku kwambaye ne: “Bidi binkengela dîbâ. Bidi binkengela bukênkè. Wêwè dîbâ, imana anu mwaba awu.” Amen. Éyì Nzambi wa yaaya. Nzambi wakateeleja dîyì dya muntu ne wakiimanyika dîbâ. Dyakashaala pa kaaba kaadi kamwekamwe aku munda mwa mêbâ makumi abidi ne anaayi, too ne mwakalwanganaye, kuumushaye mwena lukuna ku umwe ku umwe too ne mwakabajikijaye. Kabavwa mwa. . . Yêyè kaakabapaku dîbâ dya kudilongololabo cyakabidi to. Wâkatungunuka anu ne kuya kumpala.

²⁴⁰ Nenku, nansha nanku, Yoshuwa wakateeka mwoyi wende panshi, mmushaale mulaale mu lupwishi lwa buloba.

241 Kadi pàakalwà Mfumu munene ewu, Kilisto, Wàkamònàbo kudi Danyeale awu. . .

242 Mulwanganyi wa mvita munene awu, Danyeale, munkaci mwa ntatu yònsò ayi ne bikwabo abi mushindu awu, ne baa banene. . . Mwaba awu, bu ne tuvwaku ne dībà, tuvwa mwa kuteela bwalu bwende. Nansha nanku, yèyè wakalaala mu lupwishi lwa buloba. Yèyè wakamba ne: “Wèwè newikishe mu mwaba webe mu dituku adi, kadi, Danyeale, neujuuke cyakabidi.”

243 Mpindyewu, mulayi wakamupeebwa awu, wakapeebwa bilobo byònsò ebi awu, too ne, ndekeelu wa byònsò, cikondo kulwaci, dībà dya ntape nkutape, divwaci ne cya kufuciibwa. Yesu ukaavwa mulwe pa buloba. Ùkaavwa mucimune bubeedi bwònsò. Ùkaavwa mucimune byònsò. Mpindyewu Ùvwa ne cya kucimuna lukita.

244 Yèyè ukaavwa mucimune lufu. Lufu kaluvwaku mwa kushaala mu Bwikadi Bwende to. Kavwaku muyiishe ku citalu nansha cimwe to. To, mukalenge. Mukaji mukamba wa ku Nayina wakapatuka ne mwanende wa balume, mushindu awu. Yèyè kumwimanyika, kumubiishaye ku lufu. Kaa, ekelekele! Eyowa's, mukalenge. Wàkajaadika ne Yèyè uvwa ne bukookeshi pa lufu.

245 Mpindyewu kucivwa beena lukuna bakwabo babidi: ndukita alu kwaka naka, ne iferno; ngena, lukita. Pa nanku mu dituku adi paakafwaYe mufwe mu mushindu wa ne dībà dyakalekela kuteema, ne buloba—buloba bwakapeta dīsaamà dya mutu mnyunguluke, mbwebwe yakatuuka ku tukuna, ne bintu bya mushindu awu, kufwaYe. Wàkapweka mu iferno. Wàkacimuna lufu. Wàkacimuna iferno. Mu dinda dya Paasaka Wàkacimuna lukita. Amen.

246 Nwakula peenu bwa dituku-dya-B mu kaabujima? Dituku-dya-B dilelela: Wàkapatuka naabo. Ne kacìyi anu aci to, kadi, paakapatukaYe mu lukita, Wàkapàtuka ne bavwa bakwaciibwe ku bupika bàkaavwàmù abu. Bible mmwambe ne: “Wàkakwàta bapika e kuya naabo ku bupika.” Wàkapàtuka mu lukita, ùlwa Yèyè mwine, pamwe ne bilobo byònsò abi. Kanwenaayiku bamanye ne civwa ncikondo cya dicyonkomoka mwab'awu dituku adi, paakabwelabo—paakabwelabo mu Bukalenge abu, ekelekele, paakabwelabo mu Bukalenge bwa Nzambi, kupatuka ne bansantu bavwa bakwaciibwe ku bupika muntwamu abu! Yèyè's uvwa bucimunyi mu kaabujima, bucimunyi mu kaabujima. Wàkapàtuka ne bilobo byònsò bivwa bifwe abi. Wàkapàtuka ne Abraham, Izaka, Yakobo, Yobo, ne bakwabo bònsò baa kudibo abu, kupatuka naabo mu lukita pamwe Nende.

247 Wàkakwàtangana ku bupika. Nwamonu's, Wàkalwa pa buloba, Wakakwata lufu ku bupika. Wakakwata iferno ku

bupika. Wàkakwàta lukita ku bupika. Wàkakwàta bintu byònsò ku bupika. Nenku mpindyewu Ûdi ujuuka, amen, ne bansantu Bende pamwe Nende.

²⁴⁸ “Mpindyewu Yêyè wàkabànda mu Dyulu ne kwalujila bantu mapà.” Civwa ncinyi? Myele ya mvita, muteeke myele ya mvita mu byanza byabo, Dìyì, nwamonu’s, bwa kucimuna. Kaa, ekelekele! Yêyè wakabapeesha myele ya mvita, (ya cinyi?) Dìyì, bwa kucimuna cinyi? Bubeedi, mpekaatu, diitabuuja dya majimbu, bubi, bwa kufikisha cifukiibwa cyònsò cìdì ne mwoyi cìdì ne dijinga dya kwikala ne mwoyi aci, kufikisha cyònsò cya kùdìbi ku dimanya, dya ne: “Bwalu Mémè ndi ne mwoyi, nwènu peenu nudi ne mwoyi.”

²⁴⁹ Tudi ne mvita ya diitabuuja. Tulwanganaayi mvita mîmpè ya . . .Tujikijaayi bucimunyi bwetu, bwalu bucimunyi bwetu mu kaabujima mbwa cya bushuwa. Mbwa batwishiiibwe. Budi ne cya kwenzeka. Tukaadi babudiile misomo. Tudi ne cileeji cyabu munda mwa myoyi yetu patudi twakulangana apa, bwalu tukaadi bamane kushiya mvita ya kumpala paanyima peetu. Tukaavwa bakumbane bwa kucimuna, ku Diitabuuja dya Yesu Kilisto. Twâkapeta dituku-dya-B.

²⁵⁰ Ndi mvuluka kuntu kwaka, bu pa dîbà dikumi nanku awu bufuku kampanda, anyi pâmvwà nsanganyiiibwa kuntu kwaka mu nzubu mukese wa kale wa dilongolwela mashinyi wawa, nsambila ne: “Nzambi, anyi udi unshipa anyi udi unsungila.” Nkaavwaku muyaayaaye ku maekeleeziya. Bavwa bakeba bwa mémè kulwa kulabula muyiishi ku cyanza.

Mémè kwamba ne: “Cîndi mémè nkeba ncintu cipite aci.” Nwamonu anyi?

²⁵¹ Pashiishe mu nzubu awu wa dilongolwela mashinyi bufuku abu, pângààkambà ne: “Nzambi, ncyêna mwa kuya kabidi kule to. Nê—nêmfwe.” Nenku pâmvwà nsanganyiiibwa kuntwaku mu citanda cya kale, cibole mâyi cyacya, ne binù byanyi. . . Mvwa mutwe binù pa mufuku wa kale wa bisoosa, mwele byanza muulu, ngamba ne: “Nzambi, ncyêna mumanye mwa kwakula to, Mukalenge.” Mvwa muswe kuMufundila mukanda, bwa kuMulomba bwa amfwile luse. Ncivwa mumanye mwa kusambila to. “Ndi muswe kwikala mufwidiibwe luse.”

²⁵² Ngâkalaya aci pâmvwà munkaci mwa kupùnga ne lufu pa bulaalu apu. Ki Yêyè kundekela. . .Pàkaavwà ngangabuka mumane kundekela apu, mwoyi wanyi uvwa utuuta anu misangu dikumi ne mwandamutekete ku kasunsa. S’nudi bamanye lwendu alu muvwalu lutekete. Kwambaye ne: “Ûdi munkaci mwa kupùnga ne lufu,” ne mémè kuumvwa ciine aci. Kucyambilaye papa wanyi, kadi kukokaye bilàmbà bikudika bìvwà binnyungulukile abi. Nenku mwômò mu cibambalu aci, diine dîbà adi, mémè kumona J minene ayi yilwa eku ne eku kwònsò; cilàmbà cikudika aci civwa cinnyungulukile, mushindu

ewu. Mème kuumvwa munganga mukaji awu udila mwadi, wamba ne: “Wa bwalu mucikàle anu mwânà,” nwamonu’s, “kadi nyêyè ewu ukaadi uya.” Bwanga bwa dibenga kusaamisha buvwabo beele mu dyèbà dya mwongo abu buvwu butangalake bukambwele ne mu mwoyi. Nwamonu anyi? Mwoyi ukaavwa utuuta anu misangu dikumi ne mwandamutekete ku kasunsa kamwe.

²⁵³ Pângààkaalukilà kumbelu, byakakengela bwa mèmè kuleeja ciine aci patooke ne, mvwa—mvwa munange Nzambi. Ki mèmè—mèmè kutwa binù panshi apu. Mèmè kwamba ne: “Ncyèna—ncyèna mumanye mwa kusambila to.” Nenku mvwa—mvwa ndisuma mènù ku luzadi lwa cyàlà. Mèmè kudyambidila ne: “Pàmwäpa...Nkaadiku mumone bimfwanyi. Nèmvungè byanza byanyi mushindu *ewu*, mutwangaje minu.” Mèmè ne: “Mukalenge munanga, ndi muswe kwakulaku Neebe.” Mvwa mwa kuteeleja. Mèmè ne: “Ncyèna nKuumvwa to.” Mèmè kwamba ne: “Ndi muvunge byanza mu mushindu udi kawuyi wòwò to. Pàmwäpa bivwa bikengela mèmè kubivunga nunku *ewu*’s.” Mèmè kuteeka byanyi...Mèmè ne: “Mukalenge nunanga, ndi...Yesu Kilisto, ndi muswe kwakulaku Neebe.” Mèmè ne: “Mukalenge, ncyèna nKuumvwa to. Ngandàmùnèku. Ntu nkaadiku muumvwe bângà bantu bamba ne: ‘Nzambi mmwakule naanyi.’ Mèmè mpindyewu ndi muswe kuyiikilaku Neebe pa bwalu ebu. Mvwa muKulaye ne nèncyènzè. Ndi muswe kuyiikilangana pa bwalu abu. Bu Wèwè mwa kuswa udiku mwa kulwa ne kwakulaku naanyi anyi’s, Mukalenge?” Mèmè kudyambidila ne: “To, ncyèna muteeke byanza mu mushindu mujaalame to, bwa cyanaana Yèyè mmufwanyineku kwamba cintu kampanda.” Ncivwa mumanye mushindu mwine wa kubyenza to. Kacyakacya ncivwaku mwanji kusambila kacya bandela to. Ncivwa mumanye cya dyenza to; mu kaacisaasa kakese kaa kale aka.

²⁵⁴ Dîngà dituku, pashiishe, mèmè kudyambidila cyòcì eci. Mèmè kudyambidila ne: “Bilondeshile Mifundu, múnkaadi muumvwe bacibala, Yèyè uvwa Muntu. Nenku piikalabi ne Yèyè uvwa Muntu, Yèyè’s udi umvwa maalu bu Muntu.” Cya bushuwa. “Ne mpidyewu ncyèna mumanye Wèwè ní udi ungunvwa’s.”

²⁵⁵ Dyabulu kwambaye ne: “Mona’s, wèwè’s ukaadi mwenze mpekaatu mumane kuyiisha ne dyebe dituku dya ngàsà diine. Kadicyenaku kabidi to. Wamonu’s, wèwè utu mwena lwonji wa dikema, mu mushindu wa Yèyè kaciyiku mwa kukufwila luse to.”

²⁵⁶ Mèmè kwamba ne: “Bwa aci ncyèna nciitabuujuaku to. Ncyèna anu mwa kuciitabuuja to. Ndi ngiitabuuja ne Yèyè mmufwanyine anu kwakula naayi.”

²⁵⁷ Mèmè kwamba ne: “Mukalenge, ncyèna mumanye ní mmèmè udi mutupakane, piikalabi ne ncyèna muvunge byanza mu

mushindu mujaalame to, anyi nî ncinyi cyônsò, Wêwè—Wêwè umfwilèku anu luse bwa ciine aci. Kadi cîndi mêmè nkeba nkwakulaku Neebe.” Mêmè ne: “Mêmè ndi muntu wa mutambe kushaadila mupange kaneemu kudi bakwabo bwa pa buloba apa.” Mêmè ne: “Mêmè, ndi mwenzenze bintu byônsò ebi, ne—ne ntu nkaadi munyeemenyeeme kumpala Kwebe, ne byônsò,” mêmè kutungunuka ne dyakula mushindu awu.

²⁵⁸ Ki katanci aka, pâncivwà anu ngaakula apu, Bukênkè bukese kampanda kulwabu mu cibambalu amu, ne kuyabu lwà ku luseke lwa cimanu, ne kwenzabu nkuruse wa Bukênkè, Bukênkè bwabwa, ne kubangabu kwakula mu mwakulu kampanda. Kacyakacya, kacya ncivwaku mwanji kuumvwa cintu paaci ne ndyakula dya mu myakulu to; kacya ncivwaku nansha mwanji kubala mu Bible to; mêmè mvwa nkeba Yakobo 5.14 mu Genese. Mvwa ntangila kwaka, ki mêmè kumona Bukênkè abu, ne Buvwa bwakula mu mwakulu wa mushindu kampanda. Pashiishe Bwôbù kuyabu.

²⁵⁹ Ki mêmè kwamba ne: “Mukalenge,” mêmè ne, “ncyêna—ncyêna—ncyêna mumanye kantu nansha kamwe pa bìdì bitàngilà nsômbelu ewu wa bwena Kilsto to.” Mêmè ne: “Piikalabi ne—piikalabi ne awu ng’Wêwè uvwa wakula naanyi, ncyêna mwa kuumvwa mwakulu Webe to, Mukalenge. Kadi bu Wêwè mwa kwakulaku. . . Nenku pawikala Wêwè kuyi mwa kwakula wanyi mwakulu to, wamonu’s, ne mêmè—mêmè nciyi ngumvwa Webe Wêwè to, kadi swaku bwa tumvwangane mu mushindu ewu: bu Wêwè anu mwa kwalukila cyakabidi mwaba awu, aci kaayi neciikale cimanyinu pankaci paanyi Neebe, cya ne Wêwè wamfwidi luse.”

²⁶⁰ Ki Bwôbù abu cyakabidi. Kaa, nwakula peenu bwa dituku-dya-B? Mêmè’s ngâkadîpeta, eyowa’s, dituku-dya-B dilelela. Ki Bwôbù abu cyakabidi, bwakula mushindu umweumwe awu. Ki mêmè kupeta dituku-dya-B’s. Kaa, ekelekele!

²⁶¹ Nenku kubangila anu apu, paakateekaYe Dîyì mu cyanza cyanyi apu, ndi mulwanganelwangane mvita bwa kupeta difutu, bwa kwendela ne bwâtù pa mbù ya mashi.

²⁶² Twêtù bônsò tukaadi bapete bucimunyi kampanda. Tukaadi balwanganelwangane too ne ku mishindu yâbûngi ya dicimuna. Nenku bucimunyi bunene bulwalwa kataataka, bûdi pabwîpî menemene. Dyetu dituku-dya-B mu kaabujima dilwalwa kataataka, pââpandâ Mwânâ wa Nzambi maulu, ne kwela kwa lubila lukole lwa Dîyì dya Mwarkanjelo, ne Yêyè nealwe cyakabidi. Nenku nkita neyikanguke, ne bafwe nebapatuke.

²⁶³ Ndi ngeela meeji ne nutu nwela mikaba yanyi ya mêyi mwab’ewu, pa bidi bitangila cikeena-kumona cîntù mupete, anyi pa ditentemunyiibwa kampanda, cyônsò cîvwâci mwa kwikala aci, mu cibambalu kampanda; nenku mêmè mubânde kuntwaku ne mukamone bantu abu, kubamona anu mushindu

umweumwe wûndi nnumona nwênù ewu, Bible ewu muteeka muunzulula kumpala kwanyi. Ne Nzambi mmumanye ne mbulelela. Nwamonu anyi? Ki bôbò abu bàvwà mwab'awu bansonga, biikàle anu baa mwomumwe, baa mwomumwe . . .

264 Bu munùkaadìku nwênù bônso mu masangisha, ne bamanye, bikeena-kumona abi. Nukaadiku bamone nansha cimwe cipangile anyi? To, mukalenge. Anu abidi adi panshi aa Yêyè muntume muneemu bilondeshile cikwabo, mungambile civwà cyenzeke. Nwênù bônso, bwônso bwenu, nudi bacimanye. Nciye anu mu cyôci. Civwa anu mwaba'awu mene, anu mu cyôci menemene. Kacya kacitu cipangilaku to.

265 Nenu nyawu nzwambila, nwênù bu kasumbu kakese kaa beena Kilisto basômbe mwab'ewu mu dinda emu, shalaayi bakwate ku cyanza cya Nzambi cidi kaciyi cishintuluka aci. Nukaadi bapete bucimunyi bwa citupa cipì. Kadi kùlwalwa dituku-dya-B dilelela, dya mu kaabujima, paalwa Yesu.

266 “Nenu mpungi neadile; bafwe mu Kilisto nebabiike.” Nenu pawikala kuyi ne ditekemena adi munda mwebe to, kulekediku leelu ewu upita kuyi mudipete to.

267 Ndi muumvwe kaacintu kakese, katanci aka, kândi njinga kwambulula. Nkafumine, ngeela meeji, Billy Sunday nguvwa mwambe diyì adi. Kuvwa nsongaalume kampanda uvwa mwenze bwezavi. Ncyèna mumanye ní nukaadiku bumvwe bwalu abu, anyi ní kanutu banji kubuumvwa. Yêyè uvwa mwenze bwezavi. Kumwelabo mu buloko, bavwa ne cya ku- . . . Ûvwamù. Pa nanku kupicilaye ku cilumbu. Nenu—nenu ki nzuji kwambaye ne . . .

268 Ki beena kasumbu kaa bangaci baa mapangadika kupatukabo e kwambabo ne: “Tudi tusangana ne nsongaalume ewu mmupile bwa bwezavi abu. Nenu twètù,” kasumbu kaa bangaci baa mapangadika aku, mwakambabo, “tudi tulomba bwa bamushipe.”

269 Nenu nzuji kwambaye ne: “Mêmè—mêmè ndi nkosa cilumbu ne wêwè cyebe ndufu, lwa bakwowa ku mwonji, too ne piikala mwoyi webe wa cifwaka awu muye. Kadi Nzambi afwileku musuuka webe awu luse.”

270 Ki kwangatabo nsongaalume awu ne kumwelabo mu buloko, ne kumwelabo mu buloko bwa munda, bwa kushaalaye mwômô amu too ne dîbà divwaye ne cya kufwa.

271 Kadi balunda bende kulwabo kudi nzuji awu, kwambabo ne: “Nzuji, twètù aba's mbaakenza ne mwetu mwônso bwa ne bakusungule mu cimenga emu. Bu wêwè mwa kuswa, bu wêwè mwa kuswa, kwitabiku bwa nsongaalume wa cintende wawa afwe mushindu awu to.”

272 Ncidi mfuminaku ku Texas, bwa mukwabo, cintu cya mushindu awu. Nsongaalume wa citende ne nsongaakaji, ne Nzambi musungile myoyi yabo. Bavwa ne cya kufwa, matuku bu

asatu anyi anaayi nanku awu paanyima paa cyôci aci. Ngeela meeji ne nwênù bônso nuvwa bamone cibejibeji aci, nuvwa naanyi kuntwaku, bwa ne mbasungile myoyi yabo.

273 Pa nanku bôbò kulomba, kulomba, kulomba, bantu biine abu's, bwa ne yêyè kenjiku bwalu abu to. Nenku paanyima paa cikondo kampanda, kwa nguvena wa ditunga adi . . .

274 Maamù, pambelu paa ciibi, dîngà dituku, kudylaye panshi ku ciibi aku, mushindu *ewu*, ne kwelaye mwadi wa ciboobo bwa kubwelaye.

275 Ki ndekeelu wa byônso muntu kubwelaye, kwambaye ne: “Mamwëndè wa nsongaalume awu, nguvena wa yaaya, nyewu—nyewu udi pambelu pààpa. Ûdi ujinga kumonanganaku neebe.”

Ki nguvena kwambaye ne: “Mubwejaayi.”

276 Nenku mukaji awu, mu kudipwekesha kwônso, ùvwa wènda ukalabila ku byanza ne ku makàsà, too ne kuvwa nguvena, kumukwataye ku bilatu, kwambaye ne: “Mukalenge, mwànà awu mmwanaanyi. Kumushipiku to. Kumushipiku to. Yêyè ki umwepele ûndiku paanyi nende. Kumushipiku to.” Yêyè ne: “Kavwa ne meeji a kwenza nanku to. Mukoseleku anu buloko bwa kashidi. Kadi kuumushiku mwoyi wende to, nguvena wa yaaya.”

Nguvena kwambaye ne: “Ee, nênye kamumona.”

Awu ne: “Eyo.”

277 Ki nguvena kuyaye ku cibambalu cya buloko civwaye usanganyiibwa aci, ne bôbò kubwelabo. Nsongaalume awu uvwa muswe kwikala mwena dyambu. Kwambabo ne: “Kudi muntu udi muswe kukumona.”

278 Ki nguvena kubwelaye, kwambaye ne: “Nsongaalume, ndi muswe kuyiikilanganaku neebe.” Yêyè kadi kuteekaye dyambu bya bibi be, kushaalaye anu kacya wàsombela panshi, mupuwe vii, kayi muswe kwambaku bwalu nansha bumwe to. Kwambaye ne: “Nsongaalume, s'ndi muswe bwa wêwè kwakula naanyi. Ndi muswe bwa kuyiikilangana neebe.” Kadi nsongaalume awu kwenzaye anu bu ne kavwaku nansha mumuumvwe to. Ki awu kwambaye ne: “Nsongaalume, mêmè ndi mwa kukwambulwisha bu wêwè mwa kunganyishila.”

279 Yêyè kwamba ne: “Patuka mwab'ewu. Ncyêna muswe kuumvwa biine byûdi naabi bya dyamba abi to.”

Yêyè kwamba ne: “Ee, mwanaanyi wa balume . . .”

280 Yêyè ne: “Bwikila mukana mwebe amu. Kwêna mumone ne mutu mmunnyunguluke anyi? Ncyêna muswe kumvwaku dîyì nansha dimwe dyûdi muswe kwamba to.”

Yêyè ne: “Ee, mêmè ndi mulwe . . .”

Yêyè ne: “Patuka mu cibambalu cya buloko emu.”

Pa nanku kupatukaye's. Kukangabo biibi.

²⁸¹ Nenku paakaalukilaye, mulumyana awu, mpulushi wa—wa ku cibambalu cya buloko aci, wa ku ciibi aku, kwambaye ne: “Wèwè kadi ki muntu mutambe kukutakana wetu wa.”

Yèyè ne: “Mwine muntu wa meeji makonyangale awu uvwa nganyi pende's twamb'eku twamb'eku?”

Awu ne: “S'ùvwa nnguvana wa ditunga.”

²⁸² Yèyè ne: “To, nguvana to. Muntu umwepele udiku mwa kumfwila mèmè ewu luse, ki ùndì mwipate mu cibambalu cyanyi cya buloko. Muntu umwepele udiku mwa kutwa cyâlà bwa difwidiibwa dyanyi dya luse, ki ùndì mwipate mu cibambalu cyanyi cya buloko.”

Nguvana mmwenze anu upatuka, kwambaye ne: “Yèyè wamanyi kudisungwila.”

²⁸³ Pa nanku, cintu cya ndekeelu cyàkambà nsongaalume awu, paakamwelabo cibwikilu cifiike kwìsù, bwa kumwowabo, pààkabàndishàbo mwonji ne kuwunana ndendende, bamwele cibwikilu kwìsù, wàkamba ne: “Anji elayyi peenu anu meeji. Nguvana's nguvwa mwimane mu cibambalu cyanyi cya buloko ne mufwanyine kwikala mumfwileku luse bu mèmè nciyi mumwipate.”

²⁸⁴ Tudi bamanye munyi, mu dinda emu, ní Nguvana kî mmwimane ku luseke lwa cyetu cibambalu cya buloko mu dinda emu? KuMwipaciku to, pawikala kacyakacya kuyiku mwanji kupeta difwidiibwa dya luse dya kudiYe. Kayi anu Nguvana to, kadi Mfumu, Umwepele Udi mwa kukufwila luse awu, Yèyè's udi mwa kwikala mwimane ku luseke lwa cibambalu cikese cya buloko aci mùdì musòmbèle kukaadi ntanta mule amu. Bwa cinyi kuyiku mwa kuMulekela ubwela, pawikala kuyi—kuyi mucyènzè, pawikala kuyi mudilekelele wèwè yònsò kudiYe?

²⁸⁵ Dìngà dituku, wadyakusangana ne mushindu mukese wa mudìpwekèshe ewu, wùdì wèwè mufwanyine kwela meeji ne udi anu musùmbà wa bantu bakutakane ewu, musùmbà wa bantu badi kabayi bamanye cidibo bamba to, neusangane ne, Nguvana udi mwab'ewu mu dinda emu. Pawikala ne dijinga, pawikala mu kaacibambalu kakese kampanda kaa buloko bwa màsaamà, mùdì kuyiku ne mushindu wa kupatuka to, Nguvana nyewu udi mwab'ewu. Nguvana wa buloba bujima, Yèyè mmujaalame, ne Yèyè neakupatule. N'Yèyè ewu mulwe. Mmwele cyâlà bwa difwidiibwa dyebe dya luse. Mmuswe anu cyaanaana bwa kukupeeshalu, mu dinda emu. Kulubengi to.

Twinyikaayaaku mitu yetu bwa katanci kakese.

²⁸⁶ Pawikala muswe bucimunyi bulelela mpindyewu, ne mutu webe mwinyika, bwa cinyi kubenga kudilekelele ne kushiila Nguvana wa ditunga awu, kushiila Nguvana bwa kwelaYe cyâlà bwa difwidiibwa dyebe dya luse mu dinda emu? Mmudilongolole

bwa kukupatula; kukupatula mu mpekaatu, kukupatula mu bupidya, kukupatula mu màsaamà, kukupatula mu cyònsò ciwaswa aci. Enza nanku patudi tusambila apa.

Mpindyewu sambiláku mu mushindu webe wêwè mwine awu. Akùlákú Nende. Nwamonu anyi?

²⁸⁷ Mulami wa ku buloko's uvwa mufwanyine kwikala mwakule ne nguvena. Aci kacivwa ncifwanyine kwikalaku ne dikwacisha to. Nwamonu anyi? Bivwa bikengela bwa nsongaalume awu yêyè kwakula ne nguvena. Nwamonu anyi?

²⁸⁸ Bidi bikengela bwa wêwè kwakula ne Nguvena. Pawikala usaama, akula Nende. Pawikala mwenze mpekaatu ne mwenze bubi, akula Nende. Yêyè ngudi ne difwidiibwa dyebe dya luse.

²⁸⁹ Taatù wa mu Dyulu, tudi ne kusakidila. Ne mêmè, Mukalenge, ngudi Neebe dibanza dinene be. Kakwena mushindu nansha umwe wùndì mufwanyine kufuta dibanza dya mpekaatu wanyi to. Mvwa nsanganyiibwa mu cibambalu cya buloko dîngà dituku, bwalu ndi mulediibwe mu cyôci cibambalu cya buloko aci. Mvwa mumanye cìvwà—cìvwà budishikaminyi buumvwija. Kadi mushinga uvwa munene menemene, mu mushindu wa nciyiku mufwanyine kuwufuta to. Kadi ndi ne disanka dîngi dya ne, dituku diWakalwa kumona cibambalu cyanyi cya buloko, mêmè ngâkadîjîngulula ne, ùvwa n'Yêyè awu nkaayende uvwaku mwa kufwa luse. Mushindu umwepele wùmvwàku mufwanyine kwikala mudishikamine, ne kupeta bucimunyi, bucimunyi mu kaabujima, ùvwa ngwa kwitaba difwidiibwa dya luse dyùvwà Wêwè mwelele cyâlâ bwanyi mêmè adi. Nenku leelu ewu nyewu nkaadi mudishikamine.

²⁹⁰ Ndi ne disanka dîngi, Mukalenge. Ntu nya ngenda mmona nzubu ne nzubu wa buloko, kudi aba badi ne ntatu mu mabaka, aba badi ne mabeedi ne mibidi-luuya, aba badi ne mabeedi ne mu maloko, aba badi mu mpekaatu ne mu maloko, aba badi ne dilubakana, ne mpatà, ne mu maloko. Ndi ngenda nya ku cibambalu ne ku cibambalu cyònsò cya buloko, mbambila ne, Nguvena nyawu ulwa paanyima apa, ufwila muntu ne muntu yònsò luse, mwikàle upatula muntu ne muntu.

²⁹¹ Taatù, Wêwè udi mumanye myoyi ya bantu mwab'ewu leelu ewu. Swaku bwa eci cìikalè dituku-dya-B, dituku-dya-B mu kaabujima. Swaku bwa eci cìikalè dituku diìkalà muntu ne muntu, Mukalenge, leelu ewu, mwa kupeta bucimunyi. Enzaku nanku, Mukalenge.

²⁹² Swaku bwa mubeedi yònsò ondopiibwe, udi mu nzubu emu leelu ewu awu.

²⁹³ Swaku bwa elu luseke lwa cipeela lwikale cikondo cìikalà Dìyì dya Nzambi mwa kwakwila mu kadilu kaa—kaa diitabuujja kâdi kâteemà. Èyì Nzambi, kadilu kakese kâdi kâteemàmu aku, kaa diitabuujja, ditekemena dikese didì diteemàmu adi, swaku

bwa Dìyì dya Nzambi dyakwilemu, dyakula ne mwena buloko yònsò mu dinda emu, dyamba ne: “Nyewu Ndi mulwe leelu ewu bwa kukushiya mudishikamine.” Kwòkò kwikale mwânà wa balume anyi wa bakaji, muntu mulume anyi muntu mukaji, mwab’ewu, Mukalenge, udi kayi muKumanye bu Musungidi wende, swaku bwa kaaDìyì kakese aku kaakule, kaadiitabuuja kakese aku, Dìyì diikàle dyakula mpindyewu dyamba ne: “Eyowa, ndi ngiitabuuja ne Nzambi udiku. Ndi ngiitabuuja ne Yèyè udi cyònsò cidibo bamba ne ki cidiYe aci.” Nenku, Mukalenge, enzaku bwa kaadiitabuuja kakese aku kamuvwije mudishikamine anu patudi twakulangana apa. Enzaku nanku, Mukalenge.

²⁹⁴ Bábènèshèku. Beneshaku Mwaneetu Isaacson mwab’ewu, Mukalenge. Tudi banange nsongaalume ewu ne mukajende, ne bânà bende bakese. Beneshaku kaekeleeziya kakese aka, Éyì Nzambi. Bwalu, twètù tudi ne disanka dîngì bwabo bóbò, tudi ne disanka dîngì dya kumona ne badiku ne ciikishilu mwab’ewu, ne mwaba munda emu. Wèwè udi mudileeje mwîmpè be kudibo, Mukalenge. Ne twètù tudi ne kusakidila kwábûngì kûdi Wèwè. Swaku bwa kushaalabo misangu yònsò anu badipwekeshe ne baa kalolo, mu Bwikadi bwa Nzambi.

²⁹⁵ Beneshaku mwenyi udi mutwëndèle mwetu muneemu ewu. Beneshaku mutukumbudi ewu, Mukalenge. Tudi tulomba bwa Wikaleku naabo. Ne piikalabo kacyakacya kabayiku banji kupeta bucimunyi mu kaabujima ebu to, kudibo mwa kutwa “amen” ku Dìyì dyònsò didi Nzambi wamba, dîbà adi, Mukalenge, swaku bwa diitabuuja dyabo mu dinda emu, didibo naadi kûdi Wèwè adi, ditwe “amen” ku Dìyì dyònsò. Enzaku nanku, Mukalenge.

²⁹⁶ Tübènèshèku bònsò pamwe. Sungilaku babeedi, ne badi ne ntatu. Dyǎngàcìlèku Wèwè mwine butumbi.

²⁹⁷ Nenku, Nzambi munanga, swaku bwa katwikadi mwa kupampakana mpindyewu paanyima paa ciine eci to, kadi tuvuluke ne mateeta aa ne bikwabo byònsò bìdi bitùvwilà ebi, bidi byenjiibwa anu bwalu Nzambi mmutunange. Yèyè ngudi utupeeshabi, bwalu mMutwèyèmène. M’Mwitabuuje ne twètù netwikale. . . ne tudi ne diitabuuja ne dinanga Bwende Yèyè, ne netwikale ne bukole bwa kucimuna. Yèyè ki watangila bwalu abu. Nenku swaku bwa twètù katwikadi tupampakana ne—ne kubinduluka bwa bwalu abu nansha. Swaku bwa twètù kuyaku anu cyanaana ne kwamba Dìyì, ne kuya kumpala. Mbù neyikanguke. Matuku-a-B nealwe. Enzaku nanku, Mukalenge. Nenku swaku bwa edi diikaleku dimwe dya ku matuku-a-B a matambe bunene a cyetu cikondo. Utubenesheku too ne patwasangila cyakabidi, mu Dîná dya Yesu Kilisto. Amen.

²⁹⁸ Ndi muswe kwamba nunku, kumpala kwa kukengelabi bwa mêmè kuya. Ndi ne dîbà dimwe ne citupa mpindyewu, bwa

kufika ku Tucson. S'nkantanta kakese kaa dyendesha mashinyi. Kadi ndi muswe kwamba nunku ewu, ne ndi musanke bikole be bwa diikala dyanyi dya mwaba ewu ne dyumvwa dya diitabuuja edi—edi dinudi naadi. Kanudidingiku nwâya kule ne cyôci aci to. Kaamudilu kakese aku kiikale kateema anu kuteema. Nenku vulukaayi ne, Nzambi utu wakwila mu tudilu twa tukese atu.

²⁹⁹ Mwaneetu Isaacson, ncyêna—ncyêna anu mumanye mwine mwa kubyamba to, mushindu mwine wûndi ne kusakidila's, mûdi anu mupete mushindu wa kulwa muneemu emu ne—ne kusanga kasumbu akaa—ka pamwe. Nzambi asweku, mwaneetu wanyi, akupe dikanda dya kutungunuka. Ne nwênù badi balwe bwa kuteeleja abu, Nzambi asweku anupe dikanda, dikanda dya kûdi Nzambi, bwa nwênù kutungunuka. Mpindyewu byôbi ne . . .

³⁰⁰ Ngeela meeji ne nudi ne ditangalajangana dikese dya ciibidilu mu katanci kakese emu, mushindu awu, Mwaneetu Isaacson. Nêmmwalùjile yêyê bulombodi bwa disangisha.

³⁰¹ Nenku kwôkò kwikale muntu wa kunudi mwaba ewu, mwikàle ne, mwikàle uyiila pa bidi bitangila dibatiiza mu Dîna dya “Yesu Kilisto” pamutu paa myânzù ya “Taatu, Mwâna, Nyuma Mwîmpè,” mpaasata wetu mukese ewu, mmudilongolole mwaba ewu, ne disanka dya kwenza cyôci aci, bwa kwenza dibatiiza adi. Piikalaku ntatu munda mwa mwoyi webe, wêwê ujinga bwa yêyê kusambila neebe bafwileku, nyêyê ewu anu mwaba ewu mene bwa kucyenza. Nenku mêmè . . . anu mmumanyinaku, ne—ne ntuutakeena nende, nsòmba nende, ne bikwabo, nyuma mukese mulenga wa bwena Kilisto, wa kalolo, udi usanganyiibwa munda mwa mwaneetu wa balume mutekete ewu. Nenku—nenku ndi mutwishiiabwe ne Nzambi utu umvwa disambila bu nanku awu.

³⁰² Kale wawa kuvwa muntu mukulakaji kampanda uvwa musòmbèle mu citupa cyetu cya buloba, dîna dyende Hay. Yêyê uvwa muntu mukulakaji mwîmpè. Ûvwa . . . Dîbà dyônsò muntu kana yônsò . . . Ûvwa wa didipwekesha ne wa kalolo. Kadi, bamwe baa kudibo bavwa beela meeji ne yêyê uvwa anu mutendeleedi wa cimfiikaamunda anyi cintu kampanda. Kadi, nudi bamanye's, pavwa muntu kana yônsò mwa kusaama, bavwa babiiکیدisha mukulumpe Papa Hay bwa kulwaye kumusambidila. Dîbà adi kavwa muntu wa cimfiikaamunda to nansha kakese. Ûvwa anu muntu mulelela. Nenku musalaayi mukulakaji awu . . .

³⁰³ Mwena dyabulu mukwabo uvwa musòmbèle ku lusongo lwa kakuna kwaka, ùvwa ne ferme wende. Ûvwa mulunda wa papa. Tàatù uvwa unwa maala. Ndi muumvwe bundu bwa kucyamba. Kadi, bulelela budi anu bulelela, nudi bamanye's.

Bible ki cintu cimwepele cidì cyamba Bulelela. Nwamonu anyi?

304 Mpindyewu, tudi ne mukanda udibo babiikila ne ngwa maalu malonda; mmwambe ne kacyakacya George Washington kaakambaku yêyè mashimi to. Mêmè ndi ngeela aci mpatà. Ndi ngeela aci mpatà. Eyowa's, mukalenge. Ndi. . . Mêmè—mêmè—mêmè ncyèna—ncyèna ngiitabuujaku aci to. Mwânà udi mwa kwenda kukola. . . “Wèwè udi mulela mu mpekaatu, mufwimba mu bubu, mulwe pa buloba mwikàle wamba mashimi,” mudi Bible wamba. Pa nanku mêmè—mêmè ndi ngeela mpatà awu mmwenenu wa maalu malonda wa George Washington. Kadi mukanda awu udi wamba anu luseke lwimpè lwa muntu awu.

305 Bible utu wamba nseke yònsò yibidi ya bantu. Lota uvwa muntu mwimpè mu Sodoma mwamwa. “Mpekaatu ya mu cimenga aci yivwa yitacisha musuuka wende mwakane.” Kadi, nansha nanku, Kàakapanga kwamba ne yêyè wakalaala ne mwanende wa bakaji ne wakalela nende mwânà to, nwamonu's. Ùdi wamba nseke yaci yònsò yibidi. Pa nanku tudi ne cya kwamba nseke yònsò yibidi.

306 Wanyi tààtù, pende unwa maala's, ùvwa ùsòmbasomba ne mwena dyabulu ewu. Kadi ùvwa mwa kwikala useka mwine mukulumpe ewu. Ùvwa anu wenza umusendeka. “Mukulumpe Pop Hay,” mututu tumubiikila's, “Papa Hay,” anu ne kajengu kaa nsuki. Ùvwa muyiishi mukulakaji. Nenku bavwa dijinga ne mvula musangu kampanda. Bikunyiibwa byabo bikaavwa byònsò byuma. Ki kulwabo ku kaekeleeziya kakese kampanda, kakayi nansha kapite aka nunku to, kabiikidiibwa ne Little Opossum Kingdom, lwà mundekeelu mwa Kentucky mwamwa. Nenku paakayabo kuntwaku, badi bamba ne yêyè wakamba ne. . .

307 Yêyè, mukulumpa Papa Hay awu, uvwa ne kantu kavwaye wenza kwamba. Ùvwa anu wenza kwamba ne: “Munanga wanyi, benesha musuuka wanyi.” Muntu mukese, mudipwekeshe awu, ùbànda pa kabalu kaa kale, muyiishi wa njila wa kale. Nenku bavwa pàmwàpa bamufuta cisaka cya mawoji maanyika, nudi bamanye's, ne bikwabo byònsò bivwabo paabo naabi abi, nudi bamanye's, ne ndambu wa mafuta a mabengu anyi cintu kampanda. Mushindu awu, nudi bamanye's, awu ki mushindu uvwabo bafuta bayiishi baa njila baa kale. Bààbùngì baa kunudi kaaba aka mbavuluke bayiishi ba njila baa kale baa ku Esete.

308 Nenku dīngà dituku bikunyiibwa bikaavwa byuminyina. Ki mukulumpe Papa Hay kwambaye ne: “Ee, munanga wanyi, benesha musuuka wanyi.” Paanyima paa yêyè mumane kwenza kaadisangisha kakese bu aka nunku. Kwambaye ne: “Bu muntu kana yònsò wa kunudi muswe kushaala bwa kusambila bwa mvula, bwa Nzambi alame bikunyiibwa byenu abi,” yêyè ne, “shalaayi naanyi.” Ki ekeleeziya mujima kushaalabo nende.

309 Papa, pambelu apu, kuyaye lukasa kuntwaku, mucikàle anu nsongaalume, kwangataye ciseba cya disòmbela civwà pa kabalu

kende, kuciteekaye—kuciteekaye mwinshi mwa ekeleeziya amu, bwalu ùvwa mumanye ne mvula nealoke.

³¹⁰ Mukulumpe awu kutwaye binù ku cyoshelu. Yèyè kàvwakù nansha mwanjì kuumuka ku binù aku to. Mbambe ne, bu dībà dijima nanku awu pashiishe, kuumvwaye mutooyi. Yèyè kukenzakana. Divuba difiike divwa dyenda dilwa dipicila pa kakuna apu. S’ki bwalu mbwòbò abu. Nwamonu anyi?

³¹¹ Mwena dyabulu awu, wa munkaci mwa balunda baa papa uvwa usendeka muyiishi mukulumpe awu awu, pàkaawàye ùfwa, byakakengela bwa kumulaminabo mu bulaalu. Ùvwa mupete dīsaamà dya cyāmbù dya mubidi-luuya wa cīfōyiidā. Bāābūngī baa kunudi nwēnù aba pāmŵāpa kī mbafwanyine kumanya ne civwa ncinyi to. Kaa, ncintu cibi be. Ki kulwanganaye ne ba-démons munda mwa mēbà ne mēbà, munda mwa matuku asatu anyi anaayi. Ùvwa mwa kwamba ne: “Charlie, Charlie.” ntatwānyī awu. Kwambaye ne: “Kumulekediku unkwata mēmè to. Kumulekediku unkwata mēmè to. Kwēnàku umona mudiye musòmbè ku luseke lwa bulaalu bwabwa amu anyi, ne minyoololo ayi mimujingila pambidi pajima? Nwēnù Kanumulekediku unswika mēmè naayi to. Kaa!” Kwelaye mikunda. Ne bōbò bavwa mwa kumukwata, bantu banaayi anyi bataanu bavwa mwa kumucincimikila mu bulaalu, kumpala kwa kufikaye ku difwa.

³¹² Mu Kentucky mwamwa, bavwa ne bikudikidi bya kale byele mulongo ku cimanu kuvwabo bakudikila bilāmbà. Kudiku muntu ukāādī mumone nzubu wa mushindu awu anyi, mudibo baase cikudikidi?

³¹³ Nenukū yèyè uvwa mukudikeku nkooci wende wa mvula. Kwambaye ne: “Charlie, kudi mpintā wa whisky mu mpaaya wanyī amu. Ndaaku, umumpeeshile bānā baanyi.”

³¹⁴ Kadi mukajende, mwena Kilisto, mu cikukù amu, kwelaye lubila, pende’s mwikāle wipika cyakudya cya mundaamuunya. Kwambaye ne: “Ncyēna mufwanyineku kwenza aci to.”

³¹⁵ Ki kushaalabo bamulamine mu bulaalu too ne paakafwaye, ulwangana ne démons bwa kumushiilayi mwaba.

³¹⁶ Mukulumpe Papa Hay, mwine uvwaye useka awu, yèyè pakaavwaye pabwīpī ne kufwa, ne bidimu bitwe ku makumi mwandamukulu ne bitaanu, makumi citeema, yèyè wakaya kalaala. Ne bānā bōnsò kudisangishabo muntwamu. Biikūlū baa biikūlū bende baa bakulumpe kudisangishabo banyungulukile bulaalu. Kukatamukaye. Ukaavwa ne myedi mitooke, nudi bamanye’s, kajengu kakese kaa nsuki mitooke ku mutu. Civwa. . .Ku lusongo lwa mutu wende aku, dibāla. Kunyungishaye mwedi wende awu, kwambaye ne: “Munanga wanyī, benesha musuuka wanyī.” Yèyè ne: “Nwēnù bōnsò aba nuvwa beele meeji ne mukulumpe Papa Hay ukaavwa mufwe, s’mmwòmò’s?” Yèyè ne: “Ee, mēmè ncyēna mwa kufwaku to.”

Yèyè ne: “Ndi mufwe kukaadi bidimu.” Yèyè ne: “Nyaaya anu bwa katuutakeena ne Mukalenge Yesu cyanaana.” Yèyè ne: “Kaa, s’mbilenga bya dikema!” Yèyè ne: “Nwênù bônso, bânà baanyi, disangishaayi banyungulukile bulaalu.” Kukwataye, kubangila anu ku mukulumpe too ne ku mwânà ku bônso, ku cyanza, e kubabeneshaye.

³¹⁷ Pashiishe kwambilaye bânà bende babidi baa balume baa kuumpala abu, ne: “Njuulaayi kuulu.” Ki kumujuulabo kuulu mu bulaalu amu. Kavwa ne mushindu wa kushaala mulame cyanza cyende cyela muulu to. Ùkaavwa ne butekete bupite bûngì.

³¹⁸ Kwambilaye mwanende mukwabo wa balume, kwambaye ne: “Juula cyanza cyanyi eci.” Kumujuulaye byanza abi, nunku *ewu*.

³¹⁹ Kwambaye ne: “Dituku dya disanka, dituku dya disanka, dyàkasukulà Yesu mpekaatu yanyi. Yèyè kundongesha mwa kushaala mutabale ne mwa kwikala kusambila, ne mwa kwikala ncyonkomoka dituku dyônso.” Winyika mutu nunku nyèyè uyaaya wawa.

Ee, bidi bikengela bwa twètù kukafika ku umwe wa ndekeelu ayi.

³²⁰ Ndi ne disanka bu munudi ne muntu mukese, mudipwekeshe wa mushindu ewu munkaci mwenu, unudi beeyemene. Numwitabuuyaayi; Nzambi neânwenzèlè bishima, munkaci mwenu.

³²¹ Nunku ndi muswe kulombaku cintu kampanda kudi kaekleeziya kakese aka bwanyi mêmè. Nunsambidilaayiku’s, hèn? Mêmè, ndi paanyi umwe wa ku bânà beenu. Ncitu neenu dîbà dyônso to; ndi muswe kwikala neenu. Nutu nupeta mikaba ya mêyì ne bikwabo muneemu emu. Ne mêmè nyewu ndi mulwe mu cyalu cya mvita cinene emu. Ewu udi anu umwe wa ku myaba ya mudimu mutudi twindila Dilwa dya Mukalenge. Nwikalaayi nunsambidilaku, bwalu ndi bulelela dijinga ne masambila enu. Ki cîndì ngeeyemena, misangu yâbûngì, pântù nkafika mu myaba ya mikole, nangananga mu budimi bwa bwambi bwa ku baabèndè.

³²² Kabidi kudi bampakààmàngà, ne bikwabo byônso, binunu kuvudija ku binunu biimane kwaka, bakwela kadyombo, kadi wèwè uya kwôkò aku, nkaayeebe, kaa, s’bidi bikengela wikale mumanye byûdì wamba’s. Kaa, ekelekele! Pa dîbà adi, bôbò’s badi mwa kwenza cintu kana cyônso. Badi anu mwa kutentula cintu kana cyônso cidi Nzambi naaci aci, papwîpì ne byônso. Badi mwa kucyenza, menemene anu bu Yane ne Yambele, uh-huh, badi mwa kutentula cintu kanà cyônso cidi naci Nzambi mwaba ewu.

323 Dìbà adi ndi mvuluka, ngeela meeji ku kasumbu kakese kampana, kaa lulamatu. “Tukaadi dìbà kaayi, dya dituku? Lwà mundekeelu menemene mwa cipeela mwamwa, mwamwa menemene, mu kaamwaba kakese kaa kale kadibo babiikila ne n’Sierra Vista, nwamonu’s, kaadisangisha kaa milombo kakese kadi munkaci mwa kwenzekamu pa dìbà edi. Nwamonu anyi? Mundekeelu mwamwa, lwà ku luseke lukwabo lwa mukuna lwalwa, kuulu kwaka mu kamponyi kaa kale kaa ngombe mwamwa, mwaba kampana mushindu awu, badi munkaci mwa kusambila.

324 Pa dìbà adi ndi mpatuka, ngamba ne: “Ndi mubwikila kudi disambila. Sataana, kwênàku ne cyùdi mwa kungenzela to. Ndi ndwa mu Dìnà dya Mukalenge Yesu.” Nudi numona’s, cintu kampana’s cidi cyenzeka.

325 Nwânsambidilaayiku. Nenwênzè nanku awu anyi, nwênù bônso? [Disangisha didi dyamba ne: “Amen.”—Muf.] Amen.

Mwaneetu Isaacson, lwâku kuneeku.

326 Nudi bamanye’s, mêmè—mêmè mvwa’ kujinga anu kushaala muneemu, bwa kuya neenu ne muntu ne muntu wa kunudi mu mênù bwa kuya kadya didya dya mundaamuunya. Nebingangate ntanta mule. Ne ndi mumanye ne nwênù balumyana aba nudi nwela meeji ne nudi ne biipiki baa batambe bwîmpè bwa buloba bujima. Kakwena mpatà to nudi naabo. Nwamonu anyi? Ne mêmè ndi cya bushuwa mufwanyine kunanga kwenza cyôci aci. Kadi ncyêna—ncyêna mwa kucyenza leelu to. Nwênù bônso nudi anu bumvwe cyôci aci, kî mmwômò anyi? Nwênù, nudi nuumvwa ne, ncyêna mwa kucyenza mpindyewu mene to. Ndi nsanganyibwa mu dilubakana dinenaanaale mwaba ewu, bwa dìbà ditudi edi. Ndi muswe kwikala kulwa ne kulwa mu bwobumwe neenu. Ndi musweku kwalukila cyakabidi, kwalukila kabidi bwa kwikala neenu. Nzambi anubeneshe.

327 Mpindyewu, Mwaneetu Isaacson, angatululaaku bulombodi, cyônso cidi Mukalenge muswe bwa wêwè kwenza aci.

328 Mpindyewu, kwôkò kwikàle muntu kana yônso wa kunudi udi muswe bwa kulwa kuneeku, utu kacya kayiku mwanji kwenza didilekelela kudi Yesu Kilisto, kadi mwikàle muswe bwa wêwè kulwa apa ne kwimana mwaba ewu mu dinda emu, anu ku luseke lwa cyambilu eku, kutudi mêmè ne Mwaneetu Isaacson biimanyine eku, ne muswe bwa bakusambidile, muswe bwa twètù kulomba bwa Nzambi akusungile, udiku mwa kulwa mpindyewu anyi? Nenku, wêwè, neupete bucimunyi mu kaabujima leelu ewu. Pawikala . . .


329 Kwôkò kwikala muntu kana yônso wa kunudi aku mwikàle mutwe cimpingà muye kule ne Nzambi, cibi kayi mumanye—kayi mumanye to, wêwè mumane kujimija bwobumwe abu, byenze bu inabànza mutekete awu diloolo dya makeelela adi.

Kaa, mîdimà's yidi yikungwila paudi uya kule ne Nzambi. Udi usanganyibwa mu njila wa bitoci. Bûdi naabu mbwa kujimija. Ne pawikala kuyi mupete bucimunyi bùvwà bùkèngelà bwa wêwè kupeta abu to, kwênàku mwa kwanyisha bwa kulwa wêwè peebe anyi? Bucimunyi mu kaabujima mbwòbò ebu. Eci ki cidi cifwanyine kwikala dituku-dya-B bwebe wêwè, bwa bintu byònsò bya pa buloba.

³³⁰ Wêwè udi wamba ne: “Nkaadi mupetepete mateeta àbûngì be, Mwaneetu Branham. Ndi mutankakajibwe kakuyi bwa nsongo to.” Ncyèna mufume ku dinwambila ne awu n’Nzambi, bwalu Yèyè mmukweyemene anyi? KwakuMwela màyi ku makàsà to, s’mmwômò’s? Udi mufwanyine kwikala mudishindeshinde. Udi mufwanyine kwikala mwenzenze cilema kampanda. Kadi kwakuMwelaku màyi ku makàsà Yèyè to, s’mmwômò’s? Neujuukuluke cyakabidi, bu mudi disalaayi dilelela, upya Mwele wa mvita awu, ne wasulula cyakabidi lwendu uya kumpala. Tudi bafwanyine kwikala ne disanka dya kwenza nanku. Bushuwa’s.

³³¹ Ne kabiyi nanku to, Mwaneetu Isaacson neatungunuke ne kukwakwila pa dîbà adi.

³³² Bu nwênù mwa kumfwilaku mêmè luse mpindyewu, bwa mpeteku mushindu wa kuya, bwa kwalukila ku Tucson. Nèngààlukilè bwa kunumona cyakabidi, bu Mukalenge mwa kwanyisha. Nzambi anubeneshe. Nudiku mwa kuswa bwa kunsambidila mpindyewu anyi? [Disangisha didi dyamba ne: “Amen.”—Muf.]

³³³ Vulukaayi ne, mucimunyi wa mu kaabujima, ujaalamijile dimona dyebe pa Yesu Kilisto. Yèyè udi umwèumwè awu makeelela, leelu, too ne kashidi. Ne dîngà dituku, ne ditangila dîjaalamija dya dîsù dyebe adi, Yèyè nealwe ufumina mu dyulu ne Lubila, Dîyi dya Mwarkanjelo. Bafwe mu Kilisto nebajuuke. Nenku mibidi ya cifwaka eyi neyivwale dibenga kufwa, nenku netuye bwa kashaala Nende bwa kashidi. Patwamba kukùfika, ikalaayi batabale ne nusambila. Nzambi anubeneshe. 

DITÛKÛ DYÀ BUCÌMUNYI LUA63-0421
(Victory Day)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 21 a ngondo mwinâyì, cidimu cya 1963, ku House Meeting mu Sierra Vista, Arizona, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2019 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org